

482

D-12

492

212



KONINKLIJKE BIBLIOTHEEK

0569 974



E P I S T O L Æ
EXCELLENTIUM
B A T A V O R U M.

NOTICE

RESOLUTION

OF THE

E P I S T O L Æ

ALIQUOT

EXCELLENTIUM

B A T A V O R U M,

CONSCRIPTÆ

A

PETRO HOFMANNO PEERLKAMP.

GYMNAS. DOCC. RECT.



H A R L E M I,

APUD ADRIANUM LOOSJES, PF.

M D C C C V I I I.



*Apud A. LOOSJES Pf. Harlemi protant adhuc
aliquot Exempla seqq.*

- I. GROTH (HUGONIS) Parallelon Rerumpubli-
carum ed. Meermannno. IV. voll. 8vo. maj. f 16-4-
- II. ————— Epistolæ Ineditæ ex Musæo
Meermanniano. 8vo. maj. 2-8-
- III. PEERLKAMP (P. H.) Oratio de Xenophonte
Ephesio. Accedit in eundem Observationum Cri-
ticarum Specimen. 8vo. maj. :-12-
- IV. ————— Vitæ aliquot Excellentium
Batav. 8vo. maj. -15-
- V. WOORDHOUDER (T) Monumenta fugæ Grotianæ
8vo. maj. -15-

E P I S T O L Æ

A L I Q U O T

E X C E L L E N T I U M

B A T A V O R U M,

C O N S C R I P T Æ

A

P E T R O H O F M A N N O P E E R L K A M P.

G Y M N A S . D O C C U M . R E C T .

F A S C I C U L U S I.

H A R L E M I,
A P U D A D R I A N U M L O O S J E S , P F.
M D C C C V I I.

AEQUO ET RERUM PERITO ARBITRO.

In usum juventutis, cui *Vitæ meæ excellentium Bata-
vorum* fuere pergrata, has epistolas in lucem emisi. Illud,
quod hoc etiam labore spero et ago, est, ut sermonis
bene Latini, rerumque a majoribus gestarum cognitio te-
neris animis mature impressa, augeatur atque amplificetur.
In animum autem induxi, unum deinde alterumve episto-
larum fasciculum emittere. — Bene vale. —



P. H. P. S. P. D. *Disciplinæ
suæ alumnis.*

Biennium est, optimi juvenes, quod Harlemono huc veni, et vos disciplinæ meæ traditi estis. — Ea quæ futura dixi, modo id, quod in vobis esset, præstaretis, evenerunt. Dixi autem, quod et vos libenter in memoriam revocare soletis, nihil esse, quod labore, usu, et exercitatione, hac ætate addisci non posset, positis præsertim jam rudimentis. Hæc itaque a vobis, quum lectiones nostras ordiremur, postulavi, deque iis nihil omnino remisit. Quod reliquum fuit curæ, id mihi imperavi, cumque me vobis, quem vidistis, ducem præbui. Vos partes vestras bene egistis, ut adeo laboris mei, tantum abest ut me poeniteat, fructum percipiam longe jucundissimum. — Quare accipite

*hoc a me munusculum, optimi juvenes; et me,
quod facitis, ut præceptorem vestrum et ami-
cum, diligite et amate.*

Scripsi Doccumæ a. d. x Octob. MDCCCVI. —

EPIS-

E P I S T O L Æ
EXCELLENTIUM
B A T A V O R U M.

GULIELMUS COMITI EGMONDANO
P. S. D.

Ex quo me a vobis in Germaniam recepi, Comes Egmondane, et communibus Belgii miseris cogito, cogito autem sapissime, solet in mentem venire illius diei, quo multis te precibus rogavi, ut salutis tuæ habere velles rationem. Nam quum Margaretha me, ut in Batavis manerem, deducere vellet, atque ego ea de re vobiscum agerem, te a cæteris, qui aderant, seduxi, et plurima ad timorem fidissime atque amantissime proposui. Sollicitum te habebat cogitatio rerum fortunarumque tuarum, quas si relinqueres, in exilio nihil tibi fore dicebas, quod pro dignitate tua te aleret atque tueretur. Regem etiam placari posse tibi persuadebas, si sacris concionibus illius inimici interdicerentur, et sancti poenas a templorum violatoribus haberent. Velim equidem, et tua et aliorum causa, hæc opinio rerum eventu probaretur. Sed perspecta mihi Hispanorum crudelitas et perfidia, pericula vestra, quæ par-

tim jam adsunt, partim imminent, præfagiunt. Quare me consilii mei nec poenitet, nec puto fore ut unquam poeniteat. Neque vereor ne famæ et existimationi male consuluisse dicar. — Reliqui Belgium quod a teneris ut patriam meam, amavi; idque multas ob causas, quas satis notas tibi arbitror. — Ita tamen reliqui, ut corpus tantum meum desideret, animum nunquam desideraturum sit. Animi enim curæ et cogitationes quotidie in Bataworum salute exercentur. Hos in libertatem vindicabo aut honeste mortem oppetam. Neque hæc mea voluntas tibi aut aliis viris nobilibus, qui patriæ bene cupiunt, ullo modo potest esse incognita. Ipsi etiam ingenui cives facilius illud perspexerunt. Quare et plurimi me favore suo prosecuti sunt.

Cæterum consilia mea mihi non magis celanda arbitror. Jam enim dux ille Hispani exercitus domum me ad causam dicendam revocavit, me fidem Philippo datam fefellisse, meque conjuratæ multitudinī ducem me præbuisse, accusavit. Habeo quæ ad hæc respondeam; illa brevi videbitis. Interim non parere certum est. Quod si enim mei potestatem fecero, quò jure quaque injuria, me trucidabunt. Nihil enim amplius pensi habent. Filium meum natu maximum, qui in Academia Lovaniensi literis operam dabat, inde abreptum in Hispaniam deduxerunt. Tutum se scilicet credebat puer jure loci; sed hoc non curat bonus Vargas. Dolorem tamen istum, licet eo, ut privato, maxime afficiar, in minimis pono, multoque magis me infelicis patriæ miseret, cuius omnia membra scelere et immanitate Hispana brevi fracta dilacerabuntur. Sed ista me

CO-

cogitatio in spem erigit, Deum esse, qui res humanas tuetur. Nonnullum praeterea in eo mihi est solatium, Belgium, licet multis claris viris orbatum, retinuisse tamen plurimos, qui bonae causae favent. Quamquam te aliosque, quorum de rebus publicis notior est sententia, discessisse malletm. Patriae enim accidit, si quid vobis accidit. Me quod attinet, ut jam saepe ostendi, nunquam vobis deëro. Hæc ad te scripsi verbosius, et liberius etiam, quam pro more meo, sed novi te patriæ et mei amantissimum. Quod si quid eorum, quæ in rem nostram meditor, expediero, certiore te faciam. Cæterum te etiam atque etiam rogo, ut rebus inclinatis tantum adsis, quantum dignitas tua et fides, et vero etiam salus patiantur. Sic enim habeto, te eum esse, in quo magnum libertatis robur positum esse semper arbitratus sum, Vale et me ama. —

GULIELMUS PAULO BUISIO

P. S. D.

Quamquam fortasse fama rerum male gestarum ad vos jam sit perlata; tamen, non committendum putavi, ut nostras tibi calamitates non ipse perscriberem, præsertim quum tu jure quodam tuo illud a me postulare possis. Nam ut omittam cæteras tuas virtutes, quibus patriæ tantum, quantum est maximum, prodesse conaris, tantum autem prodes, quantum his temporibus ab optimo cive fieri possit, illud mihi gratissimum fecisti, quod de rebus, quæ

A 4

apud

apud vos aguntur, non minus celeriter, quam prudenter literas ad me perferendas curasti. Inëunte igitur hieme castra movi. Peditum erant omnino XIV millia, equitum VI. Multos mecum habui, nobiles Germanos et Gallos, plurimos Belgas. Albanus fossa et vallo septus ad Mæstrichtum erat. Hunc imparatum ab ea parte, qua minime expectaret, adoriri conatus sum. Itaque Mosam, Mæstrichtum inter et Ruurmondam, transii. De militibus, impedimentis, cæterisque rebus nihil amisum. Equites enim aliquot ibi posueram, qui flumen aquarum inhiherent. Hostes, hoc audito, perterriti nuntiabantur, adeo ut eos primo impetu profligaturus viderer, si statim congredi licuisset. Sed milites lassitudine erant confecti. Postero die Albanus pugnam detrectavit. Commeatui etiam me interclusit. Quare castra sæpissime movere coactus fui. Spe pecuniarum promissarum etiam decidi. Itaque quum nihil expediri posse viderem, in Galliam magnis itineribus, Hugonotis in auxilium profectus sum. Obviam mihi quidam venit legatus. Ab hoc admonitus exercitus, sibi cum Albano tantum rem esse, clamabat, et in Germaniam, quæ plurimorum est patria, reduci, atque ibi dimitti postulabat. Cessi invitus. Mille tamen equites retenui. Comes enim Bipontinus in Galliam ad Hugonotas meditatur, cui cum manu mea accesurus sum.

Vides, Paule, me non mea culpa nec virtute Hispani, sed adversa fortuna esse superatum. Et ille tamen Bruxellis ex me triumphum egit. At non hoc illi sic abibit. Hæc enim me clamitas non fregit, sed animum addidit, ut quancunque Deus re-

recuperandæ patriæ offerat occasionem, hanc arripiam. Vale et res nostras, quam potes studiosissime, tuere.

GULIELMUS MARNIXIO ALDEGONDIO

P. S. D.

Magnam ex literis tuis percepi voluptatem, quibus me diligentissime certiores fecisti, quæ in concilio Dordraceno acta sint. Quod tantis me laudibus coram senatu Batavo ornasti, fecisti illud pro amicitia nostra, et plusculum forte, quam veritas concessit, amor largitus es. Sed largiare sane, dummodo id ad publicam aliquid afferat salutem. De promissa pecunia mirum quam læter. Hujus enim inopia et conatus sæpe meos retardavit, et multas, nec eas leves, mihi molestias creavit. Simulatque dies advenerit, nec stipendia militibus sint parata, irati sunt et contumaces. Hic magna opus est eloquentia et prudentia. Nihil enim nisi spem præstare possum. Et, quamvis inique, ferunt tamen. Eum enim me omnes norunt, qui, quum habeam, solvere non detrectem. Multa jam de rebus familiaribus vendidi, sumtui tamen unus subsistere non possum. Ab aliis igitur mutuo accipi, aliis usuras pendo. Jamque in multorum ære sum. Et, quamquam molesti non sunt, forte quod bonum nomen existimor, ista tamen in re magnopere mihi ipse displiceo. — Sed hoc omne, si id, quod spero et quod ago, consequi aliquando velim, fe-

rendum est. Atque utinam his atque aliis etiam domesticis in commodis et doloribus, publicam salutem redimere possem. Hac enim nihil habeo antiquius. — Vale et quod facis, me ama. —

GULIELMUS JOANNI FRATRI

P. S. D.

Amo te, frater carissime, non solum propter summam, quæ inter nos intercedit, necessitatem, verum etiam, et haud scio an magis, propter istam tuam in me benevolentiam et liberalitatem, qui nihil fere bonorum tuorum liberum reliquisti, ut mihi, in contrahendo exercitu occupato, succurreres. Quo quidem facto meum in te amorem, qui summus semper fuit, sic confirmasti, ut nullo tempore labefactari nec inclinari possit. Quapropter te quamprimum videre cupio, ut, qui fortunam iterum habuerim adversam, et præsentia vitæ pericula vixdum evaserim, curas meas et dolores in tuo sermone atque solatio deponam. Regina, quæ gladiatores Parisienses nocte Bartholomæa nuper ad convivium adhibuit, parum a se gestum existimans, nisi et ego cædi accessissem, Mandessoum, qui in castris meis stipendia merebatur, ad necem meam impulit. At ille fidem auro præposuit; et rem ad me detulit. — Hispanos fere est quod laudem; saltem ut cum hoste mecum egerunt. Cunctando et non pugnando victoriæ studere videntur. Noctē tamen media, oppressis ex vigiliis, in castra nostra irruperunt. Jamque
ad

ad prætorium pervenerant. Hic catellus, subito tumultu perterritus, ut videtur, crebris moribus me petiit, atque ex somno fuscitavit. Nosti me in castris armatum dormire, et semper equum habere paratum. In hunc me conjeci, et, quod Deo acceptum refero, manus hostiles evasi. Duo comitum occisi sunt. Paucis post diebus castra movi, Rhenum transii, exercitum dimisi. Milites stipendium, cui non eram solvendo, flagitantes, hosti me tradituri dicebantur. Itaque latendum mihi erat. Legati interim cæterique duces, spe eos alebant, publica ostendentes Ordinum testimonia, quibus se daturos promittebant. Res humanæ ita comparatæ videntur, ut, si insignis nobis eveniat calamitas, aliqua ea felicitatis parte leniatur. Quam prope ab interitu abfuerim, et tu vides, et ipse frequenter memoria repeto. Deus, Deus est, qui me faucibus fati eripuit. Et hæc cogitatio animum aliquanto erigit. Hunc tu porro oratione tua et præceptis confirma, ut luctus et ægritudo aliqua leventur; nec constantia mea vi tempestatum omnino mihi eripiat. Nondum omnino excidit. Sed concursa calamitatum miserum in modum labefactata est et convulsa. Vale. —

GULIELMUS PETRO VILLERIO S.

Vide quo tandem furor Hispanorum eruperit! Aperte me petunt, et per latus meum, patriam nostram. Vim iis fecisse videor, eoque mihi nomine
aquam

aquam et ignem interdicunt. Me ingratum, perfidum cujuslibet rei simulatorem, et perjurum appellant. Me peregrinum, me caput omnium miserrarum, me pestem cum generis humani, tum fidei Christianæ vocant. Me Cainum et Judam referre, me adulterum, qui sanctam uxorem duxerim, alii suas sibi res habere siverim, in me denique uno malorum esse foedisimam sentinam. Deinde, quæ est Philippi humanitas, me, ut impuri hominis odium, omnibus occidendum dilacerandumque commendat. Illud egregium facinus qui patrauerit, huic ingenti fore pollicetur præmio. Huic omnium, quæ admiserit peccatorum veniam et impunitatem dabit. Hunc nobilitate, si careat, donabit. Cæterum omnibus et singulis edicit, ne suo me auxilio sublevent, ne tecto excipiant, nec quidquam mecum, aut dicto aut facto, communicent. Qui secus fecerint, horum bona publicatum, ipsos morte damnatum iri. — Quod si veræ justæque hujus in me odii essent causæ, vitam mihi acerbissimam putarem, nec vitalem. Nosti enim animum meum, mi Villeri, quem tuis sæpe præceptis et solatiis, ex doctrina Christiana petitis, imbuisti et confirmasti. Hanc igitur calumniam ea, qua debui, mente accepi.

Magna vis est conscientiæ in utramque partem. Ego, qui nihil commisi, nihil timeo. At reipublicæ, cujus causa hoc odium contraxi, interest, ut vivam. Huic parebo, tantumque mihi consulam, quantum illa postulet. Corporis custodia augetur. Dives stipendium datur. Ut, si minus fide, at pecunia in officio retineantur. Cæterum in amore ac benevolentia liberatæ patria acquiescam.

Unum

Unum superest, quod ad te spectat, et cujus rei causa has ad te literas dedi. Vulgus plerumque, mi Villeri, ex specie judicat, et pessimus est veritatis interpres. Nimis vereor ne fidem Hispano edicto habeant. Scriptum aliquod parandum atque in lucem edendum est, quod calumniis istis atque mendaciis omnem, si fieri possit, vim et auctoritatem eripiat. Hæc tibi provincia erit suscipienda, et, si me tantum amas, quantum profecto amas, hanc quam diligentissime atque studiosissime geres. Ipse quominus id præstem, negotia, a quibus districtior sum, impediunt. Ut tamen habeas aliquid, quod sequare, rerum capita, quæ libello comprehendere, tibi describenda curavi. Hujus tu libelli accipe exemplum, et res tuas bene ac feliciter age. Vale.

EXEMPLUM LIBELLI CONTRA EDICTUM HISPANUM.

Magni Carolum imperatorem semper faci, atque etiam facio. Beneficiis, quæ mihi præstitit, partim a majoribus meis, partim a me ipso relata est gratia. Philippo nihil est quod debeam. Honor, imperium et dignitas, in me, et binos Comites collata, majore cum dedecore adempta sunt. Quare hæc beneficii loco haberi nequeunt. —

Regem, quoad amice cum eo vixi, sæpe ad moderationem hortatus fui, et, si perseveraret, omnes istas calamitates, quæ acciderunt, futuras dixi. Nunc palam ut hostis cum hosti, bellum gero, et
fi

si odi, aperte odi. Non hæc profecto simultas aut perfidia dici possunt. At Philippo multis locis diffidens repertus sum. Si prudentem esse in vitio ponatur, culpam hic agnosco. At cui regi magis diffiderem, quam isti, cujus natio, qualis esset, in Grenada adversus Mauros, et in Belgio adversus Egmondanum et Hornanum ostendit? —

Fide et jurejurando, quibus fueram obstrictus, me ipsa Hispanorum perfidia et crudelitas liberavit, atque ad arma capienda incitavit. —

Videant porro, num ipsi similiore sint Caino et Judæ. Ex edicto regio conjecturam faciemus. Abjecti sunt et desperati, et plane, quo se vertant, nesciunt. Quæ alia Caini fuit mens, post cædem fratris factam? — In hoc autem Judam imitati sunt, ut vim conscientiæ retuderint. At excitabitur illa, excitabitur, et ultricibus furiarum poenis eos exagitabit. —

De adulterio solus mihi Philippus objecit, quod tamen, etiam si esset verum, neminem minus quam illum decebat. Nam quis sororis filiam incesto flagitio duxit uxorem? Philippus. Quis conjugem suam jugulavit, ut cum alia viveret? Philippus. Quis nobilem virginem, adulteratam, deinde viro principi obtrusit? — Philippus. Sed ista flagitia, si ipse mihi hujus culpæ conscius essem, me dedecore et infamia non liberarent. Divortium cum Anna Saxonia feci honestum; agnoverunt id ipsius amici et propinqui. Bourbonia nunquam fidem dedit, se vitam intra sacros parietes consumturam. Dederit vere; dedit certe in prima pueritia. Ista autem ætate non obstringit. —

Pe-

Peregrinus sum. Si cum velis peregrinum, qui in Belgio non natus est, ipse rex est peregrinus; et magis forte, quam ego. Germaniam habeo patriam, quæ multis nominibus cum Belgio arcte fuit conjuncta. Majores mei in Belgio ampla satis bona tenuerunt. Tales autem, si cum Batavis facerent, cives et dicti et habiti sunt. Fuere et ex genere meo comites Gelriæ. Sed ponatur sane patria in muris et parietibus, sim peregrinus. Omnium certe bonorum consensus me civitate Batava donavit. Et idem ille consensus, si rex optimo jure civis esset, cum in Ceritum tabulas referret. —

De turbarum origine, hæc non ad me referenda, sed ad Hispanici senatus, a rege constituti crudelitatem. Hæc meam misericordiam excitavit. Quidvis enim perpeti maluissem, quam lentus spectare tot millia hominum, religionis calumnia, gravissimis affici suppliciis, ut mors beneficii loco haberetur. Quod si per me stetisset, Albanum ipsis Belgii finibus prohibuissem, et cives incendio, vastitati miseræque cædi eripuissem. — Hæc objiciat Philippus; mihi ipse laudi duco. —

Inimicus sacræ doctrinæ nunquam fui. Illud omen Deus avertat, quod ne capiti quidem Hispano sit, velim. Tantum ferre nec potui nec volui, innoxios homines ob ea, quæ nullius damno de religione sentirent, trucidari. Religio, et ipse ille Deus, cui se gratum hac immanitate facturos credunt, ab ista abhorret. —

Oppressæ in religione multitudini ut vim faceret, nunquam auctor fui, nec templa vastata, nec imagines dejectas probavi. —

Quod

Quod superest, Hispanas diras et devotiones nihili æstimo. Vivam, quoad Deus voluerit. Patria porro me totum sibi vindicabit. Si qui Batavorum sint, qui me unum ab Hispanis peti arbitrentur, et libertatem et salutem meo interitu confirmari, pacem et otium restitui posse judicent, hosti me tradant. Aequo animo mortem feram, dummodo id patriæ meæ profuit.

GULIELMUS MARNIXIO
ALDEGONDIO.

Bourbonia mea, cujus incredibilis in me curando fuit amor pietas, et patientia, tandem animi et corporis laboribus defatigata, obiit. Me miserum! Hanc ista fide, probitate, humanitate e vita excis-
sisse? Eumque illam morbum, mihi dies noctesque assidendo, de mea salute cogitando, meam valetudinem precibus a Deo flagitando contraxisse! Me convaluisse, nec potius cum ea mortuum esse! Mi Aldegondi! — Quid faciam, aut quo me vertam? Quæ spes, quæ solatia animum, non dico sanare, sed levare, possint? Sec enim cogito, me omnium hominum esse miserrimum. Nequeo plura scribere. Vis lacrymarum omnes literas deleteret. Tu cura ut valeas. —

VIGLIUS ZUICHEMUS P. S. D.
DESIDERIO ERASMO.

Omnium literis et sermonibus ingenium tuum et doctrina celebrantur; iisque bonis, maximis illis quidem, majora tamen adjungunt tui amici, summam scilicet morum probitatem, conjunctam cum pari humanitate. Tales ego homines maximi semper feci, neque eos mortuos tantum, ut multi solent, verum etiam vivos; eosdemque quamvis nunquam videro, diligo tamen. Quæris, quid sit, quod me ad diligendum alliciat? — Virtutis, quæ in istis elucet, amabilitas. Ad hos, Desideri Erasme, quum te nemo melius referri queat, quantum te amem, conjicere facile potes. Quare te etiam atque etiam rogo, ut me quoque in tuorum numero habere in posterum velis. Quod si vero et Andreæ Alciato, summo juris consulto me commendaveris, duplici nomine optime de me meritus fueris. Hæc, quæ audacius expromsi; eadem coram tecum, si fieri potuisset egissem. Et si parum impudens tibi viderer, quamquam, credo, non viderer, illud partim tuæ humanitati, partim meo in te amori, partim patriæ meæ tribuerem. Homo enim Frisius sum. Itaque aperte quæ sentio, locutus sum. Vale et me ama.

VIGLIUS ZUICHEMUS P. S. D.
PHILIPPO REGI.

Ex quo pater tuus mea sibi opera utendum putavit, hanc ei non solum non negavi, verum etiam ita præstiti, ut amorem, quo illum profectus sum, qui ignoret, arbitrer esse neminem. Quidquid consilio, auctoritate, dignitate, et vero etiam prudentia aliqua e re illius efficere potui, omne illud effeci. Ille mihi tuam amicitiam quasi hæreditate reliquit. Hanc ex asse accepi. Quare omnem istum, quem dixi, amorem, in te transtuli, tua commoda, mea duxi, et fortiter sæpe contra rerum novarum cupidos steti. Hæc commemoratio non est exprobratio quasi immemoris beneficii. Gratum enim, si hoc uti liceat, ut te credam, faciunt tot honoris et dignitatis in me collata ornamenta, facit illa tua erga me liberalitas; sed ideo hæc a me dicta sunt, ut, quæ aperte, et nulla usus circuitione proferam, ab optima mente esse profecta iudices. Literas nuper ad Margaretham dedisti, eamque de certis hominibus admonuisti, qui quam recte in suspensionem tuam ceciderint, ipse videris; sed ceciderunt. Per fortunas, quæso tuas, Philippe Rex, si salus tibi et otium Belgii sint cordi, utere moderatione et clementia, præsertim in quo religio cernitur. Valde cogites velim has virtutes cum omnium hominum esse debere proprias, tum maxime regum. Neque te fugit, quanto plura amor, quamvis in civium animos valeat. Da itaque locum lenitati, quod te
com-

commodum tuum et ipsa humanitas jubent, et a severitate quam longissime recede. Etenim suspicor fore, ut hac, quod sequare, nunquam assequare. Illud ne accidat omnino cavendum tibi arbitror; neque id solum tua ipsius causa, verum etiam amicorum, ad quos dolor iste etiam pertineret. Quare etiam atque etiam vide, quid suscipias, quid sustinere possis; ut consilia tua Belgio salutaria sint, et tibi. — Vale.

VIGLIUS ZUICHEMUS COMITI
ALBANO. S. P. D.

S. T. V. B. E. Ego semper arbitratus sum, eos, qui in summo honore atque dignitate sunt, id agere debere, ut clementia et moderatione civium sibi animos concilient. His enim et civitatis et ipsorum salus continetur. Non hæc ideo dixi, quod te ea nescire putavi; sed in memoriam tantum tuam revocavi, ex qua his temporibus excidisæ aliquantum mihi videbantur. Jam antea, ut vere dicam, gesisti ita quædam, ut in iis et omnes et ego lenitatem desideraremus. Quo facto civium animos a te et a rege aliquantum alienasti. Quod contra fieri oportebat. Nunc vero et grandes pecunias imperare, deque ea acerbius admonere statuisti. Censeo illud primum singulis civibus, deinde toti civitati onus esse gravissimum et miserrimum. Cogita quantum hinc detrimenti religio, leges, artes, et mercatura, nervus iste Belgii, sint factura. Fidem mihi

B 2

ha-

habe, ita, quæ optamus, accidant. Qua mente et quo animo in regem et vos semper fuerim, nemini est incognitum. Vobis et sæpe consului, et nunc consulo. Animos Batavorum penitus nosco; quum sim Batavus. Sunt patientes et sinceri; fidem servant. At si injuriis irritentur, virtus eorum excitatur, et vim vi repellunt. Quod ne eveniat, omnino tibi erit cavendum; idque eo magis, quum scias, quam nonnulli novis rebus studeant. De pecuniis itaque desiste, quæso; sin autem, ut sis moderatior quam severior. Quodsi vero perseverare velis, meum erit, Philippum orare et precari, ut imitari hic velit Tiberium, qui boni esse pastoris censebat, tondere pecus, non deglubere. — Vale.

VIGLIUS ZUICHEMUS JOACHIMO
HOPPERO. S.

Tandem aliquando ex infinitis negotiis otium mihi persequi a rege concessum est. Dudum illud concupivi, et propter ætatem meam, et quod foedas tempestates Belgio imminentes prospicere mihi videbar. Hæ antiquam exorirentur, portum tenere volui; neque id vitæ aut salutis timore; quid enim omnino timeam, qui ab officio, quoad ejus a me fieri potuit, nunquam discesi? — Sed pudore aliquo et suspitionis metu, ne tempestates istas una cum aliis excitasse dicerer. Quamquam ne sic quidem illud malum evadam. Nam et olim fuisse nosti, Hoppere, qui me auctorem edictorum calumniati
fu-

fuerint, a quibus animus meus semper abhorruit. Deum et amicos testor, quantopere mihi severitas ista, ut leniter dicam, displicuerit, et quam multa, quæ nolui, viderim! Quæ mea igitur consilia fuerint, et quam aperte ea cum Philippo et Albano communicaverim, non ignoras. Sed, utcumque hæc, quæ timeo, atque utinam vaticinarer, eveniant, in portu me tamen esse gaudeo. —

Interim ingenti cupiditate flagro Frisiæ nostræ videndæ, a qua tot annos jam abfui. Et hoc desiderium non mediocriter auxit. Sæpe ultimam pueritia memoriam recordans, animus, sive lætitia, sive tristitia, sive utraque totus perfunditur, ut lacrimas cohibere vix possim. Longe maxima ætatis pars effluxit, minima superest. Hanc in Frisia consumere maxime velim. Ut, quæ primum vitæ actum viderit, eadem videat extremum. Sed de his si quid certi constituerò, ut scias, faciam. Vale.

JANUS DOUSA GEORGIO SUO S.

S. T. V. B. E. Ego, et mater tua optima, et carissimi fratres et sorores, bene valemus. Quotidie nobis ante oculos tua versatur imago. Mater interdum desiderio et suo in te amoris plus indulget, quam velim. Sed tale scilicet mulierum ingenium. Ego discessum tuum, ut patrem et virum decet, fero. Nunquam tamen frequentius ista Terentii iu mentem venerunt.

Ego, quia non rediit filius, quæ cogito!
 Et quibus nunc sollicitor rebus. Ne aut ille alferit,
 Aut uspiam ceciderit, aut perfregerit aliquid.

Quare si bono nos animo et plane confirmato esse velis, velle autem te magnopere certe scio, crebris nos literis rerum tuarum certiores facies. Præsertim si Constantinopolim adveneris. Inde quam accuratissime et diligentissime scribes. Matri tuæ et fratribus et sororibus accidet jucundissimum, si a te de Turcis aliquid cognoscant. At tu, mi suavissime Georgi, magnopere inservi valetudini tuæ; hæc si in itinere minus fuerit commoda, omni carebis voluptate, nec tam cito convalesces, quam si nobiscum domi eses. Omnes te salutant. Vale, mi Georgi, vale. —

GEORGIUS DOUSA P. S. D.
 JANO PATRI.

Si tu, et mater optima, et fratres mei et sorores suavisissimi, valetis; ego quidem valeo. Quod tamdiu nihil literarum a me accepisti, hoc non culpa factum est mea, sed magnis locorum intervallis. Nec multi sunt, quibus, si quid recte curatum velim, id mandare possim. Nunc autem oblatam occasionem avide arripui; et profecto, nisi arripuissem, ingratissimi a te animi merito accusarer. Amorem enim erga me tuum domi nunquam non expertus fui, eundem tamen discesu meo aliquantum crevisse, si

ta-

tamen crescere possit, ex literis tuis cognovi. Ita vos salvus et incolumis revivam, ut signum tuum vidi, exosculatus sum; nec sine multis lacrimis legi et perlegi, ut satiari vix possim. Homo, qui mihi epistolam reddidit, ut quam sæpissime scribas, cupere videtur. Adeo liberaliter a me donatus abiit. Subridens etiam me rogavit, quid mea puella ageret. — At signo soluto, legi, nihil respondi. Optima adhuc valetudine usus fui. Corpus assiduis itineribus robur quoddam et vigorem contraxit. Animum, rerum novarum, contemplatione earumque varietate summopere delectatum, habeo lætum et hilarem. Sæpius tamen domus vestrae et patriæ desiderio ita afficitur, ut inde dolorem quendam percipiam, cui ipse indulgeo et faveo. Caterum hic ita vivo, ut, nisi in patria, melius vivere non possim. Domi me suæ recipit Edoardus Bartonus, orator Reginae Britannicæ in Turcia; homo optimi ingenii, eaque erga externos humanitate, et suos benevolentia, ut nihil supra. Jam decem captivos, neque eos Anglos tantum, verum etiam Belgas suis impensis redemit. Quare magnopere lætor me hic esse, ubi talem patronum inveni, qui sua mihi officia nunquam esse defutura ultro pollicitus est. Literarum elegantias et amat, et de iis optime judicare potest. Nomen Doussianum, antequam me viderat, habebat cognitum. Gratum mihi feceris, si rebus istis, quas Constantinopolim perferendas cures, quædam opuscula tua adjicias, ut habeam, quo gratum illi animum ostendam. De rebus Turcicis, quas matrem et totam domum avide a me expectare dicis, nonnulla dedi, quorum subscripsi exemplum. Ea autem potissimum

selegi, quibus eos maxime delectari sciebam. De reliquis modicum quoddam corpus confeci, quod, si Deus velit, domi legendum tibi dabo. Vale et optime et carissime pater, et cogita, quæso, mihi hic esse optime, præterquam quod non una simus.

GEORGIUS DOUSA MATRI SUÆ CA-
RISSIMÆ, FRATRIBUS ET SORO-
RIBUS LONGE SUAVISSIMIS

P. S. D.

Me valere et jucundissime hic vivere, a patre cognoscetis. De rebus Constantinopolitanis, ut optastis, a me audietis. Ego si in patriam rediero, nos inter nos gaudebimus, quod Batavi, nec Turcæ nati simus. — Valete capita suavisima. —

DE REBUS CONSTANTINOPOLITANIS.

Constantinopolis, olim Byzantium dictum, a Constantino magno nominata est. Is imperii sedem co-
translulit. Urbem novis ædificiis, templis, balneis, porticibus ornavit, alia atque alia appetiit loca, eaque munitionibus circumdedit. Mox leges tulit, magistratus instituit, religionemque Christianam publica auctoritate muniit. Diu Constantinopolis floruit. Tandem a Muhamede secundo capta, et a Turcis militibus cædibus et rapinis tota fere exhausta est

est. Ab eo inde tempore hic caput imperii Ottonmannici fuit. — Ipsa urbs est triquetra, et in circuitu satis magna, incolis celebris, cincta serie trium murorum, omnium altitudine dissimili. Pristini splendoris et elegantiae multum amisit. Domus ligno plurimum exstructae sunt, et adeo humiles, ut in inferiore parte habitari tantum possint. — Gynæconitis imperatoris modicam Hollandorum urbem amplitudine æquat, et in suburbiorum hic numerum refertur. Procul e mari visentibus silva variarum arborum videtur, his tecta arquata, aureis globis splendentia, eminent: — Vita hominum magnis hic periculis est exposita, ut terræ motibus, seditionibus, incendiis, et pesti. Horum malorum acerbissimum est pestis, quod tamen Turcæ minoris faciunt. Illud enim a Deo sibi immitti, neque ideo ab hominibus defendi posse credunt. — Itaque eo laborantibus non assident solum, eorumque afflatu afficiuntur, verum etiam vestes vixdum mortuorum induunt. — Vestes funebres, si quis, quem genere attingunt, obierit, non gerunt. In sepeliendis hominibus mira utuntur celeritate, ut raro mortui, nec intra quinque horas sepulti sint. Unde est quod credam multos vivos sepeliri. — Statura iis plerumque magna est et valida. Magno imprimis sint robore, qui oneribus portandis vehendisque victum quaerunt. — Cæterum desides sunt et stupidi; jactant se fide Muhamedis, aliosque a se desentientes alto supercilio despiciunt. Ingenium porro iners et crudele, nec quod injuriarum facile obliviscitur. Itaque virtutem ebrietate sibi parant, eaque virtus in temeritatem cedit. — Corporis voluptatibus valde dedi-

ti sunt. Divites nihil fere agunt, nisi tabaci fumum, et potum fabarum Arabicarum bibunt, et cum mulieribus vivunt. Legere et scribere pauci norunt. Opium valde amant, tantaque hujus copia utuntur, quanta si nos uteremur, æternum credo dormiremus. Adeo consuetudo est altera natura. Istam autem vim tribuunt opio, ut sensibus quasi tenebras offundat, eosque nec vigilare nec dormire faciat. Tum se beatissimos scilicet fingunt, quum parum aut nihil sentiant. Quantum vero hoc noceat valetudini, ex senibus Turcis videmus, quorum plurimi claudi, manci et debiles sunt. — Vinum lege Muhamedis iis est interdictum. Sed qui uterentur, reperi plurimos. Brevi res eo perventura videtur, ut jus vini bibendi certa pecuniæ summa emi possit, eaque pecunia ærario inferatur. Causa certe honesta est. — Habent et monachos suos; quorum nonnulli ex institutis suis, ad sonum musicæ, turbinis instar vertuntur, ut vertiginem, id est ut illi explicant, numine inflammatam mentem nanciscantur. — Festorum, quæ agunt, præcipuum est sic dictum Ramazan, in honorem novæ Lunæ. Hoc singulis novem mensibus celebrant. Per dies cibo et potu omnino abstinent, eosque dormiendo plurimi transigunt. Noctu autem vivunt et genio indulgent. Vix a templo sanctæ Sofiæ signum datum est solem occidisce, quin omnes, quasi uno impetu fistulas, tabaco jam repletas, incendant. — Mulierum apud Turcas miserrima est conditio, eaque ab ipso legislatore videtur esse deducenda. His enim locum in coelo non concessit, sed alium quendam a virorum societate segregatum. Viris tamen, ne ista re care-

rent,

rent, cui dediti sunt magnopere, alias, coelestes formas, quibuscum vivant, promisit se daturum. Itaque Turcæ uxorum utilitatem et præstantiam sola voluptate et necessitate metiuntur. Severissimum in eas exercent imperium, et in interioribus ædium partibus servant: Quatuor uxores cuique licet ducere. Reliquæ sunt servæ, et emuntur et venduntur. Multi tamen, qui plures alere nequeunt, unam uxorem habent. Imperator licet quingentas habeat, quatuor tamen pro suis agnoscit, reliquæ sunt servæ. — Gynæconitis illius multas ex provinciis accipit mulieres, forma præ cæteris insignes. Has eo mittunt satrapæ, ut ab Imperatore gratiam ineant. Quænam sit in ista Gynæconiti, præsertim in interioribus ejus partibus, vivendi ratio, ignotum est. Hæc enim pars a servis fusco colore et facie turpissima servatur. Horum præfectus est in magna auctoritate. Mulieris autem a quovis videri, nefas habetur. Quod si ambulare velint, locus eo electus, velis, quasi muro circumdatur. Deinde et custodis excubias agunt, ne quis intra teli jactum accedat. — Uxoris infimorum et mediorum Turcarum in publicum sæpe prodeunt. Sed in eas nemo peregrinus, si tutus esse velit, vultum convertat. Neque tanto timore dignum præbent spectaculum. Ex omni enim vultu nihil nisi oculi et os apparent. Reliquum caput linteo obvolutum est, ut adeo in hortis nostris egregiæ avium formidines essent. — Hæc de rebus Constantinopolitanis. —

JANUS DOUSA JACOBO FILIO

P. S. D.

Homines ingrati qui sint et habeantur, tibi incognitum esse non potest. Meministi quam pulcre et subtiliter de hoc vitio disputet Socrates apud Xenophontem. Hæc vobis pueris olim quum explicarem, et vos Socratis orationem magnopere laudaretis, libro seposito, quam potui accuratissime ostendi, quæ liberorum essent officia, ut erga parentes quam gratissimi nominari possint. Quum dicendi finem fecissem, vos omnes verbis meis commotos non sine voluptate videbam; quæ non mediocriter eo aucta est, quod ultro mihi omnes pollicebamini, vos per vitam vestram id acturos, ut et Socratis et mea præcepta sancte servaretis. Cæteri fidem servarunt. Tu violasti. Sæpius te et ego et mater tua lacrimantes admonuimus, et te per fortunas tuas oravimus, ut vitam istam liberam et disolutam emendares. Tu vero laudas et probas meliora, deteriora autem sequeris. Cauponas quotidie invisis, strenue potas, alea ludis, ut unum tantum desit, quod tamen plenumque sequi solet, vita scilicet impudica. Quænam, obsecro, est, quam tu inde tibi percipere videris, voluptas? — Quibus sermonibus, dum vino vobis nondum excidistis, delectamini? Evadisne iis doctior et melior? Jam quid alea perniciosius, quid indignius? Animus tuus unice est ludo intentus, et spe, metu, et expectatione agitat, omni caret tranquillitate. Non enim curas
ve-

vestras et cogitationes in cauponis tu et focii tui, relinquitis. Imo hæ vos domi, hæ foris, hæ vigilantes, hæ dormientes sequuntur. Fratres interim tui magna alacritate bonis literis student. Illi gaudio mihi sunt et honori, vitamque agunt honestissimam; quotidie discunt aliquid et agunt, quod tacitam juvet conscientiam; ut jam nunc perspicere possim, quales illi olim cives sint evasuri. At tu nec tibi nec mihi, nec patriæ consulis. Compara quæso, tecum fratres tuos. Vide quantum illis pietate, mei amore, cætorisque virtutibus sis inferior! Hæc si attente cogitaveris, non te ita malevolum aut pertinacem futurum credo, ut vitæ te tuæ non pigeat pudeatque. Adhuc iudicis personam gessi, nunc audi patrem, fidelissime tibi suadentem. Domi habes exemplum, quod sequare; idque eo facilius, quo magis quotidie ante oculos esse tibi possit. Deinde amicitia illæ tuæ non usus remissione disfluendæ, sed plane discindendæ sunt. Hinc, mi Doufa, ut sæpe jam dixi, caput tuorum erratorum, et nostræ sollicitudinis. Hoc unum si feceris, et me in posterum tibi consulentem audieris, omnia quæ imprudens commisisti, tibi ignoscimus; et hic, quem ex te percipimus dolor, amoris erit integratio. Age itaque, errata ætatis tuæ vita meliore emenda. Et, si te novi, emendabis idque et tua ipsius, et parentum, et fratrum tuorum causa, qui te omnes, ut se ipsi, amant. Vale.

JA-

JACOBUS RYKIUS GULIELMO PRINCIPI
S. P. D.

Quam injuste exiliq multatus sim, et tu, et omnes, qui Batavi magis sunt quam Hispani, perspicitis. Civibus tamen meis hanc injuriam ignosco. Quod si enim severius et cupidius quid faciant, faciunt, illud partim timore, partim officii quadam opinione. Hispanis non ignosco, imo eos, tanto odio persequor, quanto ii digni censentur, qui optimam nationem decipiunt, opprimunt, et vexant. Quare, quum tu in patria nostra liberanda sis occupatus, et pecuniæ inopia laboraveris sæpe, misi ad te hanc pecuniæ summam, qua si consilia tua aliquantum adjuvero, magnopere erit quod læter. — Bene vale.

JACOBUS RYKIUS UXORI CARISSIMÆ
P. D. S.

Varii rumores ad vos perferuntur, ut scribis, sed sine iis auctoribus, quibus fidem habeatis. Sæpe jam me occidis se aut captum esse ab Hispanis nuntiatum est. Unde metus et sollicitudo tua tanta est, quantus in me amor tuus. Ego quum te in his miseriis vivere cogitem, et orbatos quasi patre liberos mihi proponam, maximo dolore cruciatuque afficior. Quam caros enim vos semper habuerim, dicere

cere non attinet. Sed civis sum Batavus, et patriam amo ac diligo, quæ una uxorum, liberorum, propinquorumque caritates complectitur. Itaque quod huic præsto, vobis præsto. Nec tu tam parvi animi es, quæ otium et salutem publicam privatæ non anteponas. Exsilium itaque meum forti et constanti mente perfer, liberis nostris, ut facis, prospice, et si curis aliquando per te resistere non poteris, præcepta ex sacris literis pete, quibus semper magno-
pere delectata fuisti. Consolabitur et te pater tuus, homo insigni pietate et tali animo, qualis ab ætate ejus vix ac ne vix quidem expectari possit. Ego quamquam mortem timere dudum destiti, tantum mihi cavebo, quantum me pietas et officium jubeant. Famæ ne nimis credas. Inimici enim mei ista, quæ volunt, spargunt, quæ nolunt, tacent. Quæ gessimus a patre cognosces. Vale uxor carissima, et me prorsus animo esse bono et confirmato puta, si tu sis.

JACOBUS RYKIUS PATRI SUO.

S. D. P.

Res nostræ sic se habent. Nuper ex Anglia, quo ut scis Briela contenderam, Vlislingam veni. Londini duorum Hispanorum opera adjutus sum, et multos cives, patria carentes, suscepi. Ibi comes Leicestræ, quo meliorem aula adulatorem vidit, neminem gratiam reginæ captans, nomen meum, cujus criminis ipse videat, detulit. Dies dic-

dictus. Ego quid facerem diu dubitavi. Sed causa fidens, reginam adii. Hæc amice mecum decapta a nobis Briela, et de Gulielmo collocuta est. Deinde, ne in Anglia quidquam turbarum, atque inde me quam celerrime reciperem, admonuit. Itaque Vlisfingam petii. Inde præsidia a civibus erant ejecta. Horum animos adventu meo mire confirmavi. Venit et eo cum navibus aliquot, Petro Pacieco, homo in exercitu Albani magnæ auctoritatis. Is omnium rerum, quæ gerebantur, erat ignarus. Quem ut e nave egredientem procul vidi, statim adii. Ille contra, me salutandi causa id facere ratus, obviam procedit. Interim magna hominum undique confluentium turba cinctus, ex horum vulgû et gestibus, quæ sint, comperit. Itaque ignarus quo se verteret, aut quid faceret, anulum de digito detrahit; eumque osculatur, deinde mihi magna cum honoris significatione tradit, seque mihi se dedere, dixit. Ego in vincula eum conjici jussi, ut a plebis furore defenderem. Sed animi sunt atrociores, quam ut Hispano parci possit. Itaque jam pendet. — Brevi civitates vicinas liberare conabimur. Tu per me omnia scies, quæ putabo te scire oportere. Merentur illud cum virtus tua et constantia, quæ nisi ætas prohiberet, signis te et castris ostenderet, tum prudentia et consilium, quibus domum meam ita regis et constituis, ut ipse pater melius non possim. Vale. —

JA-

JACOBUS RYKIUS CARISSIMO PATRI.

S. D. P.

Narro tibi, carissime et optime pater, vivo. Quum fortasse et tempus et ratio dolorem vestrum jam diminuerint, ecce vobis, quasi ab inferis excitatus, redeo. Omne autem illud tempus, quo vos falso rumore decepti, me ut mortuum luxistis, ita vixi, ut sociorum sæpe fortunas laudarem, qui in proelio, in quo captus ab Hispanis sum, honeste occiderunt. Nunquam equidem cogitavi, hominem tot misérias et calamitates perpeti posse, quot ego perpesus sum. Et tamen vivo, et sensim convalesco. Medici, nisi bene confirmatum, me abire non ferunt. Cis paucos dies tamen id fore spes est. Quæ mihi evenerint, ubi fuerim, quando rediturus sim, brevi a me cognosces. Vereor enim ne nunc animus a dolorum commemoratione nimis abhorreat, et sic vulnera recrudescant. Tu suavissimam uxorem, et liberos carissimos de me prudentissime admonebis, ne subita lætitia opprimantur. Vale optime pater, et me, ut quondam, ama: —

JACOBUS SIMONIDES RYKIUS PATRI SUO.

P. D. S.

Vos valere et cupide me expectare, ex literis tuis cognovi. Ego ambulando, abstinendo, quiescen-

C

scen-

scendo, pristinam valetudinem recuperavi. Ab altera tamen capitis parte surdus sum. Sed hæc quomodo acciderint tibi narrabo. Mondragonius, homo fortissimus, in Zelandia, non procul ab urbe Thola, nos in fugam conjecerat. Multi meorum præfectorum cecidere; ipse graviter vulneratus, et multitudine protrusus, in aquam me immisi, et nando evasissem, hanc enim artem pulcre calleo, nisi vortice fuisset correptus. Quod ubi videbant hostes, me vivum etiam ceperunt. Ex vultibus eorum lætitiā videre mihi videbar, quam ex hac re percipiebant. Mors crudelissima erat ante oculos. Primum Antwerpiam, inde ad arcem Vilvoordanum, et brevi post Gandavum deductus fui. Gandavi in publico carcere est locus, quæ Sedes imperatoris appellatur; adeo angusta et humilis, ut erecto corpore stare non potuerim. Eo nullum intrat diu lumen, quo tristitia captivorum non mediocriter augetur. In has ego tenebras dimissus, septem menses consumsi. Nulla spes erat fugæ. Gravissimo catenarum pondere manus et pedes coercerantur. Noctes atque dies custodes ad fores stabant. Et hæc quidem erat crudelitas. Sed vide quam isti crudelitati, in captivis vexandis accesserit ingenium. Eligendum mihi erat unum cibi et potus genus, quo, sine ulla varietate, miseram vitam ducerem. Ego, qui subito terrore vix apud me eram, vitulinam et vinum quoddam tenue elegi. Quantopere jam stomachus ab his fastidiat, et aures etiam a commemoratione abhorreant, dicere vix possum. Quoad vivam, cavebo, ne hæc videam, multo minus edam. Ut tenebrarum saltem moerorem
evi-

evitarem, lumen in carcere accendi. Id curabant custodes, in hoc saltem humani. Sed vellem omne illud tempus in tenebris egissem. Hujus enim luminis vapor, angustiis loci inclusus, adeo aures affecit, ut jam una nihil omnino audire possim. Cæterum animum nunquam omnino dimisi. Quum te, uxorem, et liberos cogitarem, ingens me dolor invasit; quem lacrimando levare frustra sæpe tentavi. Lacrimari enim non poteram. Quæres quibus me rebus consolabar? Quotidie sic mecum: Mors omnium malorum est finis. Hanc Hispani, invito Deo, negare mihi non poterunt. Hæc, etiamsi liber in patriam rediero, et deinde cum uxore, liberis et propinguis aliquamdiu vixero, tamen est fubeunda. Quod quam breve forte erit? Sed sit sane longissimum? Quid est omnino longum, in quo est finis aliquis? Itaque solam æternitatem, et communem illum hominum patrem ac judicem, Deum, tibi propone. Ille, quem nihil rerum humanarum latet, novit, qua mente quo animo arma ceperis, et quo jure quave injuria, in tantas ab Hispanis misérias sis demissus. — Ille omnibus, quæ in patria tibi sunt carissima, pro incredibili suo amore, prospiciet. Sed quum eo cogitationibus pervenissem, nescio quomodo istis consolationibus, quem dixi, dolor repugnaret. Quare interdum optabam, ut, qui ex meo interitu cruciaretur, haberem neminem; nec tales præferim, qui cariores mihi sunt, quam ipse sum mihi. Sed profecto omnia Dei Consilia sunt sapientissima. Nunc enim dolor iste, quum vobis redditus sum, pari lætitia compensatur. — Hispani, quum vide-

rent me malis non succumbere, et corpus etiam ab animo vires accipere, mortem minati sunt, nisi Gulielmum defererem, idque jurejurando confirmarem. Ductus igitur in locum editum, ubi fontes supplicio affici solent, duo commilitones meos, capite abscisso, jacentes vidi. Ego, quamquam tota mente atque omnibus artubus, contremiscerem. „Vos, quid faciatis, videte, respondi. Ego qui, dem a causa, quam tueor, nunquam discedo.” Interim varii e multitudine, quæ confluxerat, audiebantur rumores. Supplicium prolatum est. Brevi post, Gulielmo operam dante, et omnia conante Mondragonio, cujus magni intererat, ut ego liberarer, jussu Albani mihi, quo vellem, eundi potestas data est. Hæc ad te accurate perscripsi, carissime pater, quorum omnium uxorem facere certio-rem non attinet. Nosti hujus ingenium. Vos me nono abhinc die videbitis. Ego si te aut uxorem aut liberos vel medio in foro videro, vos exosculabor. O beatum diem! quanto teneor desiderio. Vale. —

FLORIS MONTIGNIUS P. S. D.
GULIELMO PRINCIPI.

Quæ de rerum statu cogitasti, quæ est prudentia tua, vere cogitasti; eaque, nisi caveamus brevi eventura suspicor. Philippo, quum nuper in Hispaniam a Margaretha essem misus, omnia, ut erant, exposui; populum esse offensum, edicta sua non pro-

probari; milites suos, quos se hinc deducturum promiserat civibus graves esse et molestos, ærarium exhaustum, Granvellam superbia et dominatus cupiditate omnibus invisum. His malis ut prospiceret; et pecunia nobis succurreret, petii. At bona verba dedit, pecuniam non dedit, nec de cæteris quidquam præstitit. Non curat nos Philippus, quibus ingentes pecunias abstulit, easque in suum ærarium intulit. Ille nobis deesse cives arbitrans, quibus nos credamus, barbaris summas potestates dedit; et isti homines nos velut imbellem populum despiciunt, ridentes, se Batavos credulos tam pulcre circumvenire. Hoc videt Philippus. Videt autem? imo etiam, dum tacet, probat et laudat. Nos, dummodo ipse vivat et regnet, nullo habet numero. Rem sic se habere tu multo ante dixisti, quo tempore fidem tibi negavi. Nunc, quæ non audiui, non ab aliis accepi, sed ipse vidi, non possum non credere, et summo opere indignari. Quare me ad consilium vestrum libentissime adjungo, nec, quantum a me fieri possit, unquam vobis deëro. Vale et me ama. —

FLORIS MONTIGNIUS P. S. D. COMITI
HORNANO, FRATRI CARISSIMO.

Scripsimus nuper ad Margaretham ego, et alii, qui nobiscum faciunt, satrapæ, nos a severitate edictorum Hispanorum abhorreere, eaque patriæ nostræ perniciose arbitrari. Deinde, nisi Philippus

C 3

ali-

aliquantum remittat, nos muneribus nostris abdicare decrevimus. Cui enim bono hæc gerimus? aut quam inde utilitatem respublica capit? Hispanam dominandi libidinem, et vim adjuvare debebimus. Unum, quod ab isto proposito nos deterreat, est, quod alia mitigare, ad alia connivere possimus. Sed cavebit hoc illud impuri hominis odium, quem malitia sua tam lynceum reddidit, ut nihil fere sit, quod non perspiciat. Hic nisi se in Hispaniam recipiat, timeo quo tandem hæc simultates sint erupturæ. — Vale.

FLORIS MONTIGNIUS COMITI HORNANO
P. S. D.

Dolui quod convivio nostro, quod obire diligenter soles, interesse non potuisti. Coenabamus apud Gosparum Schetrium. Amici frequentes aderant, et ad multam noctem una fuerunt. Omnium animi ad lætitiā et hilaritatem erant compositi, et, quod dictu mirabile, his temporibus ridere potuimus. Hoc faciebant minuta vini præstantissimi pocula, quæ vacua sæpius, quam plena conspiciebantur. Gulielmus noster hic etiam Nestorem retulit. Orto de Granvella sermone, isque a malis ad ova duravit, alius alia ejus vitia enarrare, ut avaritiam, libidinem, dominandi cupiditatem, superbiam.

Tandem omnes in eo convenimus, ut, quanti illum faceremus, publice ostenderetur, idque ratione

ne

ne ridicula. Sententiis divisis, Egmondanum, qui et magisterium tenebat, ad convivos referre iussimus. Hujus hæc fuit sententia, ut servi cujusque atris vestibus essent induendi, eæque in dextra brachii parte stultitiæ galero variandæ. In hanc omnes pedibus ierunt. Itaque brevi Granvellanum deridendum dabimus, ut a prætereuntibus digito servi nostri monstrantur, et dicatur: „Hic ille est.” At hæc ad se pertinere dissimulabit. Dissimulet sanè. Cives autem hoc factum vultibus probabunt, et ad eum referent, ut adeo, quum tacent, clament. Granvella enim nulli non odiosus est. Quare admiror hominis incredibilem audaciam et impudentiam, qui, quum hæc videat, discesu tamen suo malorum stirpem et semen non tollat. — Vale, et quam potes, celerrime ad nos redi. —

FLORIS MONTIGNIUS P. S. D.
GULIELMO SUO.

Ego si detestabili facinore patriam prodidissem atque omni scelere dilacerassem, merito tanta cura et tam infeste servarer. Nunc, quod eidem patriæ, quantum potui, prodesse fuerim conatus, hæc patior. Quid de me fiet, nescio. Sed vereor ne in patriam unquam sim rediturus, atque adeo suspicor fore, ut brevi sim cum fratre carissimo. Hujus miserandum interitum ex rhapsodiis mendicantium Batavorum cognovi, qui mihi industria illud egisse videntur, ut ego certior fierem. —

Sæpe enim carceri meo adstantes, eadem nostro sermone recitabant, et redeuntes iterabant. Quare e carcere tentavi fugere. Sed frustra. Unus custodum, habeo enim octo, pecunia a me jam erat corruptus. Hic rerum, quæ agebantur, certior me fecit per epistolas, pani insertas. Nactus eram limas, quibus cancellos ferreos perfringerem. Habebam funes, quibus pro scalis uterer. Sed subito omnia patefacta. Panis, in quo latebat epistola, errore ad alium perfertur. Is rem detulit. Id nunc infestius servor. Modo servus meus non mediocriter timorem meum duxit. Coenam parabat vultu tam pallido et tristi ut nihil supra. Manabat sudore. Tremebat toto corpore. Ego, rectene se haberet, rogavi. Lectum modo se conferret. Ipse mihi prospicerem. At ille præ lacrimis nihil potuit respondere. Ex singultibus tamen hæc mihi verba deprehendere videbar. „Maleficus Proditor.” — Hæc quid sibi velint non intelligo; sed illud intelligo, mortem mihi instare. Vale et me ama, —

FLORIS MONTIGNIUS, CIVITATIS BATAVÆ
LEGATUS AMICIS SUIS LONGE
CARISSIMIS P. S. D.

Has literas quum accipietis, ego, ille legatus et tutus scilicet hoc jure, jam periero. Mortem venis concepi. In cibo, quem mei ipsius servus mihi apposuit, sed metu et misericordia amens, latuit

vc-

venenum. Dominum suum necare iussus est. Diu dubitavit credo, utrumne suam salutem meam postponeret. Sed quid de mea salute loquor, quæ forte unius horæ fuisset ad vitam accessio? Itaque laudo ejus consilium. Quod si enim ille non fecisset, mille Hispani, qui facere vellent, ultro se obtulissent. Forte etiam morientis Montignii spectaculo frui voluisset Albanus. Quod mihi etiam miserius. Hoc enim tetrius et detestabilius monstrum aut prodigium usquam esse aut fuisse suspicor nullum. Ille ut omnium scelerum dux atque auctor est, sic etiam hujus. Ille me vetulæ matri, ille conjugii, ille liberis, ille patriæ, ille amicis ademit; idque veneno, causa indicta, in carcere Hispano. Utinam publice in patria mea ad mortem ductus, et eo loco, quo sacra illi fiunt quotidiana, securi essem percussus! Civium adspectus animum mihi prius adderet, et Hispano gladiatori omnia facinora sua, quibus divina atque humana jura violavit, exprobrarem. Sed hoc cavit mens illius provida. Itaque in carcere lenta et inhonesta morte occumbo, et animum sensim exeuntem sentio. O facinus indignum et impium! Bis mori mihi videor, quod ab Albano morior. Sux illæ bestię, quas, quam ipsa natura, crudeliores reddidit, me dilacerassent vellem, modo ne ipse. — O felicem Therāmenen, felicem Socratem, felicem Julium Canum, felicem Pætum! Illis amici, huc uxor, aderat. — Me qui consoletur nullum habeo. Me autem ipse consolari nequeo. Sed dent mihi Albanum. Ille, qui vulnera fecit, eadem sanaret. Hoc enim habere solatium, quod mecum periret. His eum ma-

nibus dilacerarem, pectus reciderem, ipsum cor dentibus arroderem. Hoc in figura hominis immanitas belluæ meretur. Sed quis horror omnes artus occupat? O incredibilem doloris vim! Manus officio cesfant.

Tandem febris paulum remisit; sed, opinor, ut mox impetu majore, eoque extremo sit reversura. Jam, quum apud me sim, eorum, quæ de Albano scripsi, fere pudet. Hæc mihi injuria et vis morbi, non ingenium meum aut voluntas expresit. Ille ego sum, qui hostibus etiam capitalibus ignoscere possum. Quamquam cui ignosco? Illi, qui, si id audiat, sensum humanum induat, et cæde infontium desistat, nec potius novo furore inflammetur? At si misero homini mentem atque consilium Deus eripuerit; si se sacerdotibus suis non ducem, sed comitem præberet, si denique suum esse officium censeret, homines religionis ergo veneno occidere? Causa honesta, nisi leges violaret, cives ferro igne et veneno deleteret, et nihil neque divinum neque humanum pensi haberet. Hæc, tu Albane, religionem appellas? — Sed de his olim videris, quum a te Deus factorum tuorum rationem exiget. Ego, quod in me commiseris, tibi ignosco. Hanc vocem, ut vere atque ex animo ederem, tandem evici. Evicit ille Christus, qui omnibus contumeliis vexatus, omnibus doloribus cruciatus, tandem demisso capite e cruce prospiciens, inimicis suis ignovit, et Deum, ut ignosceret, rogavit, quod, quid facerent, nescirent. Et hoc ille fecit, qui nullius sibi culpæ erat conscius. Ego, qui sæpe et multum peccavi non
fa-

facerem? Sed artus frigore rigent; tenebræ oculis offunduntur. Vos amici valete, et si me amatis, ut facitis, desiderium mei vos a liberanda patria nunquam abstrahat. Valete. —

PETRUS ADRIANIDES WERFIUS P. S. D.
GULIELMO.

Quæ rogatu tuo a me facta sunt, brevissime scribam. Plures ad me exsulés venerunt, quam aut ego aut tu cogitabamus. Omnes fere in magistratu fuere. In iis nec majorem virtutem, prudentiam nec studiûm desideres. Operæ pretium est eorum de patria et Hispanorum tyrannide audire sermones. Quare prope est, quod me orationis meæ pudeat, quam subito habui, ut animos scilicet confirmarem. Sed non defugio nimix sedulitatis opinionem, dummodo, quod ad rem pertineat, nihil a me prætermittatur. Pecuniam fatis magnam paratam habuere; majoris spem præbentes. Boni cives a nobis sunt. Qui contra stant, faciunt hæc, opinione magis officii et religionis, quam odio tui. Urbium magistratus in imperio manent amore civium, quod his publica, quam privata forte melius consulere possint. Callide tamen quæ sentiunt, dissimulant. Habent enim collegas, quorum alii aurum patriæ præponunt, alii causam nostram non probant. Hos ad voluntatem nostram facili negotio perducemus; si hunc iis errorem extorserimus. Disceptant quo jure hæc aggrediamur. Fac nullo. Quasi jure cum eo hoste

hoste agendum, qui, quo jure agat, ferat, occidat, ne cogitat quidem. Ego ut istæ pecuniæ dicto die solverentur, vas factus sum. Arma brevi erunt parata. Cis paucos dies tecum ero. Vale et res tuas bene age.

PETRUS WERFIUS GULIELMO P. S. D.

Dulcis est periculorum prætorum secunda recordatio; neque iis solum, qui perfuncti sunt, sed horum etiam amicis, qui æque atque ipsi gaudent, et quibus cum omnia ut secum, audent loqui. Hollandiæ magistratus habuere concilium Delphis. Missus eram cum pecunia, qua militibus Markianis solveretur stipendium. Markius autem, ut nos putabamus, non procul Harlemo habebat castra, ut vero tum cognovimus, ab Hispanis in fugam erat conjectus. Secundo a Leyda lapide subito Hispani nos adoriuntur. Milites, qui custodiæ loco nos comitabantur, resistebant fortiter. Ego in curru eram. Auriga, qui frena tenebat, vulneratus dejiciebatur. Ego unum ex custodibus nostris, precibus, vi, promissis, coegi, ut, frenis arreptis, currum Leydam dirigeret idque omni usque celeritate. Eo salvi pervenimus. Risisset profecto Hispani, si hac præda potiti, id nobis eripuisset, quo pluribus locis, quam aqua et igni, opus est. Nunc, quum pecunia nostra non possint, spe, quam de ea conceperant, se alant. Vale. —

PE-

PETRUS WERFIUS LAZARO MULLERO,
MILITUM PRÆFECTO S. D. P.

Ex quo curandis exercituum alimentis fui præfectus, magnam adhibui diligentiam, ut militibus bene prospiceretur. Magni etiam interesse reipublicæ putavi, ut in omnibus me parcum pecuniæ præberem. Sed magno cum dolore meo vidi, hanc parsimoniam aliis peccandi occasionem præbere. Quod cum ipsis turpissimum, tum patriæ perniciosissimum est. Hos tu certiores facias velim, me fraudis suæ esse conscium; eosque meo nomine admoneas, ut, quæ furati fuerint, dicam enim quod res est, partim ære suo, partim majore in fungendo munere diligentia, restituant. Si secus fecerint, nomina illorum furti deferam; et sic severissime in se animadversum iri credant. Vale. —

JANUS SECUNDUS PETRO CLERICO
P. S. D.

Amicitia nostra corroboratis aliquantum et confirmatis utriusque ingeniis et ætatibus constituta est; tibi forte tempestiva, mihi sera. Eadem a teneris unguiculis inter nos fuisset vellem. Pilæ et trochi una a nobis fuisset depositi, amor mansisset; isque vetustate dudum eam nactus fuisset suavitatem,
quam

quam nunc percipere incepimus. Ab eo autem inde tempore nihil fecimus aut cogitavimus, quod alter cum altero non communicaverit. Primum tamen ætatis meæ actum notiozem tibi reddam; cum quod tuam mihi pueritiam prior exposuisti, atque idem jure tuo a me postulare potes; tum quod libentissime hanc mihi ætatem in memoriam revocare soleo. Videbis etiam hinc summæ animorum et studiorum consensionem nostræ nihil unquam defuisse. — Majus mihi supererat otium, quam ut hoc omne ludo tribuere possem. Itaque temporis fallendi causa excogitabam varia; nunc pingebam, nunc ex cera aut argilla fingebam imagines, nunc sculpebam, et, ut varium est puerorum ingenium, multa aggrediebar, nihil perficiebam. Nulla itaque in re acquiescere potui. Sentiebam tamen existere aliam quandam rationem, qua tempus utiliter et jucunde collocari posset. Alios sæpe legentes aliquid aut scribentes videbam. Ego aliquando sic mecum: Quæ tandem est ista voluptas, quam illi percipere sibi videntur? Quid? Si et ipse hujus periculum facerem.

Feci, et dictu incredibile, quod subito mihi hinc exortum sit gaudium. Primum tamen, ut uni libro ad finem inhærerem, vim aliquam inferre mihi debebam. — Inprimis delectabar itinerum descriptionibus, brevibus historiis et fabulis; credo, quod harum rerum argumenta animum non ita poscant intentum. Interim non solum has, quas dixi, horas, sed etiam ipsas, quas ludo tribuebam, ad legendum mihi fumebam. Res miras et novas sociis narrare gestiebam; neque eo gaudium mediocriter crescebat. Imo ip-

ipſos ad legendum incitabam. — Deo autem maximas ſemper ago, atque habeo gratias, quod talem mihi parentem dedit, qui non corpori tantum, ſed animo etiam optime conſuluit. Hic enim diſcendi meum ardorem prudentia ſua et monitis ita rexit, ut ex eo maturos fructus perceperim. Hæc adhuc eram. Latinas literas nondum cognoveram. Ad has diſcendas, quod et patris voluntas et animus meus ferebant, in ludum miſſus, eum me præbui, ut magiſtris probarer. Hic tamdiu didici, quoad me, quantum profeceram, non poenitebat. Cæteris hunc ſtudiorum curſum celeriter perfeciſſe videbar; mihi, ſi hunc amore meo literarum Latinarum metiar, lente ſatis. Præceptoribus uſus ſum talibus, quales qui nanciſcantur, beatos prædico. Mira in omnibus comitas et humanitas, eadem gravitas; ſummâ literarum Græcarum Latinarumque ſcientia. Erant in omni ſermone copioſi et ſacundi; omneſque mihi elegantias et, quæ propria ſibi quæque habet lingua, tam perſpicue exponebant, ut ſemel audita non facile oblivicerer. Quum itaque de Latinis literis judicare poteram, continuo optimos quosvis auctores legi; poëtâs inprimis, his enim ſemper magnopere fui dilectatus. Quotidie itaque Catullum, Tibullum, et Ovidium, et præfertim Propertium legebam. Sunt enim cæteri ſuis quidem quique meritis ſpectandi, tamen Propertius neſcio quam varietatem ſuavitatemque habet, qua ad ipſam naturam proxime accedit. Horum lectione quum ſtylum formaveram, ipſe interdum componebam aliquid, quod, quibus oſtendebam, diſplicere non videbatur.

Ab

Ab eo inde tempore, ut tandem de me ipso dicere desinam, hanc artem in delitiis habui, quod in rebus adversis tribuat mihi solatium, in secundis lætitiā; quod domi delectet, non impediāt foris, quod denique mecum rusticetur, peregrinetur, (*) equitet. Habes, Petre, quæ a me petisti. Laudem in poëtica tantam mihi tribuis, quantam ego nec agnosco nec postulo. Itaque, quomodo poëta factus fuerim, brevius exposui, ne tuæ de me opinioni fidem habere viderer. Vale.

JANUS SECUNDUS P. S. D. FRATRI
HADRIANO.

Parisiis bene vivimus. Mira est omnium humanitas. Certatim se viæ duces offerunt, ut digna visit ostendant. Quotidie ad coenam aliquo est promittendum, ubique laute nos invitamus. Feminae hic Romanas magis quam Græcas imitantur. Freqventes enim conviviis adsunt, nec minus honesta forma et elegantia, quam ingenio et artibus eminent. Saltant commode. Canunt pulcherrime. Hoc acroamate in coena nihil dulcius. Quod, si audisset Nepos, ne anagnostas quidem Attici sui jucundiores arbitraretur. Equidem, sic coenans, Jovi cæterisque Diis, nec Apollinis citharam, nec Musarum vocem invideo. Sed hujus meæ voluptatis magna pars interiit, si, quod mirum tibi videbitur, in ele-

(*) Equitet.] Artem enim equitandi in delitiis habebat Secundus. Et multas Elegias equitans meditatus est.

elegans, urbanum, et bellum hominum genus inciderim. Hi se omnium primos esse volunt, nec sunt; omnique studio et industria id agere videntur, ut nihil agant. — Sed quænam in rebus humanis est tanta voluptas, cui non aliquid, quod nolis admixtum sit? Horum adspectu si carerem, vos autem adessetis, vix dubito, quin, quod optarem superesfet nihil. Sed si quis Deus hæc largiretur, alia fortasse cuperem. Itaque hæc ut possumus, ferenda; Cotili Parisienses non sine risu, vestrum desiderium moderate, et ut decet veros amicos ac fratres. Omnes a me saluta. Vale. —

JANUS SECUNDUS HADRIANO
FRATRI.

Jterum scribo; adolescentis istos nimia humanitate importunos, molestos et ridiculos arbitror, quamquam tu horum causam suscepisti. Ego omnino liberalis hominis censeo, in vestitu elegantem esse, et omni diligentia affectare munditiem; in moribus etiam suavitatem quandam et humanitatem probō; his vero virtutibus si quis abutatur, hinc bina nascuntur vitia quæ vix in femina, nedum in viro feras. De vestitu quidem quem meliorem Ovidio mihi arbitrum dabis. Et ille,

Forma viros neglecta decet.

Nec dissentiant Græci. Isocrates enim, cum alia præcepta utilissima, tum illud Demonico dedit: *ἵναί βούλων τα περὶ τὴν ἐσθῆτα φιλοκαλός, μὴ καλλωπίσης.*

D

At

At quid belli isti homunciones? Omne ingenium ad curam vestium referunt; et quum nihil habeant, quo se a civibus suis discernant, nisi novo earum genere, hoc sæpissime permutant, simulac alii imitentur. Ab urbanitate non sum alienus. Imo hanc amo, et gratum vitæ condimentum arbitror. Sed qui ea utuntur, nimia, ut illi, in vita communi se molestos reddunt. Vidi etiam qui alios, a moribus suis paulum aberrantes, deriderent. Quamquam Galli hac in parte aliis mitiores, qui Gallos imitati sunt. Defluxit enim et dimanavit ista vivendi ratio cum ad alias, tum ad nostram nationem; ut adeo Gallia hic Græciæ par dici queat, utraque enim alias regiones suo exemplo formavit. Hæc quidem ingenii et doctrinæ humanitate, illa bene atque honeste vivendi nova quādam ratione. Quid enim est illud quod bene ac honeste vivere appellant? — Culti sunt ad speculum tanta cura, quasi in eo salus patriæ verteretur. Vultu ridenti, incesu varie composito, plerumque adeo celeri, ut saltantes, videre putares. Pulvere utuntur medicato, quem ex acerra gemmis auroque distincta, duobus digitis protrahunt, naribusque mira arte admovent. Omnium rerum, de omnibus enim loquuntur, periti sibi videntur; novarum inprimis et minutissimarum; quas enarrare mira suavitate norunt. Omnibus bene cupiunt, omnibus familiares, potissimum mulieribus, quibus minima et ridicula præstant officia, et nunquam non assentantur; neque ad harum modo sensum et voluntatem, sed etiam nutum et vultum convertuntur;

Quidquid dicunt, laudant, id rursus si negant,
audent id quoque.

ut

ut ait Terentius. Quamquam ille in Gnathonis persona, qui hinc quæstum multo uberrimum reperit. Quod de illis item dici non potest. Hæc si tu sententia tua probes, Hadriane, me causa cecidisse agnoscam. Vale.

JANUS SECUNDUS SUIS FRATRIBUS
ET AMICIS P. S. D.

Suave mari magno turbantibus æquora ventis,
E terra alterius magnum spectare laborem.

At vos non spectatis, sed, quod malignius, ride-
tis. Ego enim dum nimbis, ventis, grandine, et
frigore fere opprimor, et vias coecas equo vixdum
transeo, domi vos hæretis, ibique probe vos invita-
tis. Ad pocula vestra quum „bene Secundum”
dicitis, illé in tugurio aliquo delitescit, et fortunas
suas laudat, si lac sibi et panis contingant; quibus
si ova accedant, apud Lucillum esse videtur. —
Sed veniam in Hispanos, ita (*) Julia vivat, ut me
curabo! Efficiam profecto ut invidia sortis meæ rum-
pamini; et tam pinguis et nitidus domum revertor,
ut me, velut, Ulyssem sui amici, non noscatis;
quamquam ille totos viginti annos Ithacam non vi-
derit, et macie confectus, et pannis et squalori ob-
fusus eo se receperit. Sed probe novi quantum con-
tra corporis mihi faciendum sit. De coeli me varia
tempestate queri, videte sane, modo ne miramini
quare id faciam. Vos domi sedentes, nec injuriæ
aëris

(*) Julia] Est nomen puellæ, quam cecinit.

D 2

aëris expositi, sæpe tamen turrium insignia consulti-
tis, quo se ventus verterit, et coelum adspicitis;
cujus tempestatem et vultibus vestris si adessem,
facile perspicerem. Hæc vos si domi facitis, me,
peregre facientem ridetis? Ego itaque si pecco, vos
gravius peccatis. Sed ridete quam non sim injuria-
rum memor. Vos enim, qui me accusastis, et
eodem crimine tenemini, omni culpa liberabo. Sic
igitur cogito, paucas regiones tantam coeli varia-
tem subire, quantam nostra. Coelum serenum, si
aliquo exeundum, optamus omnes. Hinc de eo sæ-
pissimum cognoscimus. Nec parum nostra interest.
Valetudo enim subita mutatione facere potest detri-
mentum. Quare alii male id nobis vitio vertunt,
quod sermonis initium ab aëre sereno vel nimboſo
ducamus, [quamquam id omnes videmus,] quasi
sermo daeset. Ego id interdum fieri non nego, illud
autem nego, quemquam majore jure hoc facere,
quam nos facimus. Illis potius vitio vertant, qui-
bus aër est lenis, temperatus, et similis. Horum
ego garrulitati hoc tribuo, ut Theophrastus, opti-
mus ille morum arbiter; cujus ἀδολοχης et illud ite-
rare solet, *ὡς ποιήσειεν ὁ Ζεὺς ὕδωρ, τὰ ἐν τῇ νη βέλτιω
ἵσταται*. Aut si, quid dicant, hæreant, et anxie
disquirant, ut amici alicujus tyranni,

Cum quo de pluviis, aut æstibus, aut nimboſo
Vere locuturi fatum pendebat amici.

Hi aut alios imitantes aut sermonis occasionem ab
aëre captantes, ordiuntur; nos consuetudine, quam
ipsa regionis nostræ natura nobis imposuit. Valete
et me amate.



482 D12

482 D12

E P I S T O L Æ

ALIQUOT

EXCELLENTIUM

B A T A V O R U M,

CONSCRIPTÆ

Δ

PETRO HOFMANNO-PEERLKAMP.

GYMNAS. DOCCUM. RECT.

F A S C I C U L U S II.



H A R L E M I,
APUD ADRIANUM LOOSJES, PF.
M D C C C V I I.

LECTORI ÆQUO ET PERITO.

Secundum accipis a me Epistolarum Fasciculum. Sequetur tertius, quo corpus hoc quodcunque finire constitui. Fidem in omnibus, quantum potui, historicam servavi. Sed de his aliisque rebus, quas scire tua interesse arbitror, deinde nonnulla monebo. Errores, si qui ab impresore irrepserint, ut antea jam irrepserunt, emendes rogo. Ipse enim magno locorum intervallo huic rei præesse nequeo. Vale.



JUVENI EGREGIO

FREDERICO WITTEVEEN,

P. S. D.

PETRUS HOFMAN PEERLKAMP.

*O*mnē illud tempus, anni autem sunt fere tres, quo ad literarum tibi Latinarum Græcarumque scientiam via a me est munita, magna cum voluptate utrique est consumtum. Quod discendi laborem tibi reddiderit levem et jucundum, id memoria te repetere, quam hic me narrare magis decet. Mihi quidem omnis tui instituendi ratio tam grata fuit et facilis, ut fortunas meas laudem, si talis ingenii, diligentiae et modestiae multos nanciscar discipulos. Fieri igitur quum aliter non potuerit, quin, hac quamvis ætate, dignus haberere, qui in Academiam te reciperes, hoc

*te Epistolarum Fasciculo donavi, ut publicum
haberes mei in te amoris monumentum. Va-
le, et res tuas bene ac feliciter age.*

Scripsi Groningæ Kalendis August. MDCCCVII.

DE-

DESIDERIUS ERASMUS P. S. D.
GULIELMO HERMANNO.

Ex proximis literis tuis intellexi, te suspicari, me, in luce atque oculis hominum versantem, memoriam tuā depofuisse. Dii boni! quasi quis fui ipfius poffit oblivifci. Quam te enim femper me alterum habuerim, et omnia tua mea duxerim, non negabis. Talem autem amorem locorum intervallo et temporum mutatione poffe, non dicam deleri, fed omnino quidquam deminui! Sed verberationem ceffationis, credo, ifta mihi fufpicionē dedifti. Orta eft enim ex mea in fcribendo negligentia. Neque vero committam, ut eodem a fe crimine accufari deinde poffim. Quæris, an me confilii mei non poeniteat, qui me ex (*) umbra veftra luci expofuerim? Tantum quidem abeft, Hermanne fuaviffime, ut vita nunc vere mihi frui videar, quum libertate fruar. Sint fane loca ifta literarum ftudiis aptiffima, affluant otio, abundant omnium rerum fecura copia, fummu denique in fe teneant bonum, ego

Regnare nolo (†), liber ut non fim mihi.

Ve-

(*) Umbra.] Vixit Erasmus aliquamdiu in monafterio, cum Hermanno. Vid. Vitæ Exc. Bat. pag. 25.

(†) Regnare nolo et feq.] Defumfit ex Phædri L. III. Fab. VIII.

E

Verum enim vero, si rem ad vivum refecemus, loquor enim tecum, ut soleo, omnia aperte, otium et quietem quis, modo velit, sectari non possit? Vita deinde, nulla in re sollicita, nullasque curas agens, vide, an res adeo sit expetenda? Ad religionem quod attinet, quam ut oculos meos amo, si vera sit, ut esse debet, aequè hanc Deo placitum arbitror, sive quis in communi vitæ usu, sive sacris parietibus inclusus colat. Quid autem? An homo sibi solus natus est, nec censet omnium esse officium, asserre aliquid ad communem patriæ utilitatem, ex quo publica salus oriatur? Quanti demum existimas cum aliis esse, horum mores cognoscere et ingenia, ex his suos sibi amicos eligere, hos amare et vicissim amari? Quod quam jucundum et utile? At, inquis, non soli sumus. Ego, quum apud vos essem, navitis nos similes arbitrabar, qui, longo tempore præter spem navigantes, nihil nisi aërem, mare, et socios semper eosdem conspiciunt. Sed fuissent omnes, qualis tu et Cornelius noster, vitam ibi ferendam putassem. Quid multa? Hominum vita mercatui anniversario similis mihi videtur, alii veniunt, abeunt alii; hic emit, ille vendit; alter, isque maxime ingenuus, spectat. Quod ut et ipse facere possem, sedem vestram reliqui, meque in libertatem vindicavi. Quam mentem utinam et tibi dare possem! Sed de his tu ipse videris. —

DE-

DESIDERIUS ERASMUS P. S. D.
CORNELIO SUO.

Et quæ tanta (*) fuit Romæ tibi causa videndi?

Rerum antiquarum aut reliquiarum potius cupido, ex quibus de urbe illa, orbis quondam domina, conjecturam fieri posse cogitabam. Et vero etiam ut ævum mores, quantum possem, cognoscerem. Utrumque enim hunc peregrinandi usum soleo coniungere, atque imitari sapientissimum heroem, qui

Πολλων (†) ἀνθρώπων ἰδεῖν ἀρετὰ καὶ νοῦν ἐγνώ.

Sed Romam vidi, ut dicam, quod res habet, longe opinione mea minorem. Neque illud mirum. Sustinet enim tantam apud omnes expectationem, ut respondere huic forte posfit, vincere eam non posfit.

Ista, quam vere dicere possis, magnitudo est nulla. Urbs magna sui parte diruta, multisque in locis funditus deleta, vim mihi lacrimarum expressit. Lapidés quadrati, antiquis literis incisi, ubique jacentes conculcantur. Aedificiorum reliquæ paucissimæ, et quas vetustas ex omni parte exedere non potuit. Columnæ passim occurrunt eximie magnitudinis, longe lateque disjectæ, quædam non
pror-

(*) Et quæ tanta et seq.] Virg. Ecl. I. v. 27.

(†) Πολλων et seq.] Hom. Odys. A. vs. 3. Horat. Art. poet. — Qui mores hominum multorum vidit et urbes.

prorsus confractæ vel consumptæ vetustate. Hæc ego quum prostrata et diruta viderem, atque ea re amici illius nostri, cuius mors flebilis adeo accidit nobis, desiderio afficerer, sic mecum cogitare coepi: „Heus „tu homo nate, quando familiaris tuus vitam „cum morte commutavit, indignaris, cum urbis, „olim florentissimæ, projectum videas cadaver?”

Ex his ergo rudëribus etiam ego, qui oculos non tam eruditos habeo, de pristina majestate conjicere potui. Atque utinam rerum antiquarum amantes diligentius hæc investigarent; quantum enim hinc lumen doctrinæ elegantiori esset accessurum, tu non nescis. Sed majus est seculi nostri studium, quia major credo inde fit pecunia, in conquirendis sanctorum membris, idque ea cum felicitate, ut hæc facta videantur. Uui enim centum aures et nasos assingunt. Manuum etiam numero plurimi referunt Aegæona (*). Sed misera ridicula. Plebs est barbaris quam Romanis similior, adpectu foeda, sermone varia, disciplinarum impërita, cultu rustica; quippe quae ex omni terrarum parte in hunc locum, tamquam in vetus illud asyllum confluerit.

Nam si ad cives respicias Romanos paucissimi sunt, qui specimen illud pristinae nobilitatis retineant. Gloriam et splendorem militarem, magnitudinem imperii, morum severitatem, vitæque integritatem, tamquam vetera atque aliena despicientes, in luxum, mollitiem, egestatem, insolentiam, atque

(*) Aegæona.] Hic erat centimanus; Homerus II. A. 402. vocat ἑκατογχειρον; Ὡγ' ἑκατογχειρον καλετας εἰς μακρον Ὀλύμπου.

que effrenem libidinem proruperunt. Dignitas omnis in sacerdotibus, quos aut generis nobilitas aut virtus eximia in eum honoris gradum provexit. Hi sunt, qui Romam esse faciant Romam, qualem non virtus Quirini (*), sed sanctitas Numæ fecisse fertur. Cæteros fervorum turbam judicandam putes, quorum alii coqui, fartores, lenones, alii scurræ et nebulones. Hi arcem obtinent Capitolinam, hi Gracchorum, Scipionum, Cæsarum domos habitantes, horum statuas atque imagines fumo, culina, omni squalore deturpant. Sed longius me nescio quis ardor ultra epistolæ modum provexit. In viam itaque. Nescio autem quomodo accadat, ut, si ad te scribam, non scribere mihi, sed tecum esse et colloqui videar. Hinc longas adeo a me accipis epistolas. Tu autem quam diu est quod ad me ne scidulam quidem (†)? Istam negligentiam epistola quam longissima emendabis, aliam excusationem non accipio. Vale. —

D. ERASMUS GULIELMO WARAMO
P. D. S.

Neque ego neque tu phasmata aliquid esse unquam cogitavimus, sed in ea fuimus sententia, in-

(*) Quirinus.] Sic post mortem dictus est Romulus. Numa Pompilius bellum quidem nullum gesit, sed leges, mores, sacra ac templa constituit. Cf. Eutrop. L. I. Cap. III.

(†) Ne scidulam quidem?] Sc. miseris.

inania hæc esse et vana, atque ex metu nostro accipere imaginem. Hanc sententiam quum nuper vidi confirmatam, narrabo tibi (*) memoria quod factum est mea, ut ait ille. Polus hujus fabulæ auctor est et actor. Hujus prædium, ut nosti, non procul Londino est. Ad lævam adium partem via jacet septa arboribus, pari utrimque intervallo digestis. Alterum viæ latus habes alveum siccum, dumis ac vepribus obfitum. E ponticulo iter est in apertam plautiem. Jam pridem per viciniam hujus loci erat rumor, juxta hunc ponticulum esse spectrum, cujus subinde exaudirentur miserandi gemitus. Hujus rumoris, ut dixi, caput erat Polus. Quid enim? Sic hominis ingenium. Hujusmodi commentis aliorum stultitiam ludit libenter. Interea commodum apud Polum divertit Faunus, qui sapere sibi non vulgariter videbatur. In coena ortus est sermo de fabula spectri. Faunus habere fidem et rem velle explorare. Cogitabat enim, ut est homo superstitiosus, animam illic a malo Genio vexari. A coena Polus abit, quasi negotiorum causa. Faunus obambulans de liberanda anima cogitabat. Tandem, quum essent tenebræ, audit miserandos gemitus. Hos Polus mire effingebat, abditus illic in vepreto, adhibita eam in rem olla fictili, ut vox e cavo reddita, lugubrius quiddam sonaret. Faunus se domum proripit. (Polus autem via compendiaría jam anteverterat.) Quid sit, narrat, alia etiam, quæ non ipse, sed timor illius viderat, addit. Adeo oculi trepidi plus vident, quam

(*) Narrabo tibi et seq.] Phædr. L. III. Fab. XI.

quam quod vident. Ego parum aberat quin in risum effunderer. Sed vultus, rogante Polo, in manu erat tenendus. Hic Faunus meus, exorcismo, inquit, opus est, ut hoc monstro miseram animam liberemus. Deinde nescio quos circulos, cruces, notulas, vasa aquæ consecratæ, cerulas; et, quibus plurimum fidere videbatur, verba concepta jactans, cachinnum mihi extorsit. Crasus (*) credo *ἐπελάσας* ille, non se tenuisset. Tanta gravitate et fiducia homo iste de hoc ritu diserebat, ut metum facile ex vultu perspicere posses. Faunus stomachans discescit. Ego et Polus quum soli eramus, illum hortatus sum, ne talem iterum fabulam ageret. Facile enim fieri posse ut hæc populo non placeret, atque ipse exigeretur. Addidi etiam non omnes esse Faunos. Denique ostendi quam non humanum esset homini injicere terrorem, cujus mirram vim esse ad valetudinem perturbandam atque infringendam. Ille vera me loqui agnovit, nec se iterum factum promisit.

ERASMUS AMERBACHIO SUO S.

Brevi suspicor fore, ut migrandum mihi sit ex hac vita. Spes enim, quam nuper medici de recuperanda valetudine concipere me jusserunt, superat nul-

(*) Crasus et seq.] Hic Crasus, Crassi divitis avus, numquam risisse fertur. Ob id Agelastus est vocatus. Plin. L. 7. Cap. 19.

nulla. Itaque si qua curata vellem, esse festinandum. Accepi hanc vocem ea mente qua hominem eumque Christianum decet, nec, quoniam Deus voluit, invitus discedo. — Satis enim diu vixi. Labores et commoda pueritiæ, adolescentiæ, ætatis virilis, senectutis denique omnia percepi, atque ita percepi, ut hospitium hic mihi, non domum esse putaverim. Non hæc nunc dico quasi, ut multi, vitam deplorare videar; imo, si Deus mihi largiatur ut ex hac ætate sanus repuerāscam, idem spatium decurrere non recusem. Ita viverem ut nunc vivere summis viribus conatus sum. Semper, quod Solon ille (*) jubebat, rerum finem respicerem. Quam a simulando et animus meus fuerit alienus, nec hic locus, e quo nisi mortuus non auferar, illud admittat, nosse. Itaque, quæ dicam, veræ sunt. Deum et homines, quoad ejus a me fieri potuit, amavi. Inimicis aut ignovi, aut eos levissima ratione repulsi. Quamquam et hoc factum nollem. Qui me norunt, non frustra me natum existimant. Ita vixi, ita moriar. Errores et peccata, quæ ut homo commisi plurima, spero equidem et confido fore, ut Deus mihi condonet. Tibi maximas ago gratias quod me tantopere amasti et dilexisti. Quæ fieri et de me mortuo, et de pecuniis, rebusque, quibus testamento cavi, harum rerum cura ad te pertinebit. Vale tu, optime Amerbachii, nec cogita, Erasmum mori, sed alios amicos, qui du-

(*) Solon ille et seq.] Herodot. L. I. 32. et seq.

Σοκράτης δὲ χεῖρ πάντος χρημάτων τὴν τελευταίην, καὶ ἀποβιβάζεται. —

dudum abierunt, in viam sequi, tibi autem præcedere. Ave atque vale.

WESSELUS (*) GANSFORTIUS P. S. D.
ODEÆ KLANTIÆ.

Multum profecto iis debemus, quibus vitam, munus illud jucundissimum, referimus acceptam. Hoc autem beneficium non mediocriter eo augetur, quod iidem curis suis et cogitationibus efficiunt, ut munere isto bene recteque uti possimus. Itaque suos quisque parentes summo amore prosequitur, eumque amorem ipsa natura animis nostris impressisse videtur. Sentio enim sentio, quam me occupet quidam affectus, ut eos etiam amem, quos puerulus acerba morte amisi, vultusque eorum sæpe mihi ante oculos proponere gessiam. Sed et tenera ætas et longinquitas temporis omnem e memoria imaginem delerunt. Hæc mecum repetenti lacrimæ interdum oboriuntur quidem, de fortunis tamen me meis queri, nec parentum amor, nec tua benevolentia et liberalitas finunt. Quodsi enim mortuis sit rerum humanarum sensus, gaudebunt certe, curam te mei suscepisse; et gaudere debent. Tanta enim tu me caritate, ut verbo dicam, es complexa,

(*) Parentes Wesfeli mature deceserunt; quare eum matrona quædam præclari et liberalis ingenii suscepit, et una cum filio suo, in iis artibus, quibus humanitas continetur, erudiendum curavit. Peerlkamp Vit. Ex. Bat. pag. 21.

plexa, ut nec parentes mei, credo, majore possent, nec tu tuum ipsius filium.

Verissime adeo, *συ μοι ἔσσι πατήρ καὶ ποτὶς μητήρ* (*). Hæc ne coram tecum effunderem, prohibuit cum pudor quidam juvenilis, tum modestia tua, quæ ad cæteras tuas virtutes illustre accedit ornamentum. Ista, ita vivam, modestia tandem suavit mihi esse audaci, atque omnia tua beneficia accipere.

Hoc olim facere verentem, verbis tu liberalitatem tuam minuisti, fatisque tibi fieri dixisti, si vir bonus et justus fieri studerem. Quod si aliud dies noctesque agam, merito sim ingratissimus. Ingratum autem me non esse ipsa tu judicas. Quod ut vere judices, omnibus viribus enitar. Vale, femina egregia, et cogita, mihi esse optime, si tibi bene sit. — Epistola finita, accurrit ad me Joannes tuus, quem ut fratrem amo, literasque etiam se habere paratas dicit. Commode itaque has uno fasciculo comprehendam. Iterum vale.

WESSELUS GANSFORTIUS MATRI
SUÆ CARISSIMÆ P. S. D.

Non enim sic oportet (†)? Nullum adhuc apertius nomen reperire potui, quo te potissimum insigni-

(*) His verbis ad Hectorem utitur Andromache ap. Homer. Il. Z. 433. *Ἐκτορ ἄταρ συ μοι ἔσσι πατήρ καὶ ποτὶς μητήρ.*

(†) Non enim sic oportet? Respicit ad titulum, *Matri Suæ.*

signirem. Natura non tu quidem mater mea, sed amore, sed pietate, sed consiliis. Quod scire cupis, qua hic ratione vivam, facis illud pro tua mei cura, nec mihi quidquam jucundius est, quam tecum omnia mea communicare. Hæc igitur nunc est vita mea. Primo mane e cubitu furgo, librisque me meis involvo. Tempus enim illud, laudatum magis, quam usurpatum, merito Musis dicitur amicum.

Fessus deinde, non satiat, legendo aut scribendo, corpori aliquid tribuo, et prius quam coenamus, famem ambulatione obsecor. A coena cum amicis sum et familiaribus. Hic ludimus, jocamur, ridemus. Quod reliquum est diei, vindicant sibi literarum studia. Sic unus dies alteri simillimus, ut fluctus placidi fluminis, elabatur. Sic quotidie aliquid addiscens natu major fio. Quod idem de versibus gloriabatur Solon ille (*). Cujus ego sapientiam si assiduo labore possim consequi, præclarissime mecum actum putabo. Non equidem referrem hanc ad leges, ut ille, ferendas, sed ad rem maximi omnibus momenti, religionem. Non equidem hæc ad te scriberem, nisi sensum hic tuum nossem. Sed de his coram, si videbitur. Brevi enim me videbis. Vale et me ama.

(*) Solon ille. et seq] Brunck. Anal. vol. 1. pag. 65.

Γραπκω δ' αει πολλα διδασκομενος. Cf. Cicero in Senecute.

WESSELUS GANSFORTIUS JACOBO SUO

P. S. D.

Quæris à me quid sit, quod tanta, ut ais, diligentia in illud literarum genus incumbam, quæ quid habeant emolumenti futuro Theologo, Philosopho, aut alii cuiquam, perspicere te negas. Excidisſe hæc equidem tibi nollem, sed quoniam exciderunt, hunc tibi errorem, si fieri poſſit, extorqueam. Nulla eſt, mi Jacobe, neque ars neque doctrina ingenuo atque libero digna, quam Græci vel non invenerint, vel cujus ſementem non ſparſerint. Iidem illi multas easque graviſſimas diſciplinas non e tenebris tantum elicuerunt atque inchoarunt, verum etiam ad illud faſtigium evexerunt, ut omnem fere nobis fui conſequendi ſpem ſuſtulerint. Jam vero quis erga gentem tam eruditam non incredibili ſtudio inflammetur? Quis non omnem in id curam convertat, ut eum addiſcat ſermonem, cujus ope ad tantarum rerum uſum pervenire poſſit? Quod ſtudium nobilius juvenem agitet? Quid quod ne indecorum illud quidem ſeni? Vidimus illud exemplo hominis graviſſimi, Catonis, qui matura jam ætate literas Græcas tanto ardore arripuit, ut ſitim diuturnam explere velle videretur.

Nec vero tam ſine mente ille fuit, ut laborem iſtum in ſe ſuſciperet ſine maximæ utilitatis opinione. Atque hæc ille ſenex. Quanto magis ego juvenis? Sed niſi tot tantique hujus ſtudii fructus oſtenderentur, nonne et hoc aliquid eſſe putas, in

re-

rebus secundis habere ornamentum, in adversis solatium?

Quare mirari desine, quod me totum ita his literis abdo, ut in publicum prodeam rarius. Neque vero animi sumus tam abjecti, ut, proposito magnæ utilitatis volûptatisque præmio, laborem perferre nolimus. Quare quæso et tu cum Musis Græcis redi in gratiam, inque earum castra te recipe, quæ aliquamdiu reliquisti. Vale, et res tuas diligenter age.

UTENBOGARDUS S. D.
ARMINIO SUO.

Et si mihi nunquam fuit dubium, quin virtutum tuarum luce atque splendore in certorum hominum aliquando incideres invidiam, tamen, quum quæ gesta apud vos sunt, nuntiatum mihi est, incredibili affectus sum dolore. Semper enim antea cogitavi, fore, ut pietate tua involutus, inimicos, quos eses nactus, secure posses contemnere, teque arbitratus sum loco esse positum altiore, quam ut malignitas te, non dico arrodere, sed lædere posset. Sed fefellit me mea de ingenii humani natura opinio. Nihil enim esse videtur tam præclarum atque excellens, quod invidia non aliquando violet et subruat, quæ tam parum tibi parcat, ut non dolorem tuum, sed interitum cupiat. Velim equidem tecum Amstelodami essem, ut de rebus coram inter nos communicare possemus. Quod quoniam in præ-

præsentia fieri nequit, bono literarum utamur, et quam sapissime scribamus. Quod factu opus tibi sit, pro prudentia tua jam facile vidisti, idemque tibi, ni jam cepisses, dedissem consilium. Cogita quæso, ini Armini, quinam sint inimici tui, quam omnia odio et cupiditati tribuant, nihil veritati, nec te noscant. Si enim noscent, non satis æstiment. Vale, et bono sis animo.

JOANNES UTENBOGARDUS P. S. D.
MAURITIO PRINOIPI.

Talem sorte nactus sum provinciam, qualem nec animus meus nec ætas expectaverant. In armis et in castris militum animos ad virtutum pietatemque oratione mea incendam. Hæc sæpe tubarum clangore et tympanorum sono abruptetur. Consolabor vulneratos, verbis meis obstrepent morientium gemitus; et animus in his rebus non exercitatus, callere debet! Sentio, sentio quam arduum ac difficile opus mihi evenerit; tamen quum et fors, et, ut hoc utar, tua fortis comprobatio, me ad illud vocarint, et res militaris, qua his temporibus plurimum nititur patriæ salus et utilitas, ex meo labore aliquid expectare videatur, nec boni hominis nec civis esse arbitror, munus illud defugere. Imo omni conabor opera, ut in officio quam diligentissimus et dicar et habear. Vale, Mauriti Princeps, et me tibi habe commendatum.

U.

UTENBOGARDUS P. S. D.
DOMINICO BAUDIO.

Quibus moribus in Batavia nostra vivitur! Minimo in sacra disciplina dissensu, qui nec vitam beatam, nec veram hominis salutem adjuvet, odium et invidiam sibi quis excitat eorum, qui regnum aliquod affectant, et, quæ pro veris ipsi habent, ea et alios habere volunt. Tantæne animis istis iræ? At non ita Christus ille, ad cujus exemplum et nos et illi, pro eo ac debemus, mores nostros componimus. Quo quis a mundo inde condito, in omni vita melior et amabilior, quis inimicorum etiam magis amans et diligens? At homo sum, errorique obnoxius. Idem, qui me oderunt. Sed ostendant in quibus errem, mihi que, non vi conviciorum sed veritatis, si possint, persuadeant. Conentur me, ut fratres et Christianos decet, in viam istam suam reducere, non gula obtorta retrahere. — Omnium familiam ducit Rosæus, quem muneris ratio mihi conjunxit, at mea, ut inquit, impietas et religionis contemptus, ita disjunct, ut mecum nec vivere, nec in gratiam redire velit. Atque hæc ille non in quotidianis tantum sermonibus usurpat, verum etiam sacris diebus, idque ex eo loco, e quo amorem scilicet et benevolentiam commendabit, palam pronuntiat, atque in me acerbè declamat. Et is est Rosæus, quem nec dicto nec facto unquam læsi, imò quem amicum meum habui. Fuit enim inter nos, ut collegas, familiaris consuetudo. Hanc, dixis-

dixisse illum nuper aliquis mihi narravit, ideo a se institutam, ut meam de rebus nonnullis cognosceret sententiam. Tantæ autem malignitatis et similitatis hominem esse Rosæum, vix est, quod credam. Itaque saltem nec de eo, nec de aliis meritis sum. Quam enim ad pacem et concordiam omnes semper fuerim hortatus, cumque omnibus bonis esse in amicitia studuerim, norunt illi qui me norunt. Sed

Regium est audire male, cum facias bene.

Animus itaque est hæc, ut adhuc feci, silentio vindicare, sperans fore ut calumnia sprete brevi exolecat. Sin minus, quum personam sustineo publicam, me ab injuriis tuebor. Vides me cum Augusto (*) non indignari nimium, esse, qui de me male loquantur. Sed vereor ne, quod ille, fatis habeam, ne mihi male facere possint.

(*) Cum Augusto et seq.] Sueton. Vit. August. Cap. 51. Tiberio quoque de eadem re sedulo sed violentius apud se per epistolam conquerenti, ita rescripsit. „Aetati tuæ, mi Tiberi, noli in hac re indulgere, et nimium indignari, quemquam esse, qui de me male loquatur. Satis est enim si hoc habemus, ne quis nobis malè facere possit.”

 UTENBOGARDUS LOUISÆ COLIGNIÆ
P. S. D.

In rebus turbulentissimis, meisque maximis miseriis, quarum, quos minime decebat, auctores, hoc habeo solatium, quod tu, optima et gravissima femina, summæque pietatis, me in fidem tuam recipis, nec me audire, publice verba facientem definis. Pari me benevolentia complectitur Henricus tuus, matre sua dignissimus filius. Hujus vestri in me amoris novum dedistis argumentum, quod me, muneri meo renuntiare, atque invidiæ cedere paranti, ab hoc consilio deduxistis, bono me esse animo jubentes, facile enim fieri posse, ut temporum acerbitas brevi mitigetur. Utinam, quæ vestra in me aliosque benevolentia, et in patriam amor, vos sperare facit, essent successa! In præsentia quidem consilium mutare, vobisque adeo parere constitui.

UTENBOGARDUS P. S. D. BAUDIO SUO.

Heri quum summo mane Oldenbarneveldium domi suæ inviserem, offendi eum, non, ut solebat, legendo aut scribendo occupatum, sed oculos humi fixos tenentem, vultuque maxime ad tristitiam composito. Quantus me dolor invaserit, dicere vix possum. Non sine lacrimis optimum senem consolari

F

co-

conatus sum; ipse enim consolatione indigebam potius; et dixi, quæ tum in mentem veniebant, principum in civitatibus virorum sapissime hoc fuisse fatum, ut invidiam virtutum suarum acciperent mercedem; neque animum illi esse dimittendum, sed mentem confirmandam, quæ, ut nullius culpæ, sic multorum de patria bene meritorum esset sibi conscia. Hoc facto, dextris junctis, uterque sic discessimus, ut animus meus, sive timor, mihi præfigere nescio quid videretur.

Putabam enim fieri posse, ut gravissimum senem deinde visurus essem nunquam.

Ut vero hoc mane, quum in aulam veheretur, in custodiam traditus sit, audisse te jam credo. Quod idem ne mihi accidat, fuga evitandum censeo. Quis enim in tantis rerum fluctibus non bonorum solum sed vitæ etiam et salutis naufragium timeat? Tu vale, et me ama.

JOANNES UTENBOGARDUS UXORI
OPTIMÆ ET CARISSIMÆ S. D. P.

Antverpiam, quo me iturum dixeram, salvus et incolumis perveni. Venit et eo postero die Taurinus noster, gravida uxore, quinque liberis, vetula matre domi relictis. Ille, præ nimio forte dolore, quod nullo crimine hæc tam carissima fugere debuerit, ille ergo in morbum incidit, atque brevi post mortuus est. Inscripta etiam animo sunt verba morientis, et semper erunt: „ Mors, inquit,
„ mi

„ mi Utenbogarde, quam fuga vitare putabam, in
 „ exilio hic me occupat. Injurias mihi illatas
 „ temporibus tribuo, et plurimos impetu trans-
 „ verso, non cogitatione huc pervenisse arbitror.
 „ Viro bono, qualis esse semper studui, quam-
 „ quam mors non est acerba, mihi tamen fato meo
 „ est acerbissima. Domus afflictæ atque desolatæ
 „ fortunam vides. Oro te per hanc dextram, per
 „ ingenium tuum, per hujus solitudinem, ut uxori,
 „ liberis, ut matri, sis auxilio; his te virum, pa-
 „ trem, amicum et tutorem do.”

Fidem me hæc omnia futurum dedi, datam ser-
 vabo. Ille continuo moritur. Consilium te meum
 laudaturam, certo scio. Est enim hæc eximia tua
 in miseros omnes, amicos præsertim, benevolen-
 tia. Quamquam et ipsi non ii sumus, qui fuimus,
 fors tamen nostra aliorum comparatione laudari pos-
 se videatur. Omni tu itaque ratione Taurini fami-
 liam levabis. — Me quod attinet, quamquam om-
 ne exilium civi bono est dolori, ita tamen me ip-
 se consolor, quasi qui hoc malo dignum nihil com-
 miserim. Illud dolet interdum te, ista virtute fe-
 minam, ob meas calamitates, in istas misérias esse
 demissam. Sed tu non ea, quæ non omnia sibi
 cum cum viro velit esse communia. Quare majore-
 rem in modum te etiam atque etiam rogo, ut quam
 fieri possit celerrime ac sine incommodo tuo, ad
 me venias. Vale, uxor carissima, teque omni con-
 stantia ad tempora nostra munire perge.

UTENBOGARDO, CAPITI-CARISSIMO,
UXOR P. S. D.

Ex literis tuis et mortem Taurini et animi tui constantiam, cognovi. Equidem nisi a ratione et sapientia contra fortunæ tela peterem præsidium, te viro forem indigna.

Noli putare, mi Utenbogarde, Batavam mulierem Romanæ hic quidquam concedere. Meministi quibus olim laudibus Arriam ornasti (*), quæ, ut narrabas, filio quamvis amisso, matrem tamen agebat, ne mariti graviter ægrotantis morbus hoc vulnere cresceret. Eadem maritum Pætum, Romanam in vinculis tractum, sequebatur. Me, qui te semper, ut nihil fere supra, amavi, me in patria, te in exilio vivere? Imo veniam ad te, ut scribis, quam celerrime, nec me vis aut arma inimicorum facile retinebunt.

Hi omnem dant operam ut te comprehendere possint. Nuper metu fere concidi. Rumor erat te domi tuæ hic visum, in horto ambulantem. Media nocte audio strepitum. Fores vi effringuntur. Adfuerunt subito homines armati. Jubent me latibulum monstrare, ubi se scelus illud abdidisset. Ego quamquam

(*) Arriam ornasti et seq. — Pætus occiso Scriboniano, Romanam trahebatur. Erat adscensus navem, Arria milites orabat ut simul imponeretur. — Non impetravit. Conduxit piscatoriam naviculam, ingensque navigium minimo secuta est. Plinius Ep. XVI. Lib. III.

quam sancte jurarem, te Hagæ non esse, totam tamen domum investigant. At frustratio illis incredibilem attulit dolorem. Mihi carcerem minati sunt. Vides, quanta sit illorum, ne quid gravius dicam, atrocitas.

Quare omnino cave, si me amas, ne potestatem tui facias, etiam si te domum ad causam dicendam arcescant. De familia Taurini nostri, hanc, quantum potui, sum consolata, et opem tuli. Quam avide semper omnem bene faciendi occasionem arripuerim, nosti. Quid itaque hanc omitterem? Quamquam magnopere, ne hic haberem, vellem. Luctum et moerorem totius domus, verbis perscribere nequeo. De his et aliis rebus, plura, ut spero, coram. Quod non longum aberit. Desiderium enim tui vix fero. Quod partim naturæ muliebri, partim amoris meo tribuo. Vale, et si mihi velis prospicere, tibi prospice.

MAURITIUS P. S. D. HENRICO
FREDERICO.

Ex insigni gaudio, quo te scribis esse elatum, rei a me bene gestæ nuntio accepto, tuum in me atque omnem patriam amorem agnosco. Laus militaris, quam mihi quidam tribuunt, delectat me illa quidem; quid enim a re me alienum similem, cujus omnes studio trahimur? Maxime tamen me eadem ideo capit, quod salutem patriæ et inimicorum cladem afferre quasi secum videtur. De for-

tuna, quæ, ut scribis, cum in reliquis rebus, tum præcipue in bello plurimum potest, de consilio et prudentia, quid aut quantum cuique tribuendum, de his ergo quæ rogas, hæc rogare debueras doctiorem. Non enim ego sum tanto ingenio, quanto Lucullus (*), qui in laude etiam imperatoria usus disciplinam non desideravit. Quæ sentio tamen asseram, me scilicet primas et secundas dare consilio, et vix tertias fortunæ. Vere ille,

Nullum numen habes, si sit prudentia, nos te
Nos facimus fortuna Deam (†).

Veterum Dea, quidquid prospere gestum sit, omne pæne suum ducat, equidem hanc non magna religione colo, sed felicitatem vindico prudentiæ, ut sine ea felicitas esse non possit, et si sit, majus sæpe damnum asserat. At veteres rei militaris erant peritissimi. Recte. Suam illi habebant, nos nostram; quæ quanto opere a se differunt? Boni est ergo ducis fingere fortunam, agendo, vigilando, consulendo. Militibus ut liberis suis prospicere, loca idonea tenere, tempora opportuna servare, hostem semper expectare, animum habere vitæ prodigum, hæc bona in ducis, non in fortunæ posita sunt.

(*) Quanto Lucullus et seq.] De quo Cicero Acad. Quæst. IV. I. Sed incredibilis quædam ingenii magnitudo non desideravit usus disciplinam.

(†) Nullum numen habes et seq.] Juvenal. Satyr. XIV. vs. 315.

sunt potestate; quæ equidem omni studio consequi conabor, in hæc dies noctesque incumbam. Quæ si ero adeptus, patriæ auguror malorum levationem. Et quod omen melius, commendatum etiam poetæ antiquissimi versu?

Ἐγὼ δῖονος ἀρίστου ἀμυνέσθαι περὶ πατρὸς ().*

Vale. —

MAURITIUS P. S. D. FRATRI
CARISSIMO.

Audisti forte jam de nova et inusitata ratione, qua Græcorum equum imitantes nostri Bredam ceperint. Hanc tibi expugnationem accurate narabo, ut videas, quam virtus et prudentia fortuna fuerint adjuta. Urbi a rege præfectus erat Eduardus Lanzavechia. Præerat et Geertrudenbergæ. Eo sæpe proficiscebatur operum inspiciendorum causâ. Hoc absente, filius ejus tenebat imperium, patre suo, ut ætate, sic consilio longe inferior. Itaque naves, quæ in arcem vehebantur, neque explorabat, aut levi opera faciebat, nihil doli posse subesse suspicans. Hoc non effugit Adrianum Bergenium (†); fieri enim posse arbitrabatur, ut milites aliquot, sub latibulo cespitum, in arcem de-

(*) Homerus in Iliade.

(†) Adriaan Janszoon van Bergen, —

deducerentur, qui excubias nihil opinantes facile opprimerent. Res ad me defertur. Statim Carolus Heraugierum, hominem fortissimum certiorum facio: Hic consilium probat. Nec mora, se cum septuaginta militibus, quos viritum elegerat, in navem abdit. In media nave erat locus concavus, rectus undique ligno; supra positi erant cespites. Ibi latebant milites. Multum frigoris, magna famines et sitis his fuit ferenda. Paucis enim horis se in arcem venturos sperabant, nec cibum secum duxerant. Nocte ergo media in terram exierunt sui reficiendi causa. Postero die fit Breda in conspectu. Ingens hic instabat periculum. Navis enim invado fluminis hæserat, neque inde emergere, nisi restus recessu poterat. Tantum ergo aquæ influxerat ut milites genibus tenus fierent madidi. Jamque ad arcem pervenerant, quum nescio quo casu rima, per quam aqua influxerat, esset expleta. Quid multa? Navis exploratur. Omnia tuta repertiuntur. Atque ipsi milites Hispani navem, quæ glacie tarde procedebat, funibus alligatam attrahebant. Medio die præfectus arci cespites efferrî iussit; et, quia erat horum inopia, brevi perventum est ad locum, in quo nostri latebant, adeo ut lucem claram videre jam possent. Hos nisi et hic navitæ dolus servasset, actum de iis fuisset. Fessum se ergo opere et longo itinere simulat; pecuniam largitur operariis, qua se invitarent, posteroque die redirent. At ille se clam ad me proripuit, et, quo loco res essent, narravit. Reliqui navitæ interim antliam movebant, ne, si militum exeuntium audirentur strepitus, suspicionem id mo-

moveret. Intempesta ergo nocte socios Heraugierius educit. Excubiæ opprimuntur, reliquum præsidium repellitur. Ego sine mora cum exercitu adsum. Breda capta est. Omnes, qui huic expeditioni interfuere, splendide donati sunt. Censeo enim illud patriæ cum honestum, tum utile, ut cives et milites bene meriti honore ornentur, præmiisque afficiantur, quo aliorum etiam animi ad virtutum amorem accendantur. Vale.

MAURITIUS P. S. D. JOANNI
OLDENBARNEVELDIO.

Cum in reliqua vita, tum præcipue in bello utilissimum semper arbitratus sum, antequam quis incipiat, opus esse ei consulto, ubi consuluerit, mature facto. Neomagum expugnare dudum cupiebam, cogitata tamen celabam, ne, si id hostes resciscerent, urbi auxilio venirent. Exercitum ergo ineunte hyeme in castra deduxi. Deinde, nemine suspicante, magnis itineribus in Gelriam profectus, ad urbem accessi. Bellica instrumenta admoventur. Magna globorum vis in urbem projicitur. Postulavi ut se dederet. Præsidio quamquam male erat, dictum tamen facetum est aliquid. „Me, scilicet, esse juvenem procum, urbem virginem, hu-
„jus me connubium sine magno labore consequi
„non posse.” At vide quam me impigrum dederim procum! quamquam virgo amanti nec blan-

da esfet nec mitis. Sed noveram præceptum magistri illius.

Perfer et obdura, postmodo mitis erit (*).

Munera ergo mihi, non poma quidem ex hortis Hesperidum, sed ferrea, sed ignea, qualia Mars et Vulcanus amant. Sed ne utar circuitione. Plebs, manu facta in curiam prorupit, magistratumque urbem sedere coëgit. Ego rebus constitutis, collocatoque præsidio, discessi. Magnam hæc expugnatio mihi attulit lætitiā. Brevi enim erit, ut, qui in Gelria facere nobis possint negotium, supersint pauci, quos nominis Batavi fama facile cohibere possimus, ut non opus sit armis. Vale.

MAURITIUS IMPERATOR SUMMO RERUM
BATAVARUM MAGISTATUI P. S. D.

Summa vestra auctoritas fecit, meumque perpetuum de singulari cura vestra in omnem rempublicam iudicium, ut magni mea interesse putarem, res eas, quas gesimus, quam celerrime vobis notas fieri. Cognoscetis inde, quod vobis accidet jucundissimum, exercitus vestri præclaram virtutem, et in laboribus ferendis incredibilem patientiam.

Quum Hispani Brabantiae partem, excursibus nostris

(*) Perfer et obdura et seq.] Ovid. Art. Am.

tris apertam, occupassent, eosque glaciem expectare per speculatores mihi esset delatum, ut aut Bredam aut insulam Tholam subito impetu invaderent, ego non expectandum esse ratus sum, donec illi cogitata perficerent. Itaque, qua potui usus celeritate, nocte intempesta; a. d. xxiii Januarii castra movi. Horam ab hoste aberam. Hi, ut post comperit, deliberarunt, quid factu opus esset. Sententiis divisis, hæc prævaluit, ut locum peterent magis opportunum et prælio, et, si usus esset, receptui. Itaque hujus rei perficiendæ causa abeunt. His cognitis postero die omnem equitatum præmisi, pedites sequebantur. Nec mora, equites nostri agmen inimicorum extremum consequuntur, et cursu concitato omnem exercitum Hispanum prætervecti, versis subito ordinibus, signo tubæ dato, magna vi in pedites irruunt. Hi quod nec erant satis conferti, nec parati, re etiam improvisa territi, impetum non sustinuerunt. Hic ingens cædes facta, quique potuerunt, armis abjectis, in fugam se dederunt. Interim pedites nostri viam sibi per silvam stravere, Hispanoque præsidio, quod parvulum fluvium tuebatur, dejecto, inimicos a tergo adoriebantur. Hoc ancipiti periculo oppressi, resistere porra ausus est nemo. Ceciderunt amplius mille, et in his ipse dux Varax; capti quingenti. De nostris pauci occiderunt. Impedimenta et reliqua omnia in nostris manibus sunt. Misi ad vos spolia honorificentissima, signa inimicorum novemdecim. Hæc loco aliquo posita illustri, si vobis et ita videatur, civium animos ad fortitudinem possint inflammare. Lætitia quam

quam patriæ causa e re bene gesta percipio, est magna; mirandum tamen in modum augebitur, si, quod brevi futurum spero, nos nobis de ea simus gratulaturi.

MAURITIUS IMPERATOR COMITI
PARMENSI P. S. D.

S. V. B. E. Heri quum cæsos milites humari iussissem, repertum etiam et a suis agnitum est corpus Varacis, quem exercitus tui parti præposueras. Hoc ad te curavi perferendum, ut in terra patria more vestro et ritu sepelire possitis. Humanum semper id arbitratus sum, ut, quas bella calamitates et misérias asserunt, omni ratione leniamus. Censebam etiam me hoc virtuti Varacis debere, qui in primis et stetit et pugnavit, ipsumque locum, quem tenuit, corpore texit. Nescio enim quomodo etiam mortuos magis amemus, qui vulneribus adverso pectore confecti sunt, quam qui in fuga mortem invenerunt. In eadem quum te sciam esse sententia, non credo me tibi fecisse ingratum, atque habeo mihi persuasum, te, si in re nostra possis facere idem, hoc beneficio a nobis victum nolle, qui nolis armis.

EMI-

EMILIA P. S. D. CAROLINÆ SUÆ.

Hanc comparatam esse muliebrem conditionem, ut, quod videatur levisimum, quietem nobis nostram auferat! ut sensu quodam tristitiæ, cui favemus ipsæ, afficiamur! Ego, Emilia ista semper hilaris, læta, jucunda, subito facta tibi sum tristes, loca plurimum sola peto, amicarum consuetudinem fugio. Quid huic malo causæ sit? Novus hospes e Lusitania. Hic ut Hagam venit, in amicitiam nostræ domus etiam est receptus. Fecit hoc non solum nobile genus, est enim filius ejecti e Lusitania regis, verum etiam morum amabilitas. Aetas est juvenilis, forma honesta, vestitus munditijs simplex. Bone Deus! quæ indigna et miseranda pertulit! Erasmus nuper in convivio frequenti. Omnia narravit; vultu sæpe in me defixio. Putesne quemquam fuisse, quem non movit ille? Amicæ nostræ lacrimas tenere vix poterant. Ego sic mecum: „Hem! juvenem his annis, hac virtute, hac nobilitate hæc perpeti debere! At quam fortiter „omnia! Timor animos degeneres arguit. Quibus ille exhaustis, quam excelsi tamen et æqui „est animi! Si tam magnus hic in adversis, quantus fuerit in secundis!” — Hæc ego tum mecum. Nec dulcem insaniam sensi. Jam capta sum, habeo. Sic hospes ille huc venit, vidit, vicit. Nam diligo eum et vero etiam amo. Si me roget uxorem, conditionem accipere certum est. At
quan-

quando, ubi, quomodo? Utinam ex hoc negotio essem expedita! Vale tu, nec mihi id succenseas.

MAURITIUS EMILIÆ SUÆ P. S. D.

In mediis tantarum rerum fluctibus atque procel-
lis, quibus tantum non obtuor, non mediocriter
curas meas auxit fama de matrimonio tuo certis ad
me auctoribus perlata. Primum, ne dicam quam
indecorum sit me ex aliis hoc prius quam e te ipsa
audire, quem deinde prius me scire oportuit, qui
et frater tuus sum, ut nemo magis fortunam tuam
possit intueri, et ad gubernacula patriæ sedeo, cui
ut omnia salutaria e domo nostra, atque adeo a no-
bis omnibus eveniant, inprimis mihi prospiciendum
arbitror. Quod utrumque ne ista re contra fiat,
nimis vereor. Ad conjugium quod felix dici que-
at, summam animorum in omnibus rebus consen-
sionem requiri, et quandam etiam conditionum si-
militudinem, dicere non attinet. Vobis autem di-
versa religionis ratio, diversus fortunæ status. Ille
Romanam, tu, quam parentes et nos constitui-
mus consuetudinem sequeris. Non hæc scribo,
quasi juvenem Lusitanum ideo faciam minoris; sed
cogita, an non ista diversitas animos vestros ali-
quando possit alienare. Nec obliviscere te Gulielmi
illius esse filiam, quo patre ne gloriemur quæso nos
natos, nisi tanto generis auctore nos dignos gera-
mus.

Quod

Quod ille se filium ejecti e Lusitania régis prædicet; vereor, ne, ut multi facere solent hospites, isto se nomine jactaverit, commendandi sui causa. Sed sit ille ipse, quem dicit, petiturusne tibi videatur nuptias tuas, nec potuis dignitatem tuam nobilitatemque, per quam pristinam dignitatem recuperet? Quare omnino censeo hanc tibi conditionem non esse accipiendam, quæ et tibi, et generi nostro, et vero etiam patriæ possit esse damnosa. Exclude itaque hospitem illum a consuetudine, a sermone, ab animo, omnemque illius memoriam depone. Quamquam primum id erit difficile, ut vestrum audio esse ingenium, ipse enim de his rebus non multum laboro, facile tamen evadet ferendo. Quo acrior pugna, hoc præclarior victoria, neque hæc ad te solam, sed ad nos etiam pertinebit. Vale, et meum in te amorem, ut semper, magnum esse crede.

EMILIA MAURITIO P. S. D.

Summopere me a te amari, semper arbitrata sum. Sed ex proximis literis, quas ad me dedisti, ne de lacrimis dicam, quas mihi excuserunt, animam tuam in me cognovi talem, qualem nulla re merita fui. Bone Deus! quid est quod tanta reprehensione dignum commiserim? Famam conjugii mei ad te esse perlatam prius quam ipsa de hac re scripsissem, quid quaeso novi, aut si novi, quid mali? Nihil dum certi erat constitutum. Animus autem fu-

fuit tam diu exspectare. Nunc vero certiore te consilii facio, quod tandem cepi, a quo nunquam me scito esse difcesuram. Deum optimum maximum testor, quot dies noctesque cogitando misere consumserim, et quam modo hoc modo illuc fuerim impulsam. Amat me Emmanuel meus, et ipsa eum amo vicissim. Spem nuptiarum dedi, fidem dedi, datam servabo. Persuasissimum mihi est, hunc esse, quocum, quod vitæ superfit, bene beateque traducere possim. Genus illius non est cuius te pudeat. Unde hoc norim? Vidi documenta, vidi signa, quamquam animo candido et vultui honesto multo maiorem habebam fidem. — At non abundat divitiis. Neque ego. At unus omnium mihi, instar est divitiarum, ut cum illo paupertate, quam cum alio quocunque maximis thesauris frui velim. Religio diversa ne minimum quidem inter nos pariet disensum. Putesne illum suam voluisse componere ad meam, si id mihi gratum esset? Dixi autem mihi perinde esse; imo gratius si suam fervaret, pietatem et amorem in quavis religione placere. Uterque igitur Deum vere atque ex animo colemus. Hac in re autem nulla est diversitas. Mali a me nec a conjuge orietur publice nihil. Patriam meam, æque atque tu, quamquam femina sum amo. Quod si suspicarer tantum ultro in exilium abirem. Sed non fiet. Peto ergo a te, carissime frater, ne consiliis meis obstes; quod si feceris, omnia summa me a te consecutam esse arbitrabor. Si tamen animum eundem ferves, cogita quam injuste mecum agas, cui, quod negari nemini possit, quod non negetur fororibus, id neges. An vero volunta-

ti

ti meæ, an amoris vis est adhibenda, ut viro nubam, quem consilia, ut significare videris, patriæ, non animus meus postulent? Novi Mauriti, quam exiguum in me sit ingenium; sed illud novi, patriam hæc a me postulare non posse, multo minus te, cujus consilia et patriæ, ut sunt, esse debent eadem. Quare, iterum scribo, ne me perditum eas; sic enim consilium capiam, quod causa mihi honesta et amor dederint (*). Vale.

LOUISA COLIGNIA MAURITIO SUO.

P. S. D.

Quando temporis istius dieique recordor, Mauriti, et recordor sapissime, quo Gulielmum, patrem tibi meliorem an mihi maritum, utrique certe, ut esse debuit, carissimum, amisimus, me tanto temporis intervallo nondum eluxisse nec lacrimas exaruisse sentio. Quod si mirum forte tibi videatur, nec

(*) Sic enim consilium capiam et seq] Quod et brevi post Emilia cepit. Quum enim Emmanuel, iubente Mauritio, Belgium relinqueret, præclaram vocem edidit „ Quod „ Deus conjunxit, id ne homo disjungat.“ Mox in morbum incidit. Ex quo quum aliquantum convalesceret, maritum secuta est. Tandem aliquando venia ei data est in patria cum Emmanuele vivendi, ubi liberos aliquot peperit, vixitque arctius quidem pro generis dignitate, at felicius quam propinqui amore domestico et caritate suorum. Mortua est Genevæ.

G

nec me ratione ad leniendum dolorem uti arbitrare, quamquam credo non arbitrabere, in memoriam tibi redige moerorem istum luctumque publicum, non subitum aut levem, sed verum et diuturnum, nec qui hos modo attigit, hos non attigit, sed quem omnis patria suum habuit. Quod si senatus, equites, populusque tanto cum gemitu funus parentis sui sunt profecuti, quantum tibi in illo amissum censuerunt, quid nos facere oportet, quibus Gulielmus aliis etiam nominibus merito suo erat carissimus? Unum memorabo, sed gravissimum sanctissimumque, quod tantæ illi fuit curæ, innumeris licet a negotiis districto, quantæ vix ulli, vestram volo educationem. Ac tenera quidem ætate, qua rerum tibi humanarum sensus et exiguus et puerilis erat, quam spem, metum, et sollicitudinem eum pro te sustinuisse putes, quibus precibus Deum adorasse, ut, qui civis evaderes princeps, bonus et pius civis evaderes? Quæ natu aliquanto major et exemplo illius et præceptis didicisti, hæc omitto, ut quorum semper recentem tibi fore memoriam dixisti. Interim ille occiditur. Qualis mihi tunc animus fuerit, nec tu, nec quisquam, nisi tua mater et uxor Gulielmi, intelligere potuit (*).

Omnis cogitatio et cura, quam nobis salutis tuæ, hoc est educationis ratio, afferebat, in me unam recidit. Huic saluti tuæ a me omne id tempus ita con-

(*) Tua mater et seq.] Quamquam Mauritio mater erat Anna Saxonia, quam res suas sibi habere iussit Gulielmus. Vid. Fasc. I. Epist. Exc. Bat.

consultum est, ut officio bonæ matris functa esse videar cum patriæ tum amicis. Et ingentes Deo immortalis habeo gratias, te aut spei meæ aut expectationi satisfecisse. Quod si enim patriæ magni interfit, ut omnes cives boni evadant homines, quanti ejusdem interesse putes, ut hi tales evadant, quorum consiliis et virtute in pace et in bello, domi et foris, utetur, in quorum mores et ingenium civitas intuebitur? Hæc ideo scripsi verbosius ut consilium, quod tibi in rem tuam, non quidem dederim, sed in memoriam reducerim, nec te enim hæc latent, a matre profectum putes, quæ te diligit, amat, et in oculis fert, non a cavillandi cupida. — Omnes homines, mi Mauriti, nati sumus erroribus obnoxii; habet suas quisque virtutes et vitia; nescio autem quomodo, præsertim in juventute, in virtutibus nostris acutissime cernere, in vitiis connivere soleamus. Quod quum probe nosset hominum quoddam genus humile, virtutibus nostris semper in ore habendis et laudandis, vitiis occultandis et dissimulandis, arte utrumque turpissima, nobis blandiri, rectumque sensum exstinguere coepit. Talibus, ut arbores altissimæ tempestati, maxime expositi sunt viri principes, ad quos se lucris gratia applicant, causas cæterum honestissimas præ se ferunt. Hi, ut principi sunt perniciosissimi, sic contra utilissimum aliud hominum genus exortum est, integrum et justum, qui non modo hoc modo illud, sed semper idem; quod est verum, dicere solent. Ad hos pertinet Oldenbarneveldius ille, cujus tu amicitia et consiliis frequentius antea quam nunc, uti solebas. Ignoras; ignoras bona tua. Senex ille, capite cano,
vul-

vultu semper eodem et mente, longa experientia, animo vere Hollando, amicus, si quisquam Mauriti, ille ergo ab hoc negligitur! Et qua in re amor illius in patriam non eluxit, æquitas non perspecta, iustitia non servata, integritas non cognita est? Crede mihi, talis ac tantus vir, tibi et patriæ magni est instar exercitus. Videſne Agamemnonem, quem tu admirari olim solebas, optare, non ut Ajacis similes habeat decem, at ut Nestoris? Sic enim fore putabat, ut Trojam brevi esset expugnaturus. Oro te igitur atque obsecro, Mauriti, si me, si patrem, qui, quæ agis, et novit et sentit, si denique patriam amas, cogites Oldenbarneveldium tam tibi esse amicum, quam qui est maxime. Redite in gratiam amicitiamque, ab his interruptam, qui, si Deo placet, tui et patriæ amici censerī volunt, at inimici et sunt et cognoscuntur. Hac re ut et mihi et omnibus bonis gratissimum feceris, sic magnam demseris sollicitudinem et timorem. Vale.

*

402 D12
482 D12

E P I S T O L Æ

ALIQUOT

EXCELLENTIUM

B A T A V O R U M,

C O N S C R I P T Æ

À

PETRO HOFMANNO PEERLKAMP.

GYMNAS. DOCCUM. RECT.

F A S C I C U L U S I I I.



H A R L E M I,

APUD ADRIANUM LOOSJES, PF.

M D C C C V I I I.



ÆQUO LECTORI

P. S. D.

P. H. PEERLKAMP.

Quum Vitæ Excellentium Batavorum hominibus eruditis non displicerent, iidemque arbitrarentur non male me isto labore juventuti consuluisse, imo me incitarent, ut, quid in hoc genere possem, ulterius tentarem, animum ad scribendas epistolas appuli; quarum quoniam nunc corpusculum confeci, hæc videntur monenda. Neminem scilicet sermone uti posse bene Latino, sine diligenti veterum, eorumque optimorum, lectione ac imitatione certum est. Ut igitur in *Vitis ad Cornelium Nepotem* me composui, sic in *Epistolis* non diu dux aliquis, quem sequerer, mihi fuit quærendus. Eminent enim Cicero, vir ille summus, cum in aliis scriptis, tum in epistolis adeo, ut omnes longo post se intervallo relinquat. — Eum itaque secutus sum. Ipsæ autem epistolæ Batavorum
ma-

maximam partem a me fictæ sunt, ita tamen, ut summa ope fidem historicam servare, et nihil dicere studuerim, quod a moribus et ingenio Batavi esset alienum. Istas quoque res plerumque ex historia patria selegi, quas juventuti arbitrabar jucundissimas, quæque in Vitiis a me narrari non potuerunt. — De reliquis aliorum esto judicium. — Quod si hoc etiam labore utilitati et voluptati ingenuæ juventutis aliquid attulisse dicar, magno hoc mihi erit gaudio.

Documæ a. d. xix. Aprilis MDCCCVIII.

JOANNES OLDENBARNEVELDIUS
WYNGARDENO SENATORI
P. S. D.

Quæ Leicestrius in Hollandia moliatur, quibus rebus studeat, ut scirem, dudum omni arte elaboravi, [consilio enim pugnare jam serum erat,] et tandem summo studio consecutus sum. Id nunc mihi acrius succenset. Jam pridem elatum et ferocem Anglum offenderam, quod quæ imperaret et faceret, non laudarem, aut otiosus adspicerem. — Relinquo hoc aulicis, aut quos pecunia suos regulus ille fecit; ego, quotiescunque a jure discedat, atque utinam rarius discederet! voluntati illius dicam an libidini, resistam, civiumque libertatem a tanta consiliorum audacia et temeritate tutam præstare enitar. Nec multum offensionem et inimicitias curo. Talium ego hominum odium sustinere, quam amicitia frui malo. Quali in me nunc sit animo, quid narrem tibi, qui me de insidiis illius amantissime atque fidisime multo ante admonuisti? — Lectis, quas nocte ad me dedisti, literis, nihil ab illo non timendum arbitrans, statim Delphos me contuli. Ibi fama exierat me et Mauritium et alios quosdam jussu Leicestrii in custodiam datos, et in Angliam abductos esse. Hoc ego non negligendum judicavi, sic cogitans, adversariam factionem id, quod maxime cupiat, data opera in vulgus edidisse. — Curabo itaque ut quam fieri possit celerrime, Mauritius Haga discedat. Non enim hæc loca tuta illi. Dicitur etiam Lei-

H

ces-

cestrius milites in præsidio habere. — Adeo civi, eique principi, in sua ipsius civitate a peregrino cavendum est! — qui cum (*) Cæsare illo Euripidis abuti non veretur.

Nam si violandum est jus, regnandi gratia
Violandum est: aliis rebus pietatem colas.

Interim tantum tibi me pro eo quod me monueris, debere profiteor, quantum est maximum, neque illud officium unquam apud me intermorietur. — Si mea opera uti possis, pari me erga te studio et voluntate cognosces. Vale. —

OLDENBARNEVELDIUS HUGONI GROTIO
P. D. S.

Multos eosque sapientes homines et graves ad publica negotia non accessisse, seque in otio abdisse accepimus. Hi si minus ea re ad communem utilitatem contulerint, quam possent, et forte etiam deberent, vitæ certe tranquillitati longe melius consuluerunt. Vivunt, ut volunt. Occupati sunt in rerum divinarum humanarumque studio ac contem-

(*) Suet. Vit. Cæsaris, ex Cicerone narrat, Cæsarem semper in ore habuisse Euripidis versus. Sunt autem in Phoen. Act. II.

Ἐπερ γὰρ ἄδικον ἔστι, τυραννίδος περὶ
Καλλίστου ἄδικον, τὰλλα δ' ἐυσεβεῖν χρεών.

templatione, et, quasi in portu, omnes fluctus et procellas civiles adspiciunt. Quam multa contra iis toleranda, qui se ad rempublicam accommodarunt! Ferendi mores populi et principum. Agendum est, consulendum est, vigilandum est. Suscipiendæ adversariorum inimicitiae et odia. Quid quæris? Jactura existimationis et bonorum, vitæ ipsius periculum, hæc quotidie ante oculos proponenda; quum tamen nihil boni videas, nisi bonam causam. Sed quid ego hæc ad te, quæ probe nosti? — Aut potius quare hæc non multo ante cogitatione præceperam, quibus plena sunt omnia veterum monumenta, ut usu hæc discere non opus esset? — Non me latebant hæc, mi Groti; imo, quum patria operam meam posceret, me ad omnia muniebam, quæ mihi in re publica, non optima illa, sed perturbata aut aliqua modo, evenire possent. Sed cogitabam me in ea incidisse tempora, quibus verus erga cives amor et fictus, ut aurum igni, dijudicari cognoscique posset. Itaque ut caros semper habui liberos propinquos et familiares, sic cives, qui omnes omnium caritates continerent, habui carissimos. His quidquid cura mea, labore, studio et arte effici potuit, multos annos effectum est. Pro libertate illorum, pro juribus, pro salute acerrime domi et foris steti, nec unum hominem plus quam rempublicam posse, tuli. Qua re inprimis, et quod nunc pacis auctor fuerim, multorum inimicitias mihi conciliavi. Acerrimo me igitur odio et ille, qui unus omnia esse vult, et qui ab illo pendent, prosequuntur. Quo si dignus sim, ille novit, qui omnia novit. — Multa oculi mei

vix ferenda tulerunt, et doluerunt. Tantas autem indignitates ferre, et solum dolere, non possunt. Me, qui per triginta annos Hollandiæ, ut mihi ipsi, aut magis etiam, consului, me hanc nunc esse proditurum! At quos fructus tam nefarii sceleris me sperare dicant, qui senex sim, qui Deo brevi factorum meorum rationem reddam? — Sed quid verba perdo, ubi rerum testimonia adfunt? — Ista vero calumnia tanto me affecit dolore, adeoque constantiam meam, si qua antea fuit, labefactavit, aut potius omnem eripuit, ut coram frequenti senatu, quem nuper Hollandiæ summi magistratus habebant, munus me meum deponere dixerim. At illi postero die ad me miserunt, rogantes ne patriæ in rebus tam turbulentis operam meam deesse sinerem; maxime enim, quod et ipsi et omnes boni sibi habebant persuasum, desiderare. Quid facerem? Patriæ negare nihil possum. Consilium itaque mutavi, meque consolatus sum, et deinde consolabor recte factorum conscientia, et illorum magistratuum aliorumque bonorum amicitia. — Quamdiu autem statum meum tueri potero, illud mihi quis præstet? Eum autem ad finem tueri certum est ac deliberatum, quoad me vis publica dejecerit. Calumniam certe, ut a saxo fluctus franguntur, frangere conabor, neque a proposito meo nec consiliis superiorum temporum discedam. Hæc quia patriæ utilia et optimi quique et ipse usu experti sumus, semper erunt eadem. Vale, mi Groti, et cura, ut quid agas, sciam.

OL-

OLDENBARNEVELDIUS UXORI
CARISSIMÆ P. D. S.

De me quid factum fuerit breviter ad te perferibam. Verendum scilicet ne nos ipsa charta prodatur, aut potius novas tibi miseras cruciatusque pariat. A. d. igitur XXIX. August. nihil tale suspicans in custodiam datus sum. Certiorem tum te ipse facere non potui. Omni enim epistolarum commercio atque amicorum statim interdictum est. Existima si possis, ut potes, quantæ hoc mihi fuerit sollicitudini, et hoc per totos septem dies. Nihil egi nisi curis gravissimis tui causa me ipse fere confeci. Has filii et amici heri aliquantum levarunt. Hi scilicet prudentissime caverunt, ut fortunam meam prius suo sermone quam rumore cognosceres. Perturbatam te fuisse non miror. Nunc animo te esse magis confirmato gratulor et laudo. Fac ut in eadem constantia, quidquid mihi eveniat, permanear, atque ea, quæ minus velis, animo ac cogitatione habeas præcepta. — Prævum est nostrum sæculum, et præceps rerum impetus. — Quam sæpissime, ut facis, Deum precare, ut nos ex his turbis expediat, hominem precare nullum. Omnia quæ pro patria feci optimo animo feci. Vixi innocens, justus, et propositi tenax. Idcirco hic sum. Plura per filios cognosces. Vale. —

GROENEVELDIUS (*) PATRI SUO
CARISSIMO P. S. D.

Ego et bini (†) foceri tui Mauritium heri convenimus. Rogavimus, quod non indignum persona tua censuimus, ut domi tuæ te custodiri juberet, senectutis causa. Negavit id sui juris esse, et, patri, inquit, vestro, nihil mali accidet. Utinam vere atque ex animo illud dixerit! Qui amici tui in rebus secundis fuere, iidem sunt in adversis, paucis exceptis, qui Hagam reliquerunt. — Schagenus et Asperenus (§) recta conclave, in quo erat Mauritius, petierunt, deque libertate tua agere ausi sunt. — Ab iis, sine quibus nemo ad Mauritium admittitur, tumultus excitatus est. Mauritius equitibus arma adimi, ipsosque ferveri iussit. Non multo post autem ita captivitate soluti sunt, ut dextris datis promittendum illis fuerit, se die dicto parituros esse. — Fortissime etiam contra rerum mutationem stetit in senatu Amstelodamensi Hoofdius (**). — Gravisime causam tuam, nomine regis Gallicæ, egerunt illius legati. Interim de quatuor et viginti iudiciis, qui omnem rem cognoscant,

(*) De Heer van Groeneveld.

(†) Erant illi van der Myle et Veenhuizen.

(§) Van Schagen et van Asperen, equites Hollandi.
[Beschreven in de Ridderchap van Holland.]

(**) Cornelis Pietersz. Hooft. Pater erat Hoofdius, de quo in Vit. Excell. Batav.

cant, nescio quid audiui. Ut certi aliquid sciamus, omnem dabimus operam. Serva, optime pater, constantiam tuam, et virtute te tua involve. Vitam inimici adimere tibi poterunt, hanc non poterunt. Mater nostra, pro ea scilicet, in qua est, fortuna, bono est animo. Vale. —

OLDENBARNEVELDIUS UXORI SUÆ

P. D. S.

Quod nec ego nec tu exspectare, et victi odio inimici solum cupere potuerunt, accidit. Actum est de me scilicet. Capitis condemnatus sum. Ne tu dolori tuo nimis indulge, carissima uxor, nec filii, nec amici. Multa mei causa tulisti, et hoc perfer. Non te decet in hoc extremo actu tibi deesse, quæ reliquas vitæ partes tam bene egeris. Mors me non imparatum nec valde trepidum offendit. Quod publice mihi, ut reo, moriendum est, non valde te illud moveat. Causa supplicii, quæ probabilis dici possit, æque me latet, atque tam insperata fortuna latuit, nec ullius mihi culpæ conscius sum. Et quum innocentiam meam iudicibus præstare non licuerit, Deo præstare licebit, qui me et omnia consilia mea, ut se ipse, novit. Erigit etiam, erigit se animus meus, posteritatem integram iudicem prospiciens. Hæc ut (*) nullum invidiæ aut odio,

(*) Non cogitabat senex optimus fore olim qui jure se occisum dicerent.

H 4

odio, sic suum veritati locum dabit. — Cæterum per Deum te immortalē oro, atque obtestor, Maria (*), filios et cognatos etiam atque etiam meo nomine admoneas, ut (†) omnem iræ aut vindictæ cogitationem removeant procul et abjiciant. — Ignoscēs (§) mihi quod te et liberos nostros videndi data a iudicibus facultate non utendum censuerim. Verebar ne amplexus vestri, a quibus nunquam non agre divelli potui, iis me vinculis denuo constringerent, quibus jam solutus sum. Nec vero etiam longum erit disēdium hoc nostrum. Vale atque ave, saluta a me familiam, et cogita non male mihi futurum. Deus enim Deus est iudex integerrimus.

(*) Maria] Nomen uxoris erat Maria van Utrecht.

(†) Ut omnem et seq.] Notum est filios his precibus non paruisse. Cæterum eandem animi magnitudinē in bono Phocione laudat Aelianus. *Ἐπει δὲ ὤρεξεν, inquit, ὁ δῆμιος τὴν κυλικὴν, οἱ προσήκοντες ἤρουντο, εἰ τι λέγει πρὸς τὸν ἕκον. Ὁ δὲ, Ἐπισκῆπτω αὐτῷ, μὴδὲν Ἀθηναίῳις μὴς κἀκῆσειν ὑπὲρ τῆς παρ' αὐτῶν φιλοτιμίας, ἧς νυν πινώ.* — Aelian. V. H. XII 49.

(§ Ignoscēs et seq.] Uxor et liberi illud a iudicibus petierant. Iudicis senem capitivum rogarunt tantum, si vellet eos ante mortem instantem videre, votum uxoris et liberorum tacuerunt.

JOANNES FRANKENUS MARIE ULTRA-
JECTENSI. P. S. D.

Ego vero libentissime eam, de qua scripsisti, conditionem accipio. Quidquamne jucundius fidei servo accidere possit, quam post interitum optimi heri, in domum atque fidem uxoris recipi, idque extrema heri voluntate commendatum! Animus hic si ultra sortem meam tollit, nec vestrum istum in me amorem maximis pecuniis aut principum favore facile permutem. Faciam, ut cupis, et quotidie tecum de Oldenbarnéveldio loquar. Narrabo tibi non illius quidem pietatem, optimam indolem, rectum ingenium, hæc enim tibi cognita, sed cæterarum virtutum ignota tibi documenta, et, quæ ipse vidi, exempla. — O gratum mihi laborem narrandi, tibi audiendi! Hic quidem me tamdiu delectabit, quoad Deus me ad illum evocet. — Noctem, quæ illi in carcere fuit postrema, quoties cogito, [et quando non cogito?] toties lacrimas, quantumvis senex sim, cohibere non possum. Idque præ dolore nescio quo. Dubito enim quomodo appellem, gravem an lenem. Gravem, quod maximo natu senex, de patria optime meritus, et patriæ, ut audiui et cognovi, amantissimus [et esse debuit, quis enim illo pius magis et justus?] quod illi ergo, securi percusso, fuerit pereundum. Lenem, quod inimicis tam placide ignoverit, mortem tam intrepide contemferit, et ex hac vita ita discesferit, quasi qui in veram vitam et meliorem

discederet. — Et merito. Nam qui ut ille vixit, ut ille mori potest. — Erat cum hero in carcere Antonius Walæus (*). Hunc ad Mauritium misit, rogandi causa, ut, si qua in re eum imprudens offendisset, sibi ignosceret. Capitis (†) tamen iudicio ut intercederet, rogari eum noluit. Magnus mihi semper visus est Oldenbarneveldius, hic autem se ipso major. Sed quid est quod homo, et talis qualis ille fuit, morti vicinus non possit? — Interim Lamotius et Beyerus Walæo accesserant, maritum tuum consolandi causa. Multa de animi immortalitate, hominum peccatis, iudicio, quod olim erit, Dei supremo, loquebantur. Ultimis heri verbis, quibus ad eos usus est, etiam aures mihi personant. „ Homo fui, inquit. Suis quisque „ erroribus et peccatis obnoxius est. Non alia „ conditione nati sumus. — Deum ut optimum „ patrem, et qui lubens ignosceret liberis suis, „ semper colui. Hanc mortem, quæ brevi instat, „ ut meruisse me profitear, animum inducere non „ possum, nec vos efficietis. — Vestra ego cau- „ sa lætor vos nescire, quantum sit solatium culpa „ vacare. — Sed quid Grotio meo, quid Hoger- „ be-

(*) Antonius Walæus, Interpres Sacrarum Literarum Medioburgi.

(†) Capitis tamen et seq] Quare et postea vidua Oldenbarneveldii, quum Mauritium oraret ut vitam Groeneveldii, qui mortis erat condemnatus, largiretur, et ille dixisset, quare non idem pro suo conjuge orasset, respondisse dicitur. „ Conjux meus nulli culpæ erat affinis, si- „ lius est affinis. —

„becio accidet? An et illi, ut ego, morientur? —
 „Magno mihi hoc esset dolori. Ego quidem senex
 „sum, et brevi tantum tempore respublica opera
 „mea uti potuisset. Illis contra ætas virilis, at-
 „que integræ animi et corporis vires.” — Ad hæc
 illi dextris datis discedunt. Quod noctis supere-
 rat, frustra herus dormire tentavit; legendo itaque
 Davidis carmina consumsit. Summo jam mane maxi-
 ma constantia lictores expectabat. Quid (*) mul-
 ta? Jam ab iis, qui iudices appellantur, ad Deum
 iudicem discescit. Illi nihil, nobis autem accidit,
 si quid accidit. Sed hoc ut ferendo minuamus et
 nostrum est officium, et mariti tui voluntas. Va-
 le,

(*) Quid multa? — Quanta atrocitas seni coram iudi-
 cio ferenda fuerit, in Viis Exc. Batav. a me narratum
 est. — Hinc ad locum editum, e ligno ædificatum, tarde
 at vultu constanti procedens, secum ingemuisse dicitur,
 memor forte pristinae in civitate dignitatis „Proh Deus!
 „quid de homine sit? —” [O God! wat komt 'er van
 den mensch? —] Ad hæc Lamotius longam fecit precatio-
 nem. — Mox paucis Oldenbarneveldius multitudinem allo-
 cutus est. [Cf. Vit. Bat. pag. 39.] et, servo adjuvante,
 vestes exuit, caput, splendescens canis, tegumento obnub-
 sit, [tegumentum erat eene sluweelen slaapmuts,] et in ge-
 nua ante tumulum arenæ procumbens, lictori dixit „Fes-
 „tina, festina.” [Maak het kort.] Ille uno ictu caput
 cervicibus abscidit. Simul avulsæ sunt digitorum extremita-
 tes, quos manibus orans sublati cervici admovebat. —
 Alii odio, alii amore, lintea sanguine illius tinxerunt.
 Corpus nocte clam sepultum est. — Sunt, qui dicant,
 Mauritium suis oculis supplicium vidisse. —

le, et sic cogita, servum me tibi fore fidelissimum, tuique amantissimum.

HUGO GROTIUS OLDENBARNEVELDIO

P. S. D.

Ipse quamvis brevi ad te essem perventurus, facere tamen non potui, quin epistola prius tibi ostenderem, quantæ mihi benevolentia tua esset voluptati, quod me tibi, Parisios abituro, comitem non negaveris. Ipse si fingere voluissem, nihil profectò, quod hac ætate mihi jucundius et vèro etiam utilius esset, cogitare potuissem. Primum quod peregrinas terras visendi magno semper flagraverim desiderio, [credo, quod proprium hoc sit ætati meæ.] deinde, quod sine dubio multa in tali itinere sim cogniturus, quæ ingenium ornare, animum acuere, et mores humanitate quadam imbuiere possent. — Cæteris quidem ad huc satisfecisse videor omnibus, mihi ipse non satisfeci. — Aliquot annos ita in literarum studiis versatus sum, ut (*) qui

(*) Ut qui sibi et seq.] Sententia Grotii erat, quam a pueris jam semper ante oculos habebat. „*Hora ruit.*” De qua poëta quidam.

Maar duidelijker spreekt een stem;
Uit duizend duizend wisselingen,
Herhaald door onzen Landgenoot
Den grooten Denker Huig de Groot:
„De Tijd smelt ijlings heen.”
Waardeert hem, Stervelingen! —

qui sibi habeat persuasum, tempus rem esse pretiosissimam, et, quo celerius præterlabitur, hoc magis juvenem eo uti decere. — Assidua ergo intentione et solitudine adhæsisse mihi aliquid videtur, quod quomodo appellem nescio, sed in vita communi forte subrusticum dicetur. Hoc, quidquid sit, peregrinatio facile absterget. — Hæc de itinere. — Quid autem de te, quocum illud suscipiam, qui non uno nomine mihi futurus sis utilis? us, homo non solum præclaræ sapientiæ et multarum virtutum fama insignis, verum etiam publica legatus auctoritate; ut adeo tua me amicitia non solum redditura sit multo peritior, quam sum, rerum humanarum, verum etiam aliis commendatura. Ne jam de regibus, principibus, aliisque nobilibus viris dicam, quos videre aut convenire, te volente, potero. — Vides quam gratum mihi feceris, qui utilitatem voluptatemque propositi itineris jam spe præcipio! Ingentes pro eo tibi ago gratias, et omni opera enitar, ut me comitem habeas, cujus te non poeniteat. Vale et me ama, —

GROTIUS MARIÆ REIGERSBERGIÆ

P. S. D.

Ecce tibi fortunam meam, cujus diu fui incertus, tandem cognovi. Omnis mihi, quæ restat vita, in carcere ducenda est. Bona publicata sunt. Primum ista res vehementer animum movit. Qui enim aliter fieri potuisset, præcipue amista liber-

ta-

tate, quam quis non adeo expetit, ut pro ea nec mortem dubitet oppetere? Deinde vero, quam tuum summum in me amorem cogitarem, quæ me nunquam, quantum in te fuerit, reliqueris, et mecum repeterem, qualis esse semper studuerim, quibus armis me in rebus adversis defendere possim et debeam, nec omitterem denique tantam temporum acerbitatem, adeo me ipse erexi, ut hanc sortem fere jam in consuetudinem adduxerim. — Supplicium Oldenbarnveldii tantum mihi attulit dolorem, ut ipsis ejus filiis majorem afferre non potuerit. — Causa tanti odii est injusta; sed hoc infestius. Paucis post diebus ab eodem judicio damnatus sum. Vix meliorem fortunam speraveram. Quod, ut nunc, discessem, hoc Deo acceptum refero. — Nihil est quod nunc æque atque adspectum tuum et colloquium desidero. Brevi enim ego et Hogerbecius, hinc in carcerem Lupesteinium deducemur. Vale. —

GROTIUS UXORI-CARISSIMÆ

P. S. D.

Si tu vales, uxor carissima, ego quidem valeo. Heri in novum domicilium perveni. Fores ingrediens, novo quodam tristitiæ sensu, ob amissam nimirum libertatem, afficiebar. Brevi tamen ipse mihi persuadere conabar, speciem hanc esse libertatis falsam, non ipsam libertatem. Quid enim? Tecum quotidie esse, te videre, a studiis literarum requiescere

fcere in complexu tuo atque sinu, hæc vita mihi semper cum grata tum libera visa fuit. Hanc sæpe desideratam, nunc autem temporum aut mea fortuna sive necessitate mihi oblatam, me invitum accipere non decet. Lupus (*), ut est in fabulis recte libertatem currendo quo velit, metitur. Non is ego sum, qui animum iisdem finibus, quibus corpus, cohibere necesse habeam. — Hæc adpersi, ut scires, quali sim animo, qui etiamolari possum. — Sed præterea non video, quid me in publico adspectu retinere magnopere possit, spoliatum domesticis et forensibus ornamentis, amisso fideli amico et laborum socio, et mei in patriam amoris æmulo. — Vivam itaque hic, ut debeo, lætus amore tuo, securus in portu atque perfugio literarum; quæ, quod hanc fortunam non valde inique fero, me jam laudare videntur, et brevi credo efficient, ut omnia, præter te, amicos, et patriam, in oblivionem vertere possim. Vale, et veni ad me, quam possis, celerrime. —

GROTIUS MAURIERIO SUO
P. S. D.

Amicitia, quæ est inter nos, summa, mi Maurieri, tuorumque in me omnium officiorum multitudine postulat, ut quam primum dato tempore utar communicandi tecum subitam fortunam meam sortisque commutationem. Beneficio igitur divino et in-

(*) Lupus, et seq.] Phædr. L. III. Fab. VII.

incredibili carissimæ uxoris amore atque cura e carcere liberatus sum, in quem me, spretis præculcatisque legibus et omni jure, inimica factio compegerat. -- Nunquam equidem Deum O. M. satis laudare potero, q̄bi talem mihi dederit uxorem, qualis mea, quam nosti, Maria. Ut cæteras illius omittam virtutes, ob quas non minus mihi cara est, quam quod uxor est, mecum in carcere vixit, me ex eodem carcere liberavit. — Quotaquæque (*) mulierum reperitur, quæ omnia minoris faciens, solum mariti amorem intueatur, nec vereatur eum sequi in locum, in quo rebus sibi plerisque fciat esse carendum, quæ vitam reddunt jucundam? — Et tamen illa me non solum non deseruit, verum etiam omne illud tempus ibi contenta mecum et hilaris permansit. Crêdas me nunquam aliquid aut ex vultu vidisse aut sermone audisse, ex quo vel suspicarer confilii illam fui poenitere? Nihil, mi Maureri, ferebat iniquius, quam quod interdum casum, non meum, sed illius deplorarem, quæ mea causa in rebus esset adeo adversis. Quid diceret? „Mitte hæc, mi Hugo, mitte. Ego „quum data dextra conjugii fidem tibi dedî, fance „te promisi omnes etiam calamitates tuas meas „futuras. An me cogitasse censes nos in matrimonio nostro prospera semper fortuna usuros esse? — „Imo cogitabam, ut sortem esse incertam, sic „amorem nostrum certum. Mihi ubique bene est, „ubi

(*) Quotaquæque et seq.] Uxor Hogerbecii etiam cum marito in carcere vixit. Neque tamen diu. Brevi enim ibidem mortua est. —

„ ubi tecum sim. Quod ni facerem, me indignam
 „ te præberem.” — Ab eadem uxori, quæ se in
 carcere talem præstitit, libertati etiam meæ red-
 ditus sum; idque ea ratione, quam si ab altero
 audissem, dicerem incredibilem. — Sed quæ huc
 pertinent, narrabo tibi, et quod omnia ipse recor-
 dans divinum etiam beneficium recordor, et quod
 scio minutias etiam, quæ ad meam aliquid salutem
 et libertatem conduxerint, tibi esse jucundissimas. —
 Erat ergo mecum in carcere uxor mea, dataque illi
 erat facultas cibi nostri parandi, et certis diebus
 Gorichemum abeundi, ubi, quæ in re domestica
 opus essent, emebat. — Gorichemi hospitio uteba-
 tur Abrahami Daatselaari, qui mercaturam rerum mu-
 liebrum facit. Ea quæ ex Hollandia ad nos erant
 perferenda, aut a nobis eo mittenda, ille curabat.
 Sæpe jam arca libris referta missa ac remissa erat,
 quam primum, ut fit, arci Lupesteinio præfectus,
 explorabat. Quam nihil tamen, nisi libros in ea
 reperiret, hujus eum laboris tædere coepit, idque
 facere destitit. — Hic uxori, quam nihil omnino
 effugit quod mihi esset utilitati, in mentem venit,
 an non fieri posset, ut ipse pro libris ex arce efferrer.
 Quid multa? Placet mihi inventum. Tento late-
 bras novas, quomodo et quamdiu in iis esse pos-
 sem. Arca longa erat vix pedes quatuor. Aër per
 rimam, cui clavis inseritur, erat excipiendus. —
 Sed quid pro libertate non facias? Deum igitur,
 ut huic incepto adesset precatus, carissimamque
 uxorem non sine lacrimis amplexus, me immisi.
 Cavis arcæ, nam ea corpore meo non prorsus im-
 plebatur, libros et lintea uxor infarferat. Venia hu-

ius Gorichemum mittendæ facile impetratur. Aberat enim arcis præfectus. Quare et illud tempus rei gerendæ opportunum elegerat. — Duo milites, qui me in navem ferebant, de nimio pondere querebantur, unumque alterum rogantem audiebam, sive serio sive joco, num forte ipse Arminianus, [ita me appellare solent isti homines,] esset inclusus. At uxor ridens, Libri sunt, inquit, Arminiani. Sic incolumis in navem perveni. Conscia erat omnis consilii nostri ancilla, quæ ad cæteras suas virtutes singularem erga nos fidem et amorem adjuxit. Hæc una mecum Gorichemum præfecta est, ut curam arcæ gereret. Eo brevi pervenimus. Perferor domum amici nostri mercatoris. Arbitris remotis, hoc altero carcere meo liberor, in quo binas fere horas consumseram. Incommodum hujus itineris minus erat quam mihi proposueram. Interim consulitur qua ratione fugam maturarem. Mercator hoc se negotio impedire non ausus est, et uxori suæ reliquit. Hujus cura factum est, ut celeriter vestes acceperim, quæ me redderent incognitum. Mox fabrum aliquem simulans, cum fabro quasi socio recta per forum ambulavi. Is comitem se mihi præbuit ad Vaalvicum, atque inde curru vectus salvus et liber Antverpiam perveni. — Quis mihi tum animus fuerit, tu sentire melius potes, quam ego perscribere. Habes omnem fugæ meæ expositam tibi rationem, quam quotiescunque cogito, [et credo longum fore tempus ut nulla fere alia de re cogitem,] toties Deum O. M. laudare non cesso, qui talis uxoris opera libertatem mihi meam reddiderit. Hujus ego fructu libertatis quamvis

vis incredibiliter delecter, ut qui e gravi morbo convalescerent, magis delectantur bona valetudine, gravissime tamen eo angor, quod quæ fortuna sit uxoris, ignarus sum. Quod si facti hujus invidia opprimeretur, atque illi in locum meum esset succedendum [quod Deus omen avertat!] mea sponte in carcerem redeo. Sed aliqua me spes tenet fore ut intelligere velint iudices, Mariam esse feminam, quæ quidquid fecit, solo mei amore fecit. — Sed brevi hac sollicitudine liberabor. Compositum enim nobis est ut, si evasissem, aut ipsa aut amici ad me scriberent. A me binæ jam literæ misæ sunt. — Quam longa, inquires, epistola! — Fateor modum excessi. Sed ulciscere te jure talionis, aut mitte potius etiam longiorem. Gratiorem mihi poenam injungere non potes. Vale, Maureri et me ama. —

MARIA REIGERSBERGIA HUGONI GROTIO
S. D. P.

Accepi literas tuas, plenas illas summæ voluptatis, nec minoris sollicitudinis; voluptatis nimirum ob recuperatam libertatem, sollicitudinis, quod, quæ mea esset fortuna, ignorares. Næ tibi ego omnem metum his literis absterfero. Nihil mali mihi accidet, et brevi ad te proficiscendi erit facultas. Quantum gaudium ex successu rei tam arduæ perceperim, ad te quid scribam? A nemine te cognitum Gorichemo exisse, ab ancilla nostra

108 EPISTOLÆ EXCELLENTIUM

accepi. Qua tandem ratione hominis istius erga nos amor et fidei dignas referemus gratias? Nihil postulat, nisi amicitiam nostram, alia omnia repudiât. Movit me tanta animi magnitudo, et credo te movebit. Sed de his coram. Non dubito quin scire aveas, quid hic, te interim fugiente, factum fuerit. — Vesperi præfectus arcis domum redit. Vidit tenebras esse in conclavi, in quo tu literis vacare solebas. Orta est suspicio. Fugam et hujus rationem cognoscit. — Mox omni qua potuit celeritate Gorichemum abit, domumque Daarfelaari explorat. Nihil non tentavit. Sed frustra. Coactus tandem est denunciare magistratui, Grotium e carcere fugisse. — Ut quam primum tecum esse possim, graviora negotia in patria ipsa curabo, alia amicis commendabo. Tu hilari et læto sis animo, et in primis id agas, ut valitudinis imbecillitatem sustentet atque corroboret. Hoc te vehementer, mi Hugo, rogo. Vale. —

HUGO GROTIUS GULIELMO FRATRI,
P. S. D.

Vide quo me fatum meum, aut odium eorum, qui me non norunt, perduxerit! Civis esse desii Batavus, atque alienæ civitatis factus sum. Regina Sueciæ suo me favore atque amicitia complectitur, et brevi legatus illius in Galliam proficiscar. Hoc spei atque opinionis de me documentum non minus me consolatur exfulem, quam honor atque dignitas mul-

multis contumeliis vexatum erigunt, et redditus opum alienarum indigentem sublevant. Ista igitur est fortuna mea, cui multi invident, quam plures etiam concupiscant. Quali hanc ipse animo feram? Aequo, ut decet, atque grato. Vellem etiam dicere possem hilari. Sed quum patriæ meæ venit in mentem, animum dolor quidam et triste desiderium occupant. Crede mihi, carissime frater, multo potius tibi privatus, liber et meo contentus vivere vellem, quam in exilio tanta cum dignitate. — Versantur quotidie ante oculos parentes, cognati, atque amici. Adest non urbs solum, verum etiam domus quam habitavi. — Quid dicam de vita, quotidiana quæ erat in Hollandia, quid de victu, quid de tot aliis rebus, quibus ægre careo, et nusquam nisi in Hollandia reperio? Numquam cogitatione assequi potui, tantum nobis amorem esse innotatum telluris, quæ nos genuit atque aluit. Quod nunc maxime experior, cui forte omni vita eadem tellure carendum est. Et quæ spes est fore hæc aliquando melius? Ego quidem veror ut unquam eò sim rediturus. Animi enim nonnullorum tanto odio sunt exacerbati, ut nec Deum nec religionem nec justitiam respiciant, suisque veris criminibus diluendis, falsa mihi assingant. Parisiis quum nuper essem, consuetudinis me cum legato Hispano accusarunt, quum tamen illum nec viderim, nec ullum mihi cum eo intercesserit commercium. Legatum patriæ nostræ, cujus labores bono publico sublevare volebam, quominus convenirem, hi caverunt qui non dicam quo jure, quibus artibus, sed rempublicam apud vos tenent. Facile hinc vides spem,

quam mihi possim proponere, nisi sim stultissimus, esse nullam. — Scripsi igitur et ad amicos et ad eos qui in magistratu sunt, magnis me beneficiis atque meritis Sueciæ esse obligatum, eamque pro Hollandia patriam meam factam; Hollandiæ tamen amorem me, non prius quam animam, esse depositurum. Vale. —

HOOPDIUS CASPARI BARLÆO

P. S. D.

Parentem meum summo quidem semper prosequor amore, ut debeo, nescio tamen quis cumulus eidem amoris accedat, quando pueritiæ memoriam repeto. Idque cum ob alias causas, quas enumerare longum est, tum quod patriam amare, et more patrio vivere, et exemplo suo et præceptis me docuit. Sensus iste quo me tum imbuir, cum ætate mihi crevit, et, quæ primum facere institui, quia ille monabat, qui me ut oculos suos amabat, hæc facere deinde nunquam omisi, utpote cui hoc utrumque visum est pietas et voluptas. Amavi ergo non patriam solum, quantum potui, sed etiam mores ejusdem et sermonem, et omnè quidquid, ut ita dicam, sit patrium. — Juvenis in Gallia, Italia, et Germania fui. Quæ digna erant visu, et cognitu, ea vidi et cognovi. Sed hæc omnia hunc meum, quem dixi, amorem, non tantum non exstinxerunt, veram etiam confirmarunt, ut adeo peregre quum essem, ortu meo sæpe gavisus fuero. Nam non

fu-

sumus quos extra patria dicere pudeat, „Civis „Batavus sum.” — Natio est, ut peregrini etiam agnoscunt, fortis, fidelis, diligens, sincera, ingeniosa, Regio situ aptissima vitam singulis civibus jucundam et facilem præstandi, et per hos prosperam reipublicæ fortunam et vero etiam divitias conciliandi. — Et miraris adhuc me, quod hujus sim regionis, lætari? Miraris, me omnia, quæ hujus sunt propria, adeo amare ut pauca omnino sint, quæ cum exteris permutare velim? — Placent ergo omnia, victus, vestitus, mores, et inprimis hic, quo utimur, sermo. Nec video justam rationem quare nonnulli quemvis peregrinum huic præponant. Non dicam nunc quam ingrati sint, qui linguam majorum suorum negligunt, sed quam imprudenti et præpostero id agant consilio, id ipsi videant. At non copiosa fatis nec dives nec elegans est sermo Belgicus, ut merito alicui præ Gallo inprimis fordeat. At illi spernunt aliquid quod non norunt; [ars enim plerumque non habet inimicum, nisi ignorantem.] Idem studium, aut minus etiam, in suam ipsorum linguam, quam in alienam, conferant. — Sed hoc ab iis vix ac ne vix quidem expectes, qui honori sibi ducunt in sua patria esse hospites, et cum admirabili ista, quæ dicitur, Gallorum elegantia, etiam sermonem sibi adsciverunt. — Me quod attinet, magni facio Gallicam linguam, minōris tamen quam nostram. Itaque ad hanc intelligendam, poliendam atque ornandam omnes ingenii et diligentiae curas intendi, neque dubito, quin alii olim sint exopturi, qui in eodem labore versari non detrectent. — Ecce causas, quare

in rebus et sermone patriæ meæ unice quasi vitæ tabernaculum posuerim, et deinde positurus sim, quantum ab officio et valetudine liceat. — Vale.

HOOFDIUS HUGONI GROTIQ
P. D. S.

Quam gaudii nobis illud attulit quod e carcere non inusitata minus quam felici ratione evaseris, tantum etiam percepimus doloris, quod tibi in exsilio patria, et patriæ te sit carendum. Utrique certe, ut et ego et omnes ingenui cives arbitramur, accidit illud molestum, et verò etiam patriæ damnosum. Quamquam ea, Groti, tua est sapientia et virtus, ut omnia bona in te ipso posita habeas, et externis istis honore, divitiis, auctoritate æque facile carere possis, atque etiam in exsilio, si velis reperies; exsiliū tamen injustum bono civi res misera mihi videtur. Quantam verò utilitatem et splendorem res ex te publica accipere posset, si per nonnullos liceret, superioribus apparuit temporibus. — Hoc imprimis, quum sæpe cogitarem, putavimus amorem patriæ omne, quidquid in nobis esset, postulare, quo reditum tuum efficere possemus. Apud eos ergo, penes quos summa rerum est, non semel mentionem exsiliū tui injecimus, nec, quid nobis ea de videretur, dissimulavimus. Utinam conatus nostri tantum valerent, ut justitia in re tua uti vellent, nec quidam falso pudore impedirent, quominus tuo in patriam reditu singulis et omnibus pa-

pateret, præcipiti vos rerum cursu et odio atrocium animorum, non culpa vestra eo fortunæ esse adductos. Hac re et mihi et omnibus bonis nihil optabilius accidere poterit. Vale. —

HOOFDIUS AMICIS SUIS LONGE.
CARISSIMIS P. D. S.

Et ætas est et coelum per aliquot jam dies adeo ferenum, ut arthriticum etiam ad ambulandum posset invitare. In hortiis meis omnia florent, multa sunt matura. Cerasa rubent ut labia formosæ virginis. Vos si vita frui velitis rustica, quum res in urbe sint prolata, aufugite fumum et strepitum, et curas domi relinquite, si possitis. Sin minus, et comites vestri esse velint itineris, nã ego faciam ut eas poeniteat. In ædibus enim meis aut hortis durare hoc tempore non possunt. Quæ arma, quibus eas defendam, habeam? Vini suavissimi florem, quod nemo nostrum ætate æquat. Seria et jocos, musicam et cantum, coenam, ut mos meus est, Hollandicam. Hanc conditionem si non adspernamini, feceritis mihi gratissimum. Valete et venite. —

HOOFDIUS CASPARI BARLÆO

P. S. D.

Ego vero, mi Barlæe, vellem in meo acerbissimo luctu affuisses. Quantum enim oratio me tua et societas pæne ægritudinis adjuvare potuisset, ex eo intelligo, quod lectis literis tuis aliquantum a nimio dolore respiravi. Nam ea scripisti, quæ me consolari et luctum levare possint et debeant. Est, ut dicis, mi Barlæe! Non me fugiebant ista, sed subito dolore impeditus non perspiciebam. Et quomodo perspicerem qui pater sim et paucis mensibus binos optimæ spei filios, qui carissimam uxorem, qui optimum parentem, hos acerba, illum exspectata quidem attamen filio semper flebili, morte amiserim? — Nunc autem non mediocriter me erigunt et ratio et religio Christiana, utraque a te in memoriam mihi redacta. Harum una me temporis beneficium in minuendo molliendoque dolore non exspectare jubet, negatque oportere me, qui aliis in his casibus sæpe præcepi et consilium dedi, mihi ipsum deesse. — Altera me, hominem Christianum, omnia Dei consilia vult probare, et spem certam futuræ immortalitatis ostendit. Sed de his plura inter nos, ut spero. — Scito enim adventum tuum semper quidem mihi esse gratissimum, nunquam tamen fore gratiorem. — Non enim eadem mente, qua solebam ad muneris negotia aut literarum studia accedo, nec me ab his eadem domus excipit. Requiro liberos, desidero uxorem. Itaque ad me venies, quam primum poteris. Vale. --

JO.

JOANNES WITTIUS LEGATO (*) REGIS
GALLIÆ. P. S. D.

Magnam liberalitas tua mihi iniecit admirationem, vel, ne quid dissimulem, stuporem. Ignosce mihi, si dixero, animum tibi meum aut rationem muneris, quo fungor, esse incognitum. — Operam meam patriæ præsto quam diligentissime, atque inde tantum ad me venit, quantum ad dignitatem tuendam satis est. — Omnia quæ civibus meis aut a me aut ab aliis proficisci possint utilia, studiosissime et libentissime facio. Si, quæ rex velit, ejusmodi sint, gratis facere paratus sum. Magnam mihi pro officiis mercedem donaverit, si fidem mihi suam et amicitiam donaverit. Vale. —

(*) LEGATO] Erat ille D'Estrades. — Sæpe tentavit principes civitatis nostræ viros, sed frustra. Patet illud ex ejusdem epistola quadam, in qua his usus est verbis, „Sibi in Hollandia non plures quam quatuor homines esse „notos, qui corrumpi pecunia non poterant, Joannem et „Cornelium Wittios, Hieronymum van Beverningk, et „Koenraad van Beuningen.” —

WIT-

WITTIUS CORNELIO FRATRI,

P. S. D.

Ea est principum et populi consuetudo, ut res secundas suæ tribuant fortunæ, adversas culpæ alienæ. Hujus ego rei nunc triste præbui exemplum. Plebis imperitæ et concitatæ calumniam, me scilicet omnium calamitatum quæ patriæ eveniunt, esse auctorem, tacite despexi. Neque hæc mihi tam inopinato accidit, quam impetus tempore nocturno ex insidiis in me factus. Atque eo furoris et audaciæ quatuor cives processere, quorum odium ebrietate erat irritatum. Jamque manibus illorum fuisset trucidatus, nisi Deus cavisset. Scis quantum curæ et temporis negotiis semper tribuam publicis. Ea quum nuper multa essent et gravia, magnam noctis partem in Senatu Hollandiæ scribendo consumsi. Domum inde revertor. Servus me comitabatur cum face ardente, subito quatuor armati ex insidiis provolant, servo facem manibus excutiant, eamque extinguunt. Ego me frustra defendere conor. Vulnere cervici illato, humi me dejiciunt. — Quum ad me redissem solus jacebam, valde debilis, multo sanguine amisso. Reliquerant me scilicet homines, arbitantes se jam consilium suum perfecisse. — Ego interim, quod vix valebam, domum peto. Postero die magistratus Hollandiæ hujus facinoris per epistolam certos feci. Res patefacta est. Jacobus van der Graavius, filius senatoris, prehenditur. Reliqui clam se proripuerunt. Reus confesus

fus est se cum fratre et duobus amicis vesperi coenasse, media nocte exisse ambulandi causa, ex lumine lucernæ conjecisse me etiam in fenatu-esse, seque invicem vini plenos, ad eadem meam incitasse. — Addidit se nullam scire causam quare focius hujus facinoris fuerit, nisi quod a Deo esset relictus. — Medici me spem concipere jubent fore ut intra paucos dies convalescam. Vulnera enim non erant lethifera. Famam hujus rei magnæ tibi fuisse sollicitudini, facile intelligo. — Brevi valetudinem meam præfens videbis. Sunt enim quæ coram tecum velim. Vale. —

WITTIUS CORNELIO FRATRI
P. S. D.

Ille qui me, civem suum, redeuntem ex curia, festum a negotiis reipublicæ, ut maleficum ex insidiis adortus, et jugulare conatus est, facinus morte luet, bona publicabuntur. Fuere qui mihi proponerent, an non a me impetrare possem, ut veniam supplicii rogarem, judices, ostendentes quam hoc facto animos plebis reconciliarem, et favorem omnium recuperare. Ego me illi, quod in me commisisset, ignoscere respondi, causam vero iudicibus esse commissam, quorum auctoritati atque integritati me precibus meis non intercedere posse. — Et cui bono intercederem? Ut spes impunitatis, maxima illa peccandi illecebra, malorum et numerum et audaciam augeat? Quod ad odium attinet populare, hoc

hoc immerito patior. Et si populi favorem recte faciendo servare aut recuperare non possum, non profecto illud conabor misericordia quadam, stulta aut crudeli, quæ omnium, qui publicis funguntur muneribus, vitam telis improborum sit expositura. — Quid? quod ista re inimicis meis risum præberem? Non enim illi hic animi magnitudinem, sed debilitatem quærent. Hæc sunt quæ me moverunt, ne facerem quod amici me rogarunt. Homini infelici, ut jam dixi, ignosco, et me illius miseret, qui honesto loco natus, optimis artibus eruditus, eo dedecoris, atque infamiae processerit. Nullus quidem (*) dubito, quin hoc ipsum majorem mihi invidiam sit conciliaturum, et facile intelligo quam alii me non injuriarum oblisviscentem, aut propositi tenacissimum sint appellaturi. Per me licet, nec, quoquo modo hoc accipiat, causæ intercedo. Cûra quæso ut sciam quid tibi videatur. Vale. —

(*) Nullus quidem et seq.] Ut etiam accidit. — Hic addere non videtur a re alienum plebem, Joanne et Cornelio non multo post crudeliter occisis et dilaceratis, domum senatoris Van der Graavii prætereuntem, clamasse ad uxorem „ Mortem filii tui vindicavimus. Hujus auctores jam pendent.” —

COR-

CORNELIUS WITTIUS JOANNI FRATRI
P. S. D.

Gulielmus tertius, cupidissime hoc agente plebe, majorum honoribus et auctoritate potitus est. Magistratus Dordraceni scriptum illud subsignarunt, quo edictum (*) æternum antiquatum est. Etiam ventum est ad me, quum æger domi decumberem. — At ego me iusjurandum olim datum violare nec posse nec debere respondi; quippe quò me nemo homo liberare posset. Illi furorẽ plebis ostendebant, quæ magna frequentia circa domum meam confluxerat, et, si cunctarer, vim factura videbatur. Ego omni qua potui me constantia muniens. „Tot periculis, „inquebam, in nupero proelio navali vita mea fuit „expõsita, ut nulla amplius timeam.” Neque ut nomen ponerem tum me inducere potuerunt. Ecce mihi uxor, parvulos filios in sinu gerens, venit, et lacrimans orat, ut illorum causa vitæ meæ consulerem. Quod nĩ facerem, foras se progresuram, et facto plus quam muliebri generi meo consulturam. — Cesfi invitus, nec lacrimis illius resistere potui. — Nomen ergo dedi, binas tamen addens literas (†), quæ vi me esse coactum indicarent. Sed et has delere ne-

(*) Edictum æternum.] Het eeuwig edikt. — Notum in historia patria hoc nomine; quo nimia Principis auctoritas arce coërebat. Crevit hoc Wittii et aliis ingentem inimicæ factionis invidiam. —

(†) Binas — literas.] Scilicet V. C. —

necesse mihi fuit. Vereor quorfus hæc omnia fint eruptura et ut ex his malis nos fimus emerfuri. Non enim magis in nostra fumus potestate quam ii, qui fluctibus maritimis jactantur. Vale, fi quis tamen in his rebus valere poffit. —

JACOBO WITTIO, PATRI, P. S. D.
JOANNIS.

Ea est acerbitas odii, quo in omne nomen nostrum inimica factio flagrat, ut nec jus nec fas nec leges respiciat. Judices, fi Diis placet, in Cornelium facinus aufi funt, a quo omnis posteritas abhorrabit, et prorfus nescio quid magis debeam admirari crudelem illorum injuftitiam, an excellentem Cornelii constantiam, quam dabat innocentia. Judices non fati habentes, fi eum falſi criminis ab impio et ſclerato indice delatum, in cuſtodiam conjicerent, nec innocentiam, quæ luce clarior apparet, videre volentes, torferunt eum, fi forte dolor exprimeret confeſſionem rei, de qua numquam cogitavit. Proh Deus! quaſi iſta crudelitas veritatem poſſet indicare, quæ apta ſolum eſt patientiæ captivi tentandæ.. — Meri vesperti præfectus cuſtodie Cornelio nuntiabat ſe nihil ei, quod ederet, daturum, nec cauſam interroganti reſpondebat. Quare ille, quid fieret, ſuſpicans, intrepide, Quid ergo, inquit, diene me craſtino torquebunt? Ante meridiem ductus eſt in conclave, in quo iſta immanitas exerceri ſolet, et quamquam nondum aderant judices, tortor opus ſuum aggrediebatur. Quod quum

quum Cornelio, ut erat, indignum videretur, sibi imperatum respondit, tantamque illi doloris vim coepit intentare, ut lacrimas tenere non posset. — „Heus tu, ait, jam te hoc movet. Confitere! non enim dolorem feres.” Ad hæc Cornelius. „Quis, scelus, confiteri aliquid possit, quod non commiserit?” Interim dum cruciatus augentur, iudices adveniunt, atque ut confiteretur, admoneant. At ille nullius sibi culpæ conscius. „Di, lacerate me, si velitis, exclamat, falsum mihi facinus affingite. Hoc me commisisse ut confitear, nunquam induci potero. Vos ipsi scire possitis nulli me culpæ esse affinem.” Post hæc tanta illius fuit constantia, tamque admirabilis patientia, ut, licet vis tormentorum etiam major adhiberetur, ne gemitum quidem ejus audierint. Quid? quod iudicium crudelitatem irridere, nec dolorem sentire videretur: clara enim voce ex Horatio (*) illa recitavit.

Justum et tenacem propositi virum
Non civium ardor prava jubentium
Non vultus instantis tyranni
Mente quatit solida. —

Atque tres horas hæc illi immanitas fuit ferenda. Datus deinde est iterum in custodiam. Quid nunc de illo futurum sit, Deus novit. Timeo prorsus quo nunc iudices progresfuri, aut quidnam acturi sint. — Nihil agunt quod ad me non deferatur. Si quid certi cognovero, hæc coram. Vale. —

RUI

(*) Horatio.] III. Od. III. vs. 1. et seq.

RUITERUS OPTIMO AMICORUM

P. S. D.

Quamquam omnia tibi, quæ in itineribus meis mihi evenerint, in patriam reversus narrare soleam, negare tamen, quod petisti non possum, ut scilicet, si epistola curari possit, scribere non negligam, quid agam, aut ubi sim. — Salvi ergo Saleam (*) pervenimus. Biduum cum ingenti tempestate nobis fuit luctandum. Merces, quas advexi, venditæ ferre sunt, idque magno satis pretio. Si minore voluissem, dudum negotia fuissent confecta. Sed nostri me nihil solere abjicere, et res mercatoris mei tam attente, aut magis etiam, quam meas agere. Id enim et officium meum et fiduciam, quam in me collocant, postulare arbitror. Ista autem diligentia heri magnas mihi creavit molestias. Sed sic est ingenium meum, quod cum coelo mutare non possum. Hoc in Africa idem manet atque est in Hollandia. Quæris an hoc hominis sit sapientis. Ista de re disceptare nolo, sed hoc affirmare possum, aliquem, qui boni propositi est tenax, et strenue officio fungitur, barbaris etiam placere. — Hoc nunc exemplo didici. — Præfecto (†) urbis præ

(*) Saleam.] Salea [Sale] urbs in Africa, in regione sic dicta Barbaria; aut si proprie velis Berberia. Incolitur enim et præter Mauritanos, et Arabas, a Berbernis. [Berbern.]

(†) Præfecto.] Dicebatur ille de Sant.

præ reliquis mercibus, quæ erant expositæ, placebat vestimentum pretiosum. Id quanti constaret, per interpretem rogavit. Justum, ut semper, poscebatur pretium. Hoc nimium illi visum, et multo minore licitus est, quo me non venditurum esse dixi. Ob id irascebatur, quod ex sermone cognosces, quem, ut cum ejus interprete habui, adscribam, et simul nomina apponam, ut inquam et inquit omittere possimus.

Præfectus. At non majoris æstimo illud vestimentum.

Ego. Hoc tu videris. Meum ergo manebit.

P. Attamen te dare jubeo atque impero.

E. Mihi non licet sic abjicere illud, quod eorum est, a quibus misus sum.

[Hic minitabundus abiit. Quo facto per internuntium eum rogavi si vestimentum illud, quoniam de pretio convenire non possemus, gratis a me accipere vellet. Reversus ille,]

P. Non licere tibi tu dicis id, quod tuum non est, exiguo pretio vendere, donare vero licet?

E. Abjicere mihi nihil licet. Sic sumus Hollandi mercatores. Donare licet, si res aut usus postulet.

P. An tu nescis te et omnia tua in mea esse potestate. Nescis me, si velim, hæc mihi sumere posse? —

E. Non nescio. Sed sic nemo in posterum fidem tuam esse credet certam, nec se oris, quæ tuæ sunt ditionis, committet. Si me pro captivo habeas, statue pretium, quo libertatem redimere possim. Dabitur. — Ad hæc terram pedibus pulsans, et plenus iræ, me et alios, qui frequentes aderant, re-

liquit, et discedens ait. „ Quam (*) indignum est, talem hominem esse Christianum! Interim dum ego cum aliis etiam Turcis et ipsius etiam præfecti fratre querebar, quam non pro meritis mecum ageret, et incertus eram quæ me fors maneret, redit ille, sed vultu placido, et iterum rogat, num dicto pretio vestimentum vendere vellem. At ego me donare posse, sed ita vendere non posse, simpliciter respondi. Tum ille ad eos conversus, qui adstabant. — „ Videte mihi fidem et pietatem hominis Christiani erga suos! — Utinam „ vos omnes, si res ferat, ita erga me sitis animati!” — Mox magno impetu medium me complectitur, sinum meum suumque denudat, manum suam meo, meam suo pectori admovet. Est autem hoc amoris, amicitiae atque fidei magno indicio. — Movit me vehementer tanta animi magnitudo, et vero etiam socios nostros. Horum tu hominum ferox ingenium nosti. Sed crede mihi, erant qui oculos non siccos ex hoc spectaculo referrent. Ego quum solus essem diu de virtutis amabilitate mecum cogitavi, quæ in hominibus cuiuscunque nationis, coloris, et religionis conspicua, omnes mortales vi quadam tacita ad diligendum allicit. — Ista porro res novum me docuit exemplum, nos recte (†) faciendo neminem oportere

(*) Quam indignum et seq.] Cf. Epist. Fascic. I. p. 25. — „ Cæterum [Turcæ] desides sunt et stupidi, jactant se fidei „ Muhamedis, aliosque a se dissentientes alto supercilio „ despiciunt.”

(†) Nos recte faciendo et seq.] Ista Ruitero constentia

tere timere. Quum vespera heri advenisset, sociis congiarium dedi, quo se invitarent, simulque admonui ne Turcas despicerent, in quibus homines tantæ animi magnitudinis esse vidissent. — Sed, inquires, quid tu philosophus ex nauta factus, hæc nunc per epistolam, de quibus hieme ad focum solemus? Est ita. Sed quis in tali re filere possit? Neque timendum tibi est ne de his latius olim disserendi occasio sit prærepta. Obliviscar enim quoad vivam, nunquam et omnibus narrabo, quibus potero. — Valde spero fore ut hæc te literæ bene valentem offendant, nec satis dicere possum quam avide tempus in patriam redeundi expectem, Quod, ut nunc est, brevi erit. Vale.

RUITERUS OPTIMO AMICO
P. S. D.

Ea aliquamdiu in bello usus sum fortuna, quod Deo, qui bonæ causæ adest, acceptum refero, ut majus mihi imperium a magistratibus Hollandiæ sit oblatum. Ego si dicerem istam, quam de me habent opinionem, mihi non esse jucundissimam, nec
me

tia magnæ fuit utilitati. Namque præfectus urbis Hollandum aut dictis aut factis lædi vetuit, inque omnibus rebus juvari iussit. Et permansit Ruiterus semper in illius amicitia. Quo factum est ut Mauritanii magni eum facerent, nec alter esset, quocum libentius mercaturam facerent. —

me magnopere tanto benevolentiae atque honoris indicio delectari, mentiar. Sed ista mihi visa fuit muneris et rei gravitas, ut magistratuum votis subito parere non potuerim. Accedit etiam quod non magna de me sentire soleam, et genus meum impar sit tantæ dignitati. In Zelandiam ergo profectus sum, atque amicos aliquot præstanti prudentia et in patriam amore, consului. Hic omnia cum iis, quæ ad rem pertinerent, attente meditati literæ ab iisdem magistratibus conscriptæ superveniunt, quarum addidi exemplum. Extemplo Hagam redii. Ibi Wittius coram frequenti senatu omnia, quæ me a tanti muneris gravitate posset detertere, partim sic illustravit, partim diminuit, ut jam non boni civis esse mihi videretur, me senatui populoque Hollando non addicere. Quod patriæ felix faustumque esse Deus Q. M. velit jubeatque. — Vale.

MAGISTRATUS HOLLANDIÆ (*), MICHAELI RUITERO, VIRO FORTI, PIO, ET PRUDENTI, AMICO SUO P. S. D.

Fuimus semper in ea sententia, quam et dictis et factis sæpe declaravimus, virtutem omnium mortalium laudandam esse atque ornandam, quoque illi

(*) MAGISTRATUS et seq.] Titulus est. Manhafte, yroome, discrete. goede vrund. — Exstat autem hæc epistola in Vita Ruiteri, a Brand. conscripta pag. 66. —

illi essent genere atque loco. Virtus et fortitudo, quam in variis proeliis contra hostem præstitisti, nobis accidit gratissima. Perpicimus etiam atque agnoscimus plurima in te animi bona, quibus te Deus O. M. ornavit. Quare te absentem nuper majori, quam quo adhuc usus es, præfecimus imperio. Quod accipere illud cunctaris, facere nobis videris pro singulari tua modestia, quæ viris magnis propria esse consuevit. Persuasum autem nobis est, te non pasurum operam tuam aut ea quæ diximus bona patriæ deesse, et majorem in modum a te petimus, ut, quæ ab accipienda ista dignitate te forte detertere possint, nobiscum communicare velis, quoniam non dubitamus quin ea aut illustraturi aut diminuturi simus. Quod superest, valde speramus fore, ut votis nostris et patriæ pareas. — Vale. —

RUITERUS PROCURATORI RERUM
BATAVARUM APUD MAURITANOS
P. S. D.

Misi ad te indicem librorum Arabicorum, quos impensis publicis emas velim, si copia detur. Scripsi etiam ad præfectum Saleæ, ut in iis parandis tibi sit auxilio. Tu si omni diligentia et studio hoc negotium curaveris, pergratum feceris magistratibus Hollandiæ, qui hoc mihi injunxerunt, ex patria in Africam abeunti. Idque rogatu Jacobi Golii. Is est qui magna cum laude literas Orientis Leidæ

docet. Narrant illi, quorum de his rebus est iudicium, meum enim non est, Golium in hoc genere nemini esse secundum. Ac vide incredibilem hominis discendi aviditatem. Iter fecit in Syriam, ibique diu moratus, doctrina se Arabica totum imbuat. Jam antea cum legato Hollando in regno Maroccano fuit. Ibi regi libellum, Arabico a se conscriptum sermone, obtulisse dicitur, quem ille et magna cum voluptate perlegit, et, summo opere admirans hospitem Arabicam linguam tam exacte callere, scribis suis, qui doctrina et eruditione eminebant, legendum dedit. — Jure igitur merito magistratus Hollandiæ nos, quod ille petiit, perficere, si possumus, jusserunt. Namque et jam opera Golii interpretis usi sunt, [quis enim tanta cum facilitate Turcico et Arabico sermone cum legatis quid agat, qua ille?] et uti deinde volunt. Quare et mihi magne erit gaudium, si per te studiis hominis doctissimi et vero etiam patriæ inservire possim. Vale, et quod rogaris, bene age. —

RUITERUS REI MARITIMÆ IN HOLLANDIA
PRÆFECTIS P. S. D.

A legato heri vestram cognovi voluntatem, quæ (*) ; quæ de perquirendis navibus jussistis, pro in-

(*) Qua ea et seq.] Erat hoc jussum quoddam [secrete acte] Præfect. rei marit. Amst. continens rationes quibus uterentur Hollandarum navium præfecti, si Angli naves mer-

infecto habetis. Videtur illud mihi, ut vere dicam, a dignitate patriæ nostræ, quam tuemur, alienum, et bonis militibus vix ferendum. Britones magna aliquando nos afficient contumelia, quæ toti civitati Hollandæ sit dedecori; et fieri facile poterit, ut mercatores nostri proditoris nos et perfidiæ accusent, et inertes nos esse nebulones arbitrentur. — Et quis in tanta Britonum licentia naves fidei suæ commissas tueatur? Summi et infimi hujus gentis, quicunque modo navi bellicæ præsint, causas contumeliæ captabunt, naves mercatorum pro lubitu perquirent, easque, quo jure qua injuria, in portus suos abducent. Hoc nos ut imbelles homunciones videbimus, et illis risum præbebimus? Illud nemo, qui patriam fido amore prosequitur, æquo animo ferre potest. Valde igitur spero fore ut, si fieri possit, alia jubeatis, atque ea avide expecto. — Classis nostra iter suscipere parata est, modo ventus faveat secundus. — Valate. —

RUITERUS OPTIMO AMICORUM
P. S. D.

Duæ Gallorum naves a nobis captæ sunt, quæ mercatoribus nostris magno fuere detrimento. Major, dicta regina, armata erat ducentis et triginta formercatoriis, suæ tutelæ commissas, perquirere vellent. Illud autem sibi jus sumserant, regnante Cromwellio, Protectore Angliæ. —

fociis navalibus, tormentis triginta, minor, cui nomen venatoris, centum et octoginta hominibus, viginti et octo tormentis. Celerrimæ sunt navium Gallicarum, quas unquam persecutus sum. Præfectus reginæ est eques Malthenfis, Lalandius (*), a cujus rapinis multos jam annos mare non tutum fuit. Hunc, quum in navem meam transfisset, eundem esse cognovi, quocum mihi ante septem fere annos negotium fuit. Rem in commentarios tunc retuli, non suspicans, fore ut ille, in cujus eram potestate, in meam aliquando esset venturus. Ex Barbaria iter in patriam meditabar. Exitus Gallæ naves obsidebant, omnia, quæcunque posset, levisimam quamque causam interferentes, prædabantur. Vim vi repellere, summæ fuisset dementiæ. Tentabam igitur quid verbis possem, ipsumque præfectum in nave sua conveniens, „ Re, „ gi tuo, inquam, et civitati nostræ est societas. „ Iter igitur meum ne impedi. Quod ex portu „ corum, quibuscum vobis bellum est, egressus „ sim, ne te hoc moveat. Publica munitus aucto- „ ritate hoc feci.” — At ille contemptim ridens, Nihil dicis, ait. Navem tuam, et, quibus onusta est, merces, meas facio. Tum si bibere vellem, rogavit. Ego me velle, respondi. Et ille, vinum an aquam? — Si captivus sim, non sine indignatione dicebam, aquam, si liber, vinum. — Quantam eum mihi tum admirationem injecisse putas, quum vinum infundi jusset, iterque mihi prosperum optavit? — Utrumne tam injusta prædandi causa

eum

(*) Lalandius.] De la Lande. —

eum moverit, an mea dicendi libertas illi placuerit, nescio. Sed hoc scio, istam fortunam magno mihi fuisse gaudio. Eundem nunc ego Lalandum cum nave sua cepi; ex quo etiam apparet, quanta fortunæ sit varietas et mobilitas. Quæris an memorem me beneficii præstiterim; quo tum me ille affecit? Ego vero præstiti, sed quantum fides mea et summorum magistratuum imperium paterentur. Hanc enim servare, huic parere, summum semper habui officium. Neque diu dubitavi quin patriæ jura hic multo essent sanctiora, quam amicitiae cujusdam aut animi grati. Itaque eum, qui naves mercibus onustas sibi impares, longo tempore vi rapuit, dimittere non potui. Sed fortunam illius solari possum, ut facio. Vivit in nave mea, ut in sua. In patria etiam, quæ in rem illius effici a me poterunt, efficiam. Nihil ultra jure quis a me postulet. — Vale.

RUITERUS OPTIMO AMICORUM

P. D. S.

Nyeburgum (*) terra marique a nobis et sociis obsessa impetum sustinere non potuit, atque in deditionem regis Daniæ pervenit. Ingens fuit Suecorum clades, nec minor virtus. Primum ante urbem magna vi pugnatum est. Inimici Hollandorum imprimis militum fortitudine in urbem repulsi sunt.

Nam

(*) Nyeburgum.] Nyborg. Quasi Neoburgum seu Nyoburgum, in Suecia. —

Nam quum Danorum et Germanorum cohortes cederent, multique armis abjectis ordines relinquerent, Hollandi agmine conferto, telis projectis, impetum hostium retardarunt et fregerunt. Quod et fociis sui restituendi tempus dedit, et victoriam maturavit. Mari res eadem virtute et felicitate gesta est. Alacritas sociorum navalium, quam nec (*) Angli negabunt, tanta fuit, ut admirari satis non potuerunt meumque imperium laudaverim, qui talibus hominibus præfsem. — Urbis obsesæ miserrima erat facies, ut e mari visentibus procul apparuit. Certatim globi ex omnibus omnium navium tormentis, sine ulla intermissione aut mora immittebantur, idque eo majore cum successu, quo propiore eramus. Hinc strages orta est maxima. Namque et urbs haud ita magna, et referta ingenti Suecorum militum vi, imprimis equitum; et globi, grandinis instar, in domos atque tecta ruebant; nec quidquam fere erat quod non dejiciebatur. Quare incredibilis hominum et equorum multitudo periit. Miserebat me tot calamitatum, quas bella trahunt. Itaque lætus caduceum ex urbe ad me venientem vidi, et brevi post ab imperatore Danorum cognovi, urbem se in fidem illius atque deditionem tradidisse. Mox ipse eo veni. Dani alique omnia, quæ miseris civi-

(*) Quam nec et seq.] Laudavit et hanc deinde AsRavius, qui captus a nostris, et in carcere Lupesteinio audiens classem Hollandam brevi postquam quatrimum pugnaverant, vela ventis dedisse, arcis præfecto dixisse fertur, „ Jour have an promte nation.” i. e. Alacris est natio vestra.

vibus remanserant, rapiebant. Imperatorem, ne illud sineret, frustra rogavi. Putabat ille furori militum in urbe, quam vi et armis ceperant, resisti non posse. At qui tandem Hollandi possint? Hos enim, dum tanta alii crudelitate grasfabantur, facili negotio duces disciplina continebant, ut quieti in armis starent. Magnopere gaudebam cives hos esse meos qui scirent,

Parcere dejectis et debellare superbos.

Neque ideo diu in urbe moratus, me in classem recepi, arbitrans omne onus captæ urbi esse grave. Si per ventum liceat, brevi cursum in patriam dirigemus. Nam hiems jam imminet. — Vale. —

PRÆTOR CLASSIS ALGIRANÆ MICHA-
ELI RUITERO P. S. D.

Quamquam in causa religionis etiam sis inimicus, tamen spero te, quod peto, mihi non esse negaturum. Tertio jam me persecutus es, primum apud Maltham, deinde Siciliam, nunc autem ad portum Farinæ, in quem me recepi. Ego te semper fugi, tanto certamini longe impar, non quod animus pugnandi deesset. Est mihi modo cymba quam arci tuæ opponam. Quare si me tanto honore digneris, committe mecum hominem ex classe tua pari, ut ego, præfectum imperio, ut, æquo Marte belli fortunam inter nos tentemus, et ego

ego res meas, ut bonum militem decet, gerere possum. Si vincar, servus ero tuus, si vincam, id vero magnæ mihi ducam laudi. — Quod si mihi illud concesseris, nec tum ego ex portu exierim, similis dicar timidissimæ in Hollandia mulieri. — Vale. —

M. RUITERUS ALGIRANÆ CLASSIS
PRÆTORI P. S. D.

Quæ a me petisti lætus cognovi. Virtutem, quæ pro patria et rebus vestris stare videris, laudo, et magni facio. Præfectus (*) igitur longæ navi ex classe mea te hora locoque, quæ tu ipse constitueris, expectabit. Fidem tibi do neminem nostrum huic navibus armis aut viris opem esse laturum. Vale. —

RUITERUS AMICO CARISSIMO
P. S. D.

Quam multa in vita mortalium accidunt mira, eorum præcipue qui multum et sæpe per maria et pras peregrinas vagantur! Incidi hic in regione tam longinqua, post tantum annorum intervallum, in ho-

(*) Præfectus et seq.] Præsto fuit ille, sed Turca tutus arcis præsidio, e portu non prodiit. —

hominem Mauritanum, quem puerum puer Vlisfingæ cognovi. Tria cum eodem feci itinera in Indiam. Conjungebat nos eadem fortunæ conditio, idem rei navalis studium, quod ille deinde dimisit. — Vultu erat nigro, sed animo tam candido, qualem utinam omnes Europæani haberent! Non sine summa voluptate illius temporis recordor. Nullæ nos curæ mordebant. Vivebamus in dies. Docebam illum, pro ingenio meo, mores et instituta, quibus in Europa vivebatur, docebam quæ de Deo sentiremus. Oculos in me semper intentos tenebat, nec quidquam libentius audiebat. — Sed quo me temporis illius dulcis memoria rapit? Vitium esse credo senectutis, quæ jam mihi adventat. Nostri præterea pueritiam me sæpe mihi ob oculos solere proponere, ut semper memor generis et pristinae fortunæ, tanta, in qua nunc sum, dignitate bene ac moderate utar. — Sed ut ad amicum meum redeamus, narrabo tibi qua ratione illum reppererim. — Misisti erant focii navales in terram aquæ petendæ causa. Erat cum illis Van der Zaanius. Hunc Mauritanus quidam, grandis natu, Hollandæ sermone affatur, rogans, quis classi Batavæ præesset. Respondit ille. Michaël Ruiterus. Mauritanus, audito nomine, „ Si bene memini, inquit, ante annos „ ego quadraginta quinque aut sex amico usus sum „ Vlisfingæ ejusdem nominis.” Quum Van der Zaanius non alium esse, qui nunc classi præerat Hollandæ, dixisset, primo non accredidit. Tandem persuasus rogavit, ut se ad navem meam vherent. Ut me vidit et agnovit, mira exsultans lætitia, diu quasi miraculo erat obstupefactus. —

Post-

Postquam vino eum et epulis exceperam, variis de rebus collocti sumus. Narrabat mihi magna se usum esse fortuna. Erat enim rex, ut se ipse appellabat, id est, ut ego interpretor, princeps aliquot Mauritanorum. — Mirabar hominis memoriam. Omnium fere rerum, quas pueri gesimus, meminerat. Nomina pontium, viarum, et templorum, quæ sunt Vlislingæ, tenebat. Rogabam, an etiamnum esset Christianus, quum olim Vlislingæ aqua esset inspersus sacra. „ Ego vero sum Christianus, inquit, atque etiam preces, quas auctor religionis instituit, memoria teneo. Nec exciderunt capita fidei. Sed colo Deum tacito pectore, ut possum. Quod si enim de his rebus loqui incipio, liberi mei et cives me derident.” — Ad hæc ego, Utra te vita magis delectat quam hic agis, an quam in Zelandia agere posses? — Tum ille, „ Multo, malim equidem hic vivere et habitare, quantum vis sim pauper.” — Adeo suæ cuique patriæ amor est innatus. — Tandem Kompanium (*) vestibus aliisque rebus, quæ in magno ibi sunt pretio, donatum dimisi.

(*) Kompanium] Nomen illius erat — Jan Kompany. —

MAGISTRATUS HOLLANDIÆ MICHA-
ELI RUITERO P. S. D.

Non potuimus non te facere certiores rerum, quæ te absente gestæ sunt. Classis nostra cum Anglis conflavit. Postquam duodecim fere horas utrimque erat pugnatum, navis Wasfenarii, qui summam imperii tenebat, incensa et vi pulveris ignei disrupta est. Kortenarius, quem imperare iusseramus, si quid Wasfenario accidisset, primo jam proelio ceciderat. Hujus in nave, quæ summi imperii signa gerebat post interitum Wasfenarii, res non ea alacritate actæ sunt, qua illo superstitute actæ sine dubio fuissent. Quibus malis factum est ut classis nostra, navibus aliquot amisissis, in Texelam se receperit. — Hujus ergo pugnae eventum te ignorare nolumus. Hostes post proelium binos dies prope litora nostra visi sunt. Postero die, qui est XVII. Julii, altum petierunt, vento usi qui ab oriente venit. Itaque suspicamur quidem illos se ad portum Anglum aliquem contulisse, tamen illud nobis non constat. Navigia, speculandi causa emissa, nihil certi retulerunt. Ille, cui has ad te literas dedimus perferendas, justus est omni diligentia in parte ad Aquilonem prospicere, si forte ibi classis Anglorum commoretur, tibi que, quam possit, accuratissime ostendere qua eos evadas. Reditu enim in patriam te intercludere conantur. Tu solita tua utere prudentia, et cogita nos victoriæ instar habituros, si te incolumem receperimus. Deus O. M. consiliis tuis favore suo adsit.

L

M.

M. RUITERUS MAGISTRATUI HOLLANDIÆ

P. S. D.

Non sine insigni voluptate reditus vos mei certiores facio; quem Deus O. M. per medios hostes mihi dedit. Ingratus essem, nisi illud vobis et omnibus profiterer, neque tam præsens beneficium agnoscerem. Sine Deo omnis prudentia in tanta hostium multitudine, qui me eadem diligentia quærebant qua ego adspectum illorum fugiebam, irrita fuisset. Nihil tamen a nobis, quod potuimus, omisum est. A. d. II. August. in magno fuimus periculo. Certis ad me auctoribus erat perlatum, partem clasfis Anglæ per aliquot jam dies propè Norvegiam apparuisse. Nullam adhuc navem videramus. Summo mane duo navigia veniunt in conspectum, quæ speculandi causa huc illuc commæabant. Terribilis tormentorum a nobis audiebatur, quod reliquæ clasfi esset indicio nos esse deprehensos. Cursum nos nostrum tenebamus, neque hostem vidimus. Itaque a. d. VI. August. ad Delfzylam non sine periculo accessimus. Signa (*) enim, quorum indicio vada evitare solemus, non apparebant. — Clasfis nostra constat ex novem navibus longis, quibus uti in bello positis. Sed longo itinere valde sunt fordidæ, atque omnibus opus est novis velis. Socii navales bona quidem sunt valetu-

(*) Signa.] De bakens. Demta hæc erant jussu magistratum, ne hosti viam offenderent, si huc intrare vel-
lent. —

tudine, sed diuturnis erroribus confecti. Illis ergo otium aliquamdiu concedendum est, et facultas danda exeundi in terram, ut se recreent et vires reficiant. Præfecti omnes apti mansimus patriæ in bello juvandæ. Quæ in expeditione gesimus, quantum prædæ fecimus, ea libello expofita brevi ipse vobis tradam. Valete. —

M. RUITERUS TROMPIO
P. S. D.

De virtute quidem tua nunquam dubitavi quin ea esset tanta, ut nos omnes, quibus gloria et salus patriæ est cordi, te exempli instar intueri possemus; eadem tamen virtus in nupero proelio adeo eluxit, ut nesciam an non plus admirationis apud nos, quam fidei apud alios sit habitura. — Maximum itaque momentum attulisti ad eam victoriam, quam ab inimicis reportavimus. — Non semel te in confertissimos hostes irrupere, tantumque iis terrorem injicere vidimus, ut, quocunque venires, locum tibi cederent. Quoties (*) in aliam navem transisti quum ea, in qua eses, hostilibus tormentis nimis esset quasfata et fere perfossa? Hæc quæ ipsi vidimus, et hostes experti sunt, palam et ubique

(*) Quoties et seq.] Dedit ista Trompii virtus inimicis occasionem jocandi, rogantibus, an quinque vel sex Trompii in classa Batava essent? Videbant scilicet apusire illius modo in hac modo in illa nave. —

que laudabo, virtutemque tuam, quod semper feci, imitari conabor. In hoc uno sumus æmuli ne alter alteri quidquam concedat, et perpetuo inter nos certemus, uter patriæ plurima præstiterit officia. Cæteris in rebus (*) ea permaneant amicitia quam rei publicæ commodum postulat. — Magnopere gavisus sum, nec gaudere desinam, deposuisse te offensionem tuam. Ingenue tecum agam, nam simulare meum non est. Magnus semper mihi homo visus es, sed nunquam major, quam cum salutem reipublicæ laudis cuidam opinioni prætuleris. Cæteris enim factis tuis hostem superasti, hoc te ipsum superasti, idque in eo genere, in quo victoria omnium est difficillima. — Vale. —

(*) Cæteris in rebus et seq.] Aegre tulerat Trompius quod Ruitero summum imperium totius classis esset delatum, quod tenebat ille interim dum Ruiterus nondum ab expeditione in patriam esset reversus; adeo ut a munere suo dimittit petierit. —





